

## **ASO TOFI, 27 MATI 2014**

*Na nofoia le Nofoa e le Fofoga Fetalai i le itula e 9.00 i le taeao.*

Tatalo.

**FOFOGA FETALAI:** I le agaga faafetai e le mafai ai ona taotaomia le agaga o le viiga ma le faafetai i le Atua ona ua tatou taunuu mai foi i lenei Aso Fono e pei ona tuupoina i la tatou Polokalame faataatia. E momoli atu le agaga faafetai tele i le paia ma le mamalu o lo tatou Maota. Ua toe o se aga ona tatou taunuu lea i le taunuuga o galuega o lenei vaiaso. E ui ina tatou feagai ma faigata ma fita i lenei vaiaso i faamai ma nisi o faafitauli le maalofia ma tuatuno'a, ae e talitonu o lo o tapuaaoina pea le soifua manuia i totonu o lo tatou Maota. E momoli atu ai le agaga faafetai tele i le paia ma le mamalu i sui usufono uma o lo tatou Maota i ona tulaga faalupelupe, ua malo le onosai, ua malo le tauatai, malo le usufono, ua faamalo foi le faatasi mai i a tatou fonotaga e pei ona tuupoina.

O le agaga faafetai i lau Afioga i le Sui Palemia ma le Kapeneta aemaise foi le afio o le Taitai o le Itu Agai ma sui usufono mamalu uma o le Maota Fono i lenei taeao.

O le a faagasolo a tatou galuega e pei ona talanoaina i le aso ananafi. O le agaga lava ma le faamoemoe ia tulituliaupu galuega ua uma ona faataatia ma tatou faapolokalameina. O a foi ni suiga o taumafai atu ai le Fofoga Fetalai, e talitonu lava o la tatou avega e tausoa. O le ato e fevailiai o tatou manatu ma o tatou lagona ina ia sologa lelei. Tatou te suia mea ina ia fetai fola o outou finagalo ma sou taumafai atu foi ina ia faatonutonu folau le tatou Fono. E i ai le lagona o a foi nisi o tulaga e tulai mai i ni suiga, o lou talitonuga ina ia sa'o i maa o malie ma see a tatou galuega i le mea e tatau ona i ai. A o tulaga uma ma faamoemoega, e leai se mea e tasi e aunoa ma le tatou galulue faatasi. O nisi foi taimi e tapa outou finagalo, o lo tatou soalaupule ma tatou tutu faatasi i se mea e talafeagai e sologa lelei ai a tatou galuega i lona faasologa.

## **TUUNA ATU O LIPOTI A KOMITI FILIFILIA**

*Na tolaulauina e le Failautusi Lipoti a le Komiti Filifilia ua faataatia i luga o le Laulau a Fono e tusa ai ma T.T.51(5).*

1. P.P.2013/2014 Nu.136, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P.2012/2013 Nu.55 & P.P.2013/2014 Nu.74, Lipoti Faaletausaga a le Faaputugatupe mo le Lumanai Manuia o Tagata mo le Tausaga 2012 ma le Tausaga 2013.
2. P.P.2013/2014 Nu.137, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le P.P.2013/2014 Nu.47 & P.P.2013/2014 Nu.48, Lipoti Faaletausaga a le Matagaluega o le Soifua Maloloina mo le Tausaga Faaletupe 2010/2011 ma le 2011/2012.

### **ILOILOGA O LIPOTI A KOMITI FILIFILIA**

**P.P.2013/2014 NU.62, LIPOTI A LE KOMITI O MATAUPU TAU AOGA,  
SAIENISI, FESOOTAIGA & FAAMATALAGA TEKONOLOSI I LE  
P.P.2011/2012 NU.34, LIPOTI FAALETAUSAGA A LE  
FAALAPOTOPOTOGA O SUESUEGA FAASAIENISI A SAMOA MO LE  
TAUSAGA 2009/2010  
- ILOILOGA**

**Afioga Hon Palusalua Faapo II (Taitai o le Itu Agai):** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Tulai mai lau Afioga i le Taitai o le Itu Agai.

**Afioga Hon Palusalua Faapo II:** Ou te tulai atu ma le agaga faanoanoa tele. Sa tuuina atu fesili a lenei Itu, e le o se fesili a se toatasi a o fesili a le Vaega Faaupufai o lo o agaia le Malo e tusa ai ma Tulafono Tumau. O lea e manino le Fuaiupu 58 ma le 59, ae seasea maua se avanoa e oo ai i Aso Tofi e fai ai a tatou fesili. O le Tulafono Tumau lenei o mea fou lea o lo o aafia ai le atunuu. O lea ua tolu tausaga o le Paeaiga e le oo i ni Aso Tofi ni Fono. O fea le transparency ma le accountability lea tatou te alalaga ai? O Pulega lelei ma Pulega manino, a o lea ua avatu a matou fesili ae le aumaia i le Pepa o Galuega e tusa ai ma Tulafono Tumau. Na fai a tatou Semina omai tagata mai fafo e fai Semina i le tulaga lea i fesili.

Lau Afioga i le Fofoga Fetalai, ua tumu lenei Vaega Faaupufai i le faanoanoa e tusa ai ma Tulafono Tumau ma Faigamalo faatemokarasi. O Palemene faatemokarasi - o lea e le usitaia.

Lau Afioga i le Fofoga Fetalai, e sili le aumai o fesili ou te fai atu i le taimi lenei e tusa ai ma Tulafono Tumau.

**FOFOGA FETALAI:** Le Taitai o le Itu Agai, o lea o le a ou tali atu.

**Afioga Hon Palusalue Faapo II:** Se ua matua faanoanoa tele lenei Vaega Faaupufai.

**FOFOGA FETALAI:** Alaala mai i lalo se i fai atu le tala a le Fofoga Fetalai. Sa i ai lava le talitonuga i le aso ananafi o lea sa malamalama lau talosaga sa tuuina atu ma e leai foi se iota o mea na ou tuuina atu ai le faamalamalama ma ou faamalulu atu ona o tulaga o lea e agai i ai le Fono.

Silasila foi lau Afioga i le Taitai o le Itu Agai, na ou tuuina atu le faamalamalama ma le faamaluluuga i le aso ananafi, tatou te fetuunai ona o mea o lea ua tatou oo i ai i le taimi lenei. O le Fono lenei a outou silasila ma aumai le hansard i lau folasaga na fai, faatoa uma lava le session lenei pe a uma Lipoti ma mea ia ua outou saunoa mai ai mai le amataga. O lau folasaga e 70 Lipoti lea na taua. O le tatou polokalame lenei o lea na taatia. O lea foi na e faafofoga i le saunoaga a le Taitai o le Malo faatoa tatou malolo lava i le session lenei pe a uma mea nei, peitai o lea ua tatou vaai i le mea lea ua tulai mai i le taimi lenei. Na tatou momoe ma manū ae sau mala e atia'i. O lea ua fetuunai a tatou polokalame ona o mea ia ua tulai mai. O le a le mea muamua? Ua tulai le faaaitaui i le gasegase lea e tele ina tau le atoa le tatou quorum. O le taeao nei, e toalua pe toatolu sui usufono o lenei Itu lea na oo mai faanoi ona ua aafia i le faamai lea tatou te i ai nei.

O lona lua, o lea ua tulai le faatafa gasegase o le Taitai o le Malo.

O lona tolu, silasila i le itu a le Kapeneta? E fia nofoa ia ua avanoa? O lea e fetuunai le tulaga ina ia talafeagai ma fetau. O lea ou te malamalama i outou atugaluga i a outou aiatatau lea ua outou fai mai ai nei i le Fuaiupu 44 ma le 45.

Silasila i le Fuaiupu 44: o lo o i ai i le Fofoga Fetalai le pule faitalia e fetuunai ai le Fono i le Pepa o Galuega. O lea ou te amanaia, o Aso Tofi o aso e lafo atu ai le avanoa e faamuamua galuega a sui usufono. O lea ou te amanaia le tulaga lenei. O lea e te tulituliaupu ma e agai mai e talanoa Lipoti, talanoa Lipoti. O lea ua ou vaai i a outou fesili. O a outou fesili, a tatou o nei e faamalamalama Lipoti, e tali uma lava a outou fesili i Lipoti ia tatou te agai i ai. E le faapea la o ni ai e avea lau Afioga i le Taitai o le Itu Agai.

O lea ou te faamalamalama atu, tatou fesui ai mo mea lelei. Ua uma foi ona ou fai atu ananafi, e le o le Aso Tofi muamua e le o le Aso Tofi mulimuli foi lenei. Silasila i le fono i le Aso Tofi lea na tea nei? Sa outou alalaga mai i a outou fesili, na tuu talaloa le tatou Fono. Na oo lava i le Aso Tofi faaauau le talanoaina o Lipoti. Ona o le a? O lea tou te naunau mai i le Lipoti lea tou te naunau i ai lea e tuuaia ai le Malo.

O le ala lea lau Afioga i le Taitai o le Itu Agai, e fai foi o lou agiagi mai i lou manatu i le mea lea, a o lea foi ou te taoama ia taatia i lagatonu a tatou galuega. O le lagona e leai sa outou aiatatau o faaitiitia. O lea foi e faaavanoa taimi i mea o lo o outou saunoa ma manatu mai ai ma o lea ou te tuu avanoa. O nisi foi taimi

tou te tolosi mai ai, e tiga ona ou iloa e le fetai ma Tulafono Tumau ae tuu atu lava le avanoa. Ona o le a? O le ava atu.

O lea la, aua e te fesiligia lau faaiuga lea e fai le Taitai o le Itu Agai leaga o le ta galuega lena o lea e faasoa atu ma ou taumafai atu ai.

**Afioga Hon Palusalua Faapo II:** Lau Afioga i le Fofoga Fetalai.....

**FOFOGA FETALAI:** Faatali o lea e lei uma lau faamalamalamaga. Onosai mai o lea e le i uma lau faamalamalamaga i le mataupu.

A ta o nei e tulituliaupu le faauigaina o Tulafono Tumau, e tasi lava le tagata na te faauigaina Tulafono Tumau na o le Fofoga Fetalai. A o le tuu avanoa o le mea lena o lea e fai nei, o lea lava e tuu atu le avanoa. Ia silasila i le mea lea ou te augani atu ai? O fesili ia ua ou taulimaina, lau Afioga i le Taitai o le Itu Agai o lena e te silafia. E tali uma lava fesili ia, ma o le tele foi o fesili ia na aumai ua uma ona tali.

O lena tulaga faapea o lo outou naunau, o le aoga lena o a tatou semina ia e fai atu ae le faapea o le a toso ai lava e tiga ona tatou vaai atu e le fetai ae fai lava. O le agaga lena o le Fofoga Fetalai, o lea ou te faamalulu atu ai lau Afioga i le Taitai o le Itu Agai, ni a fa au i lou finagalo, e tele malama e le uma le fai aso o le Atua. O lea ua tulai mai e le gata i le Maota Fono ae silasila i le aufaigaluega, ua mata tioata uma le aufaigaluega. A o nei la e mamai a o ai a tautuaina le Fono Aoao a le atunuu?

O le ala lea ou te tapa ai ma ou manatu ai e tataua ona ou faamalamalamaina, ae e le o ni tulaga o le a faaitiitia ai outou finagalo. Ua toe tolu pe toe lua tausaga ia e totoe o le tatou Paeaiga. Aua tou te manatu i le tulaga o le le oo o a tatou Fono i Aso Tofi.

O lea ua outou vaai nei ua ave lau talosaga malosia i le Taitai o le Malo ina ia fai le tulaga lea. A lea faatoa oo a tatou session i le Aso Tofi. Ona o le a? O le faataua o galuega a le Maota, ae aua ne i faia le mea lea o le uma loa o galuega a le Malo uma le Fono. O lea ua outou vaai ua ave lau talosaga ma o le ala faaputupufoi lena o a tatou Lipoti nei ma tele ona e le o maua e le Maota se taimi e faatino ai ana galuega. O lea ua tafa le finagalo o le Malo, o lea ua maua o tatou taimi. O le lua vaiaso muamua lea, o lea faatoa oo a tatou Fono i Aso Tofi. Ia tatou faifai malie laia o lea ua maua o tatou avanoa, ae ave tele lau faamuamua i le Kapeneta ma le Palemia leaga o latou e pisi, a o lea ua sao le tatou faatolotolo, faaoioi ma le faaoloolomaau ina ia alofagia e vaai galuega ina ia aua ne i toe tulai mai le faafitauli lea.

O lea foi ua outou faafofoga ua ave lau faamanatu i Taitaifono o Komiti Filifilia ma Sui Taitaifono ina ia aua ne i toe i ai se galuega e ova atu ma le tolu masina. O le faatonuga lea o lea ua ave i ai ina ia aua ne i toe tulai mai le mataupu lena.

Ua tuuaia le Fofoga Fetalai i le toso o galuega. Oi a toso o lea e taumafai a tatou galuega o lena ua outou silafia, tatou te potopoto i le Tofilau ma taumafai e fai galuega. Ona o le a? O le naunau ia outou omai uma e fai a outou fono ae ia aua ne i le toe atoa se quorum ma ia outou omai e faatino a tatou galuega.

O le ala lea lau Afioga i le Taitai o le Itu Agai, ua ou tatala atu lava le avanoa aua ou te iloa, o lou finagalo o lou naunau mai foi lena ina ia faatino a tatou galuega, ae ia vaatele outou finagalo ona o lea lava ou te taumafai atu e fesui'ai a tatou polokalame ina ia taatia i lagatonu a tatou fonotaga.

Tulai mai lau Afioga i le Sui Palemia.

**Tofa Hon Fonotoe Nuafesili Pierre Lauofo (Sui Palemia):** Lau Afioga i le Fofoga Fetalai, e faatalofa atu foi i lenei taeao i lau Afioga ma le Maota nei. Ua maea ona e faailo le lupe o le taeao e ala i la tatou faafetai i lo tatou Tapaau Sili, ma o le tatou sao foi lea ia Manuvao. Ua faalogologo ma le totoa le Itu a le Malo i lenei taeao i lau folasaga matagofie ma ua matou manatu, o lau faaiuga ma mafuaaga o lau faaiuga, ua talafeagai lelei ma le Fuaiupu 44(2) o a tatou Tulafono Tumau. Ona faapea lea o so matou lagona, o le a faia lou finagalo, faafetai.

**Afioga Hon Palusalua Faapo II:** Lau Afioga i le Fofoga Fetalai....

**FOFOGA FETALAI:** Ia, lau Afioga i le Taitai o le Itu Agai.

**Afioga Hon Palusalua Faapo II:** Aua e te puipui le mea sese lau Afioga i le Sui Palemia.

**Tofa Hon Fonotoe Nuafesili Pierre Lauofo:** O le a le mea sese o lea e faasino atu le Tulafono Tumau?

**FOFOGA FETALAI:** O le a le mea sese le Taitai o le Itu Agai? O le a le mea sese o lea e i lalo o Tulafono Tumau?

**Afioga Hon Palusalua Faapo II:** O lau mea sese lea ua fai o le taofi o fesili a le Itu Agai. O fesili e fetau'i i le taimi lenei i le Malo.

**FOFOGA FETALAI:** Alaala i lalo le sui usufono mamalu. Alaala i lalo.

**Afioga Hon Palusalua Faapo II:** O lea o le a matou o i le fale.

**FOFOGA FETALAI:** Alaala i lalo. Pule oe pe e te alu i le fale. O lau faitalia lena – o le faitalia lena a oe.

Oi, a taumafai e faatoatoa atu ma faamalamala. O le Fuaiupu 44 silasila i ai.

**Afioga Hon Palusalua Faapo II:** O le a la lou manatu, o le Aso Tofi muamua lenei ua oo i ai le fonu ae ua leva ona avatu isi a matou fesili.

**FOFOGA FETALAI:** Na tatou oo i le Aso Tofi i le vaiaso lea na tea nei, ua uma ona oo mai e le faapea o aumai a outou fesili ma ave i fea, o lea e i luma o le

Palemene. E faamuamua mea e tatau ona faamuamua i galuega a le Palemene. Alaala i lalo le sui usufono.

**Afioga Hon Palusalue Faapo II:** Ona pau lava le mea e faamuamua o le Tala Autu o le Tupe. Ona pau lena o le mea e faamuamua.

**FOFOGA FETALAI:** Alaala i lalo le sui usufono. Sa i ai le lagona e te lauama tootoo i le mea lea e tau fai atu. O le a tauau ina sii lau ta. Aua e te le mafaufau o lea e taumafai atu a tatou galuega. E tasi lava le tagata e faatonutonu folau i a tatou galuega o lea e taumafai atu. E le o taomia outou finagalo; fuafua mai o lea e fuafua atu. E tele foi taimi e te le mafaufau ai a o lea lava e tuu atu le avanoa.

Ua uma ona ou talosaga atu ma ou faaoioi atu e ese le taimi lea tatou te i ai ae aua e te fai mai e sese le mea lea ou te fai atu ai – faitau lelei Tulafono Tumau. O le Fuaiupu 44 lena e i ai aiaiga, e fetuunai e le Fofoga Fetalai fono i mea e talafeagai ma mea e tulai mai. E te fesili la e te tali a o lea e le o i ai iinei le Taitai o le Malo? O le ava atu ia te outou lea e fai ai le tatou fono. E te fesili i isi Minisita e tali i Lipoti a o lea e leai se Minisita o iinei? E faapefea ona fetuunai, ona avatu foi lea tuu mai outou finagalo e le atoatoa tali a le Malo?

Sa ou manatu lau Afioga i le Taitai o le Itu Agai e te fetuunai i le ava fatafata ma le va nonofo, ae aua e te tulai mai ma e fai mai e sese le mea lea ou te fai atu ai. E le soona fai atua se faaiuga.

**Afioga Hon Leaupepe Toleafoa Apulu Faafisi (Aana Alofi Nu.1):** Lau Afioga i le Fofoga Fetalai.....

**FOFOGA FETALAI:** Tulai mai le sui usufono mamalu.

**Afioga Hon Leaupepe Toleafoa Apulu Faafisi:** Ua ou manatu i lenei taeao, e fiafia lava le agaga ina ua faalogologo foi, e pei lava ona faamalulu atu ua faatautuauega le taunuu mai o le matou foi vaa ona o le poloka o le auala, ae ui i lea, sa matou faalogologo ma le totoa i le manaia o le talosaga ma le taulaga ua siitia i lenei taeao, ua auai faatasi le agaga ma le faamoemoe e pei ona saunoa i ai lau Afioga i le Fofoga Fetalai.

Ua ou manatu foi i lenei taeao ua tetena foi le tofa i lau Afioga talu ai ona o le mataupu e pei ona laga e le Taitai o le Itu Agai. O lo o maitauina ma le totoa e le Palemene le tonu ma le sao o lou finagalo e pei ona faaalua. O a Tulafono i totonu o le Tulafono Tumau, o i ai le tofa i lau Afioga i le faatinoina o a tatou galuega. O le ala foi lena e tiga lava ona lagona le vaivai ma le le atoatoa o le malosi, ae taumafai mai lava ina ia faauma a tatou galuega e pei ona taoto mai ai le lafoga a le Palemia ma lou finagalo faaalua i lena vaiaso ua tuanai, ina ia faagasolo a tatou galuega i Lipoti a Komiti e 70+. Na pau lava lena o le mea o lea e agaga i ai i matou o Taitaifono, talu ai ona o au o se tasi o Taitaifono o le Komiti, o le agaga

lena ina ia faamaea le tatou galuega tuua pei ona tuuaina ai foi matou o le tuai ona faaoo mai o Lipoti a Komiti taitasi.

O le mea lea e tulai atu ai ma le agaga faaaloalo e faamalulu atu i le tofa i lau Afioga, ma e manatu foi, lau Afioga i le Taitai o le Itu Agai, o lo o maitau ma le totoa le atunuu, e le faapena se tofa i le Taitai o le Itu Agai ina ia lavapapale ma toa pea le tai. O lau Afioga o lo o avatu i ai le faamuamua e agaia le Malo. O le Afioga i le Palemia ma le Sui Palemia o lo o toesea le Palemia ona o sailiga togafiti, ae o lo o tulai mai le Afioga i le Sui Palemia ma le Kapeneta, o le faatuatuaga lea e lafo atu i lau Afioga. E manatu foi e le faatonua e le matapia le manaia po o Laupua foi Tamafaiga, ae ao ona faifai totoa le tatou galuega aua foi le televave, e leai e sau malama ona faatino lava lea o lo outou finagalo ma le aso o lo o faamoemoe i ai a outou fesili. O matou nei na omai, e lei omai i le Fono o ni fesili a le Itu Agai, na omai nei o le faaumaina o a tatou Lipoti.

O le mea lea ua tulai atu ai ma le faaaloalo. Faafetai. Ia manuia le tatou Fono.

**FOFOGA FETALAI:** Sei tulai mai lau Afioga i le Sui Taitai o le Itu Agai.

**Afioga Hon Aeau Peniamina Leavaiseeta (Falealupo):** Faafetai mo le avanoa lau Afioga i le Fofoga Fetalai. O le a taatia la le mataupu lea sei i ai se taimi saunoa atu e tusa ai ma le malelega mai le Nofoa. A ua ou tulai atu e tusa ai ma le tulai mai a le Afioga i le sui usufono mamalu, ona sa Fofoga Fetalai, o au foi la sa Fofoga Fetalai, o lea ua avatu ma tamai manatu laiti.

Lau Afioga i le Fofoga Fetalai, e faigofie lava le mataupu. Na pau lava lea o le mea sa popole ai le Itu nei, ina ia logona le Maota i a matou fesili, aua e seasea maua le avanoa. Ia o lea la ua aumai le finagalo o lau Afioga, aua ana faalogo le Maota nei i fesili na avatu, aua e le talia mai i le taimi lenei, e tali mai tusingitia i se isi taimi. Na pau lava lea, e le atoa le minute. I le ae tainane lea, ua le o le tofa lea, e leai la se mea o i ai.

Ae na ona ou fesoasoani atu i lou uso, se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi, na pau lava le mea, o a tatou Tulafono e manino, e le tau fesiligia e se isi, everybody can read it and understand it. Na pau lava le mea o le faatino, ae leai se mea o afaina ai le tatou Tulafono. Na o le faatino lava pau lea. O le mea lena ou te fia fesoasoani atu ai i lau Afioga, ae o lea o le a saunoa atu le Taitai o le Itu Agai.

**Afioga Hon Palusalua Faapo II:** Lau Afioga i le Fofoga Fetalai, ou te tulai atu ma le faaaloalo, o lea foi ua ou faitau i le Tulafono Tumau 44, ae ui i lea, o le a ou le toe faafinai le mataupu. Na pau lava lea lau Afioga, o fesili, o fesili mo le taimi lenei i mea o tutupu i le atunuu. A toe tuu atu i le isi taimi, ua le aoga fesili. O le ala lea ua maua ai lenei avanoa e taumafai atu ai lau Afioga i le Fofoga Fetalai.

**FOFOGA FETALAI:** O lea ua ou maua lou finagalo le Taitai o le Itu Agai. O lea ua ou maua lou finagalo.

**Afioga Hon Palusalue Faapo II:** A o fesili foi nei pei ona e saunoa, e leai e le o talia mai leaga o fesili fou.

**FOFOGA FETALAI:** O lea ua ou maua lou finagalo. Sei avatu lau tali i le mea lea, leaga o lea e te tulai mai lava e tulituliaupu lou manatu lea e aumai. A tatou o nei e vailiili le Tulafono Tumau, e eseese uma lava le faauigaga a outou ma le mea lea ou te taumafai atu ai. E le o se fai la o se tagata e ae le olo ma sao lana finau ma manumalo, e le o lena. A o le mea e taotoga ai ma filemu ma sagatonu lau o le fo i le tatou Fono lea ou te taumafai atu ai. Silasila e lei oo muamua ni a tatou Fono i le Aso Tofi? O lea faatoa faalua vaiaso talu ona oo ona o le a? O le talosaga na ou fai i le Malo, o le talosaga na ou fai i le Malo e tuu mai se avanoa sei talanoa mataupu a le Maota. Sei silasila la i ai? O lea faatoa lua vaiaso, a o lea ua outou laga mai faapea o le le amanaia o a outou fesili? A le amanaia o lea e faafofoga atu le Failautusi o le Fono? O lo o i i uma a outou fesili, ma e leai se mea e tasi e ela ai lau vaai pe le o amanaia. A o le taimi talafeagai ma le taimi sao lea out e taumafai atu ai. O le Tulafono Tumau o lo o maioio ma i ai le malosiaga atoatoa lea ou te taumafai atu ai e tau faasaosao. Ae malie lo outou finagalo, aua nei ave ma mea o le a tafa ai ma tulai i se isi tulaga e tulai mai ai se tatou feeseeseaiga. E le o lena, ae tele le avanoa.

O Lipoti foi nei e talanoa, le 70 Lipoti lea, o lou talitonuga i fesili nei sa aumai, e tali uma lava i Lipoti nei. O Lipoti na talanoa i le 2009-2010 ma le taimi nei 2012-2013 e maua uma ai faamaumauga. E maua. O le tulaga lena na ala ai ona fetuunai ma tatou talanoa Lipoti taitolu i le taimi e tasi. E ui o lea, ua malamalama le Maota e ala i lau faasilasilaga, o lea foi ua fesoasoani mai le...

**Afioga Hon Palusalue Faapo II:** Lau Afioga i le Fofoga Fetalai, o le a ou le toe oo lava i se isi tulaga. Na pau lava lea o le mea, leaga o la e faafogafoga mai le atunuu nei faapea pei ona e saunoa ua ou le mafaufau.

Lau Afioga i le Fofoga Fetalai, ou te faamalulu atu, o le taumafaiga a lenei Itu e tusa ai ma o matou tiute i totonu o le Maota lenei, lea e aumai i le Tulafono Tumau. Afai ua sese sau tala ona o le naunau atu o lenei Itu ia fai le amiotonu ma fai mea manino, ou te faamalulu atu i lau Afioga. O le mea sili ona taua o la e faafogafoga mai le la Itu, faafogafoga mai le atunuu, faamasino mai i le mea lea na tupu nei i le taeao aua e le au maua nei avanoa. O le mea la lea lau Afioga, ou te faamalulu atu i lau Afioga. E faamalulu atu foi i le la Itu ma le Maota i tulaga o lenei taeao, ona o le naunautaga lava ia fai le amiotonu, fai le mea sao.

Na pau lea o sau tala ma le faaaloalo. Ia manuia le Fono.

**FOFOGA FETALAI:** Ua lelei, o lea ua maua lou finagalo. Ae masalo e sili atu le tulitatao e le Fofoga Fetalai ma le amiotonu ma le amio sao lea e te saunoa i ai. Ua uma foi ona ou tuu atu le tulaga i le talosaga ia lagapapale ma outou logosaia mea ia ua faatulaga atu ai le tatou Fono, aua e le mafai ona faia se mea ina ia alofia se mataupu, e le mafai foi ona faia se faaiuga ina ia taotaomia ai se finagalo o la outou Itu. Silasila i le amataga talu ona tulai atu e ave ma Fofoga



Fetalai. O le a? Ua i ai se mea ua faaitiitia ai sa outou aiatatau? Ua i ai se mea e tasi talu ona amata a tatou Fonotaga? Ia, o lenei tou te maitau, aua o lenei e te faalele ae i ai isi o lea e maitau. O lea lava e taotaoama ona o le manatu atu ia te outou e le gata o outou o lo o outou agaia le Malo, a o le Itu laitiiti o le Palemene. O a uma foi fuafuaga ma mea ia e faagasolo i le Matagaluega o le Fono, o mea e lelei ai outou, e le faapea o se isi tulaga. Ae a taunuu mai loa i le faafoega o le Fono, e tatau ona outou..... you have to trust le mea lea e fai. O le galuega o le faatonutonu folau ina ia sao ma uli le tatou galuega. Ae a outou manatu loa lea faapena, ona tatou o loa lea i se isi tulaga.

Tulai mai se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.

**Afioga Hon Leaupepe Toleafoa Apulu Faafisi:** Lau Afioga i le Fofoga Fetalai, ma lou faaaloalo ou te musu ma te faatauta ma le Afioga i le Sui Taitai o le Itu Agai, ae ui i lea, taoto ia fatia. Ae na ona ou faafetai atu i le tofa faapalepale ma le tofamamao i lau Afioga, aua po o a tatou Tulafono Tumau, e maualuga lava le tofa faapalepale ma le tofamamao i lau Afioga. Aua a faatino a tatou Tulafono, ua toatele sui usufono ua tatau ona fai i ai le faaiuga foi lea o le tasi, lua, tolu, fa soli Fono ua tatau ona malolo ma le Fono. O itu na, aua a tatou o e faatino le Tulafono, ua tatau lava ona tino mai le o ese o nisi sui usufono. A o le tulaga lea e te saunoa i ai, e maualuga le faapalepale, o le finagalo lenei o le Atua, ma e tasi lenei vaega o le aganuu, o le alofa ma le faaaloalo.

**Tofa Lealailepule Rimoni Aiafi (Faleata Sisifo):** Lau Afioga i le Fofoga Fetalai, i le ava lava e tatau ai.....

**FOFOGA FETALAI:** Faafetai atu fesoasoani mai. Malie le sui usufono mo Faleata Sisifo, o lea ua maea le mataupu, alofa mai o lea lava e tau faatoatoa atu le tatou mataupu i lenei taeao. E manatu o lea ua taatia i lagatonu, o lea ua fefaaaliai finagalo ma ua manino foi finagalo o sui usufono na tuuina mai, ma e le faia se felafolafoaiga i le mataupu lenei. Malie lau Afioga i le fofoga o alii i lea itu o le tatou Palemene, ou te talitonu ua manino ma malamalama le mataupu.

**Tofa LENATAI VICTOR FAAFOI TAMAPUA (Taitaifono, Komiti o Aoga, Saienisi, Fesootaiga ma Faamatalaga Tekonolosi):**

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:-

1. **Vave faalauiloa Faaiuga o so o se Suesuega Faasaienisi e faatinoina mo le silafia e le atunuu lautele aemaise o leAufaipisinisi, aua o i latou tonu ia o lo o i ai le talitonuga mo le gafataulimaina o le faaogaina o ia fuafuaga, e gaosia ai ni oloa**

i le lumanai. E tatau foi ona silasila le Faalapotopotoga i le galulue faapaaga ai ma ni Pisinisi Tumaoti mo le tuuina atu i ai o le tulaga tau maketi.

2. Silasila i ni aiaiga talafeagai mo le faatulagaina o ni totogi o ni inisiua tau soifua o le Aufaigaluega aemaise ia i latou o faafoeina suesuega faasaienisi, ona o lamatiaga i o latou soifua i le faatinoina o ia suesuega.
3. Tatau ona faamalosi le galulue faapaaga o le Faalapotopotoga ma le Pulega o le Suavai ma le Matagaluega o le Soifua Maloloina i le suesueina o suavai taumafa ma so o se ituaiga taumafa tuuapa o lo o auina mai i totonu o le atunuu.
4. Tuuina atu le lagolago mo le faatauina mai o se afi eletise mo le Faalapotopotoga, ona o le tele o masini o lo o faaaogaina i suesuega faasaienisi, e manaomia le faaaoga i totonu o le 24 itula.

#### **IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.34, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe na faaiuina aso 30 Iuni 2010.”**

*Na faamaonia le Lipoti e aunoa ma ni Felafolafoaiga.*

#### **P.P.2013/2014 NU.64, LIPOTI A LE KOMITI O AOGA, SAIENISI, FESOOTAIGA MA FAAMATALAGA TEKONOLOSI i LE P.P.2011/2012 NU.56, FUAFUAGA AUTASI A LE FAALAPOTOPOTOGA O SUESUEGA FAASAIENISI A SAMOA MO LE VAITAIMI 2012-2014 - ILOILOGA**

#### **Tofa LENATAI VICTOR FAAFOI TAMAPUA:**

##### **“FAUTUAGA:**

I le maea ai o ana iloiloga, e fautuaina e le Komiti le Malo ina ia:-

1. Faamalosi le galulue faapaaga o le Faalapotopotoga ma le Matagaluega o Faatoaga ma Faigafaiva, ina ia mautinoa le maua pea o alaoa (raw materials) moomia e pei o ulu, avoka, manioka ma isi, mo suesuega faasaienisi a le Faalapotopotoga.

2. Unaia pea le faatinoina o Polokalame Faalauiloa e faalauiloa ai taunuuga o isi suesuega faasaienisi ua maea ona faatinoina, mo le silafia e le Vaega Tumaoti po o tagata taitoatasi e gafatia le faatautaia o ni pisinisi e faaaogaina ai Faaiuga o ia suesuega.\
3. Fautuaina le Faalapotopotoga ina ia galulue faatasi ma le Sosaiete o Taulasea Samoa i a latou suesuega o lo o faagasolo mo laau Samoa e i ai le mafai gafatia mo le atiaeina o vailaau gaosia mo le togafitia o gasegase, ma amanaia ai ia vailaau faalenatura (Samoa) e tusa o aiaiga faamaonia o tulaga aloaia o agavaa faava o Malo o suesuega faasaienisi.
4. Fautuaina le Faalapotopotoga ina ia uunaia malosi ana auaunaga faa-Faufautua ma suesuega faalotoifale i le galulue faatasi ai ma isi Matagaluega ma Faalapotopotoga Tumaoti a le Malo po o le Vaega Tumaoti, e fesoasoani ai i ana tupe maua e lagolago ai le faatupeina o ana suesuega o lo o faaauau pea.

#### **IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.56, Fuafuaga Autasi a le Faalapotopotoga o Suesuega Faasaienisi a Samoa mo le Vaitaimi 2012-2014.”**

*Na faamaonia le Lipoti e aunoa ma ni Felafolafoaiga.*

**P.P.2013/2014 NU.123, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI i LE P.P.2012/2013 NU.11 MA LE P.P.2012/2013 NU.39, LIPOTI FAALETAUSAGA A LE FAALAPOTOPOTOGA O SUESUEGA FAASAIENISI A SAMOA MO LE TAUSAGA FAALETUPE 2010/2011 MA LE TAUSAGA FAALETUPE 2011/2012 - ILOILOGA**

**Tofa LENATAI VICTOR FAAFOI TAMAPUA:**

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:

1. Faatautaia ni polokalame faalauiloa a le Faalapotopotoga e faailoa atu ai i le atunuu lautele nisi o oloa fou ua mafai ona gaosia, ma faailoa atu foi ituaiga ala’oa faalenatura escese o lo o moomia ai le

lagolago a le atunuu i le galueaina, ina ia mafai ai pea ona maua i totonu o Samoa ala'oa mo le gaosia o oloa eseese, mo faamoemoega o oloa auina atu i fafo, aemaise o le faaitiitia ai o oloa taugata auina mai fafo.

2. Faamalositia le galulue faapaaga o le Faalapotopotoga mo le Pulega o le Suavai, Matagaluega o le Soifua Maloloina, Matagaluega o Faatoaga ma Faigafaiva i le faaauau ai o galuega suesue faasaienisi i le tulaga o le mataituina o le suavai mama ma taumafa maloloina mo le atunuu lautele.
3. Silasila le Faalapotopotoga i nisi avanoa talafeagai e ono mafai ona maua ai ni Paaga faava o Malo i le tulaga i tomai o suesuega faapitoa ma suesuega faasaienisi mo le faalauteleina o le tomai i le Faalapotopotoga mo le faaleleia o ana auaunaga mo le manuia o le atunuu.
4. Faamalositia le uunaia malosi o le Faalapotopotoga mo le siitia o ana auaunaga e ala atu i Fonotaga faatino i le atunuu ma le Pasefika i vaega tau suesuega faapitoa ma suesuega faasaienisi. O se tulaga e le gata i le siitia ai o lana auaunaga ae e fesoasoani foi i le itu tau tupe mo le faatinoina o ana gafataulima.
5. Silasila le Faalapotopotoga i le faaleleia o le faatinoina o ana auaunaga faafaufautua o lo o faipaaga ai ma isi Matagaluega ma Faalapotopotoga a le Malo ma Vaega Tumaoti, ina ia siitia ai ana tupe maua e fesoasoani ai i ana galuega faatino ma lagolago ai foi i fesoasoani a le Malo e ala i le vaegatupe faatatauina i tausaga faaletupe taitasi.

#### **IUGAFONO:**

I le maea ai o iloilogaga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.11, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2010-2011, ma le P.P.2013/2014 Nu.39, Lipoti Faaletausaga a le Faalapotopotoga o Suesuega Faasaienisi a Samoa mo le Tausaga Faaletupe 2011-2012.”**

**FOFOGA FETALAI:** E tolopo le tatou Galuega i le aso Fono ananafi ua maea ona saunoa le Taitaifono i mataupu tau aoaoga i P.P.2013/2014 Nu.62, P.P.2013/2014 Nu.64 ma le P.P.2013/2014 Nu.123.

*Na faamaonia le Lipoti e aunoa ma ni Felafolafoaiga.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo

mo le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

**P.P.2013/2014 NU.63, LIPOTI A LE KOMITI O MATAUPU TAU AOGA,  
SAIENISI, FESOOTAIGA MA FAAMATALAGA TEKONOLOSI I LE  
P.P.2011/2012 NU.55, LIPOTI FAALETAUSAGA A LE IUNIVESITE  
AOAO O SAMOA MO LE TAUSAGA 2009/2010**

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai, avea lenei avanoa ou te faatalofa atu ai i lau Afioga, le Afioga i le Sui Palemia ma le nofo a Minisita o le Kapeneta. E faatalofa atu foi i le Taitai o le Itu Agai, le Sui Taitai ma sui usufono uma o le Palemene o Samoa. E faatalofa atu foi i Ofisa Sili o Pulega ma Pule Sili o Matagaluega ma Faalapotopotoga aemaise foi o Sui Sinia ua tatou faatasi i lenei taeao, aemaise foi e ua mafai ona aofaga potopoto mai i le tatou Fonotaga.

O le faatalofa faapitoa i le tapuaiga a le itumalo pele o Vaimauga Sisifo, tainane foi le faafofoga mai a le mamalu o le tatou atunuu. Malo le soifua maua ma le lagi e mama i lenei taeao fou ua agalelei mai ai lo tatou Tama o i le lagi.

Lau Afioga i le Fofoga Fetalai, out e faatu le lafo, *Ina ia faautagia e lenei Fono Aoa Lipoti a le Komiti o lo o tuuina atu ai ana SAILLILIGA, FAUTUAGA ma IUGAFONO.*

*Faaluaia e le sui usufono mo Palauli, sui usufono mo Falelatai ma Samatau, sui usufono mo Sagaga le Falefa ma le sui usufono mo Aiga i le Tai.*

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai:

**“FAUTUAGA:**

I le maea ai o ana iloiloga, e fautuaina e le Komiti le Malo ina ia:-

1. Ave le faamuamua i galuega talafeagai mo le foia o faafitauli ua taua i lalo o lo o taotaomia ai galuega e lagolago ai le atinae o aoaoga i totonu o le Iunivesite.
  - Moomia ni potu suesue faapitoa e faatotogaina i masini komepiuta ua faapolokalameina i polokalame tau komepiuta, polokalame tau tausitusi, polokalame faapitoa, polokalame tau initaneti ma polokalame mo aoaoga e faatinoina i luga o upega tafailagi (DFL), mo suesuega a alo ma fanau. Molimauina le toatele o nai fanau aoga ua sulufai solo e saili fesoasoani mo ni masini komepiuta e fai ai a latou suesuega faapea le taina o a latou meaaoga.

- Moomia le faalateleina o potu komepiuta o lo o i ai nei ona ua siitia le aofai o tamaiti resitala amaise ai o le tele o mataupu, e moomia le faaaoga o potu komepiuta;
  - Moomia nisi potu avanoa po o se nofoaga e malolo i ai tamaiti ma fai ai a latou meaaoga, ina ia taofia mai ai le feoi solo e tau saili se nofoaga paganoa ma le toafilemu e suesue ai a latou meaaoga;
2. Lagolago i le faia o nisi afi faaleoleo po o le fausia o nisi auala e gaosi ai le eletise e pei o le malosi o le la, ina ia fesoasoani ai i tupe totogi a le Iunivesite ma faasaoina ai nisi vaegatupe mo isi o ana galuega faatino.

#### **IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao:

**Ina ia faamaonia le P.P.2011/2012 Nu.55, Lipoti Faaletausaga a le Iunivesite Aoao o Samoa mo le Tausaga Faaletupe na faaiuina aso 30 Iuni 2010.”**

**P.P.2013/2014 NU.96, LIPOTI A LE KOMITI O MATAUPU TAU AOGA, SAIENISI, FESOOTAIGA MA FAAMATALAGA TEKONOLOSI I LE P.P.2013/2014 NU.20, LIPOTI FAALETAUSAGA A LE IUNIVESITE AOAO O SAMOA MO LE TAUSAGA FAALETUPE IULAI 2012 I LE ASO 30 IUNI 2011 – ILOILOGA**

#### **Tofa LENATAI VICTOR FAAFOI TAMAPUA:**

##### **“FAUTUAGA:**

I le maea ai o ana iloiloga, e fautuaina e le Komiti le Malo ina ia:

1. Silasila i ni auala talafeagai e faaleleia ai auaunaga o lo o manaomia e tali atu ai i aafiaga ona o le siitia pea o le aofai o tagata aoga i totonu o le Iunivesite i le Papa-i-galagala e pei o le;
  - Moomia le faalateleina o le potu tusi (library), potu komepiuta ma potu aoga mo le faaleleia o auaunaga tau aoga mo polokalame tau suesuega i totonu o le Iunivesite.

- **Moomia le faaleleia o auaunaga tau initaneti (wireless) mo aoga ma suesuega a alo ma fanau o lo o aotauina i le Iunivesite.**
- **Moomia le faaopoopoina o se tagata agavaa ma o lo o i ai ni ona faailoga taualoa mo le auaunaga i le vaaiga o mataupu e patino i alii ma tamaitai aoga, o pae ma auli (Counsellor).**

#### **IUGAFONO:**

I le maea ai o iloilogia a le Komiti na faaiugafono ai e fautuaina le Fono Aoao:-

**Ina ia faamaonia le P.P.2013/2014 Nu.20, Lipoti Faaletausaga a le Iunivesite Aoao o Samoa Iulai 2010-Iuni 2011.”**

**FOFOGA FETALAI:** Malo faafetai i lau Afioga i le Taitaifono mo le folasaga matagofie. Ua avanoa le Maota mo le felafolafoaiga.

Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai. E faatalofa foi i le paia o le Maota o Samoa aemaise foi o le faafogafoga mai a le tatou atunuu. Ia, ua tea foi na fatia ua sola i le taumafai atu o lenei Itu, ae leai o le naunautauga lava i a tatou galuega ma le faatinoina o tatou tiute. Na pau lava le mea sa ou tau tulai atu ai lau Afioga i le finagalo o le sui usufono matua o le Maota e faapea e fai ma tutuli i fafo pe a... Na pau lava lena o le mea e faanoanoa ai lou sui usufono. E le faafefea faapena le Itu lenei, e le faapena le faiga o le tatou galuega, ae ou te le fefe i na mea. Ma le faaloalo lava.

**FOFOGA FETALAI:** Malie ia le sui usufono mamalu, o lea ua tea sia fuilauvi. O lea lava tou te silasila i le mea o lo o taumafai atu ai le Fofoga Fetalai, ina ia lalago ma tausia le filemu i le tatou Fono, ae faatea lea mea ua uma le taimi.

**Tofa LEALAILEPULE RIMONI AIAFI:** Faafetai. Lau Afioga, o se manatu i lenei Lipoti taua ua tuuina mai. O le Iunivesite, o se miti lea a lenei Malo ua tulai mai ua aoga tele mo le atunuu e aotauina ai le tele o tatou alo ma fanau, ua mulimulitai ai i ana sini autu ina ia ao Samoa. E momoli atu ai le faafetai i lenei atinae taua.

Muamua, a e malaga i le Iunivesite i le po, e pogisa atu lava le auala e tau i tua ae o lo o feoi nai tamaiti ua tuua aoga aua e tele ina tuua aoga i le po, e leai ni moli auala, e oo i totonu o le Iunivesite, e le sefe ma e le saogalemu, e le lava moli e faamalalama ai le Iunivesite i le feoi ai o tama ma teine aoga. O le vaega muamua lea e tatau ona toe tagai i ai le Komiti.

O lea na fautua mai le Komiti i le Lipoti 2010/2011, o lo o faapea mai, e moomia se afi faaleoleo ona o le tele o masini ma le tele o meaaoga o lo o faatino e ao ona puipui. O lau fesili la lau Afioga i le Taitaifono i le Lipoti lea e sosoo ai, po ua mafai ona faatino lea vaega, aua ou te faapea au, o se mea lea e le tau fesiligia o le mea taua e tatau lava ona faatino faatasi ma le Iunivesite. Ua leva ona tatau ona faatino se tulaga faapena. A o lau fesili la i lau Afioga, po ua mafai ona faatino lea vaega taua sa outou fautuaina i le isi Lipoti, fua i le tou Lipoti lea e sosoo mai.

O le isi a outou Fautuaga lea e tuuina mai, o se tagata faapitoa, se Counsellor. O lea la ou te fia fesili, faapea lava au ia o nei mea o tofiga e aloaia uma i Iunivesite uma o le lalolagi ua leva ona tatau ona i ai, po o le mea e le o i ai se isi, po o le mea o i ai se isi ae le talafeagai lona faailoga fua i le tou fautuaga lea e aumai. Aua e moomia tele, tasi lenei avanoa e moomia tele i totonu o Iunivesite, o se tagata faufautua faapea e fesoasoani i a tatou fanau.

O le isi fautuaga lea e tuuina mai i Lipoti uma nei e lua, o le tulaga e moomia i le faaleleia o potu ona o le faatupulaia o le fuainumera o le Iunivesite ua i ai nei. Ona avatu ai lea o le fesili e masani ona laugaina i totonu o le Palemene lenei, o le faatupulaia pea o le faitauaofai o i latou e ulufale i le Iunivesite. O se ata lelei lea pe a fua i e o ulufale, ae o se isi tulaga e tatau ona tagai manino i ai, po o fea la o lo o agai i ai le toatele lea. O fai se survey, o fai se fuafuaga foi lea tuutumamao po o fea e uma o i ai le toatele. Afai e 600-700 tamaiti ia e ulufale, aua o le mea mautinoa, pe na o se 100 pe a, e 50+ e maua avanoa mai fafo, ma se isi 50 i inei, ma nai isi tamaiti i nisi avanoa o i ai. O le fesili la; o fea la lea e faaauau i ai le isi 400 pe 300+ lea, o fea o agai i ai i ni a outou suesuega. Aua sa fesiligia e matou i le tuanai le mea o le entry requirement foi lea, le maka lea e ulufale ai i le Iunivesite, le 1-15. E le tele tele, pe lei maualalo tele lea tulaga. E ese la le 1-15 lea ona 16 lea agai i le 18 ea pe fia e o i le FOE, le mea foi lea o le Aoga Faafaiaoga, ona sosoo atu ai lea ma i latou e ulufale i le aoga faatausisoifua. Pe le toe i ai ni fetuunaiga i lenei mea, aua o le pili mo le silafia e lau Afioga ma le mamalu o le Maota, aua ia manatua tamaiti tatou lea ua faamasani i le mea foi lea o le aoga fua, faatoa totogi i luga i le Tausaga 12 i nai pili laiti ma le tausaga 13. Ia e oo atu loa i le NUS, toetiiti lava 2,000, e 2000 lava i le semester e tasi. E le taugofie. E le o pili la lea ou te fai atu ai, aua o le tasi lena mafuaaga e ala ai ona le faaaogaina isi tamaiti, ae sei fetuunai, aemaise i le mea lea e fai ma atugaluga o le Malo i le taimi nei i faiaoga ma teine tausisoifua i le tulaga foi lea o latou e ono o i a ii lea foi profession taua. O lea ua aumai le faasalalauga a le Iunivesite ma le PSC, faapea e fai na o degree i mea nei o faiaoga. Ia o se faaaliga vaivai tele. Ae a faapefea la ona fai le degree a le tamaitiiti lea e alu atu i le entry requirement lea e 16 agai i luga? E faapefea ona alu atu sao fai le degree? A o lau fesili; e le toe aoga le Diploma? O vasega lava ia i lalo i Primary Schools ma vasega i lalo ane, ailoga e moomia ai lea faailoga maualuga faapea? Aua afai e maualalo tele le maka lea e o ai nai ia foi tamaiti i le FOE, ua tatau ona toe silasila i ai, o i ina e amata ai ona fetuunai, e tatau ona tuu mai i lalo le requirement lea e o ai i totonu, ina ia maua i latou e lava le tomai ma



lelei le aoaoga e o sao i le mea lea o le faafaiaoga. Aua tasi lena fesili e toe fesili ai, afai e 200 pe 300 tamaiti ia i le FOE e iu mai tai 50 tai 60 i le tausaga, o le fesili la; o fea o o i ai? O fai ni suesuega o fea o o i ai nei tagata a o lea e lipotia mai le sioiti o faiaoga i tausaga uma tausaga uma? Aua sa faia foi e le Iunivesite se isi o auala faafaigofie lea e faapea e fast track ai faiaoga, o se auala foi sa faatino i lea foi tausaga ua tuanai atu, o lea vaai atu e le o tino mai ma lelei, o lea ua toe taofi. A o fesili na lau Afioga; o lea tatou te mananao ia galulue i faiaoga ma nursing ma mea faapena, ae tataua ona tatou tilotilo i entry requirements ia i maka ia tatou te o a ii totonu o le Iunivesite pe faapefea ae po o lava la resources, po o lava mea e faatino ai aoga a tamaiti, aua e le aoga le toatele ma le saga avatu pea, a o lea e matua tulai mai ma atagia mai i Lipoti nei e lua le moomia o ni fale fou, fale tusi ma le tele o ni mea e moomia mo le Iunivesite, e ao ona faatino ma faaleleia mo le agai i luma.

Lau Afioga i le Fofoga Fetalai, e faamalulu atu foi i le tuanai, leai ua uma foi lena taimi, ae faafetai lava mo le avanoa, i nai manatu e tuuina atu aua leni Lipoti. Ma le faaloalo lava.

**FOFOGA FETALAI:** Malo lava mo le saunoaga a le sui usufono mamalu mo Faleata Sisifo. Ia, e faatuatua atu foi le sui usufono mo Faleata Sisifo, o le agaga ma le faamoemoe e malu le Nofoa i lena Itu o le Maota. O a foi tiuga ma saunoaga i leni taeao, ia faatea o lea ua agai i luma le tatou Fono.

Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu.3):** Faafetai lava i lau Afioga i le Fofoga Fetalai, faafetai atu foi i le Taitaifono ma le Komiti sa faafoeina ma talanoaina leni mataupu.

E tasi lava se vaega lau Afioga i le Fofoga Fetalai, ou te talitonu e taua fautuaga o lo o tuuina mai e le Komiti. Na pau le vaega ou te fia maua ai se malamalamaaga lau Afioga i le Fofoga Fetalai, i suesuega ma iloilogaga a le Komiti pe sa mafai ona tagatagai i le eseeseaga o le pau o tamaiti e o atu i totonu o le foundation year, pe fia tamaiti e i ai i le foundation year ma tamaiti e pasi ona o lea i le first year o le degree.

O le uiga o lea faamatalaga lau Afioga, e pei ona taua foi e nisi o sui usufono, pei o lea ua toatele lava tamaiti o lea ua pasi mai aoga i tua i le suega lea o le UE, ae oo atu i ai e maitauina o le tele o tamaiti ia e le o mafai ona faaauauina, e uma ifo le foundation year ua toatele ina pauu ua le mafai foi ona faaauauina, e le gata i le taugata o pili, ae ua le mafai foi ona maua maka e vaavaai ai.

Ona oo mai lea lau Afioga i le Fofoga Fetalai i se tuualalo, atonu e silasila i ai le Iunivesite, ina ia faaoga la, aemaise lava i vaega ia, i tamaiti ia i le foundation year lea e le o mafai ona pasi e o i degrees, pe mafai ona tagatagai i tamaiti ia ina ia mafai ona tuu i lalo o isi polokalame lea e maualuga le latou entry tai pei o le Education, o le Nursing ma le Polytech, ina ia aua nei le pasi loa i le alu e ave le BA po o le BSC, alu ese loa ma lusi le avanoa o ia tamaiti. Pe mafai ona

tagatagai i ai e faaaoga i le Education atonu e maualalo le entry point, afai o lea na maualuga ma lelei maka i le UE, e taua foi latou mo isi faculties ia.

O le fesoasoani atu lea lau Afioga i le Fofoga Fetalai.

**FOFOGA FETALAI;** Malo faafetai saunoa i le sui usufono mamalu. Tulai mai se tasi o sui usufono mo Salega, Afioga Afualo Wood Uti Salele.

**Afioga AFUALO WOOD UTI SALELE (Salega):** Faafetai atu i lau Afioga i le Fofoga Fetalai mo le avanoa. E faatalofa atu foi i le faafogafoga mai a le atunuu i lenei taeao totoa ma le manino. O foliga vaaia ia ma le molimau lea o le alofa o le Atua i le tatou atunuu aemaise foi le faamalumu mai o ona aao alofa i le Palemene ma ana Fonotaga.

Ae agai sau faamatalaga lau Afioga i le Fofoga Fetalai i le Lipoti taua lea, e faafetai atu foi i le Komiti e tusa ai o le maeaea o sailiiliga ma fautuaga lea ua taoto nei i le Maota. Ae i le vaavaai i ai ma le faalogologo atu foi i fautuaga, atonu lava o fautuaga e lua lea e agai i le lava o le avanoa lea e faaaoga e alo ma fanau, aua o lea e faatuputupulaia pea le toatele o alo ma fanau ae le gata i lea o tamalii foi ma failauga o lea e faaaoga le Iunivesite Aoa o Samoa e utuvai i ai mo le poto salalau.

O se faafetai faapitoa lea i le Malo ona o lenei manulauti, aua e moni lava, o le upu moni lava o le Iunivesite, o upu a ia a toeaia o le tautua lilo, tautua matavela pe faa-Peretania foi o le silent achiever, a fua ma silasila i totoga eseese o le tamaoaiga e afua mai e le gata i le Malo, o Ekalesia, e oo lava i tua i Faalapotopotoga ma pisinisi tumaoti faapea foi i pulega a nuu ma faipule, o le ivitu lea ua tua i ai le atunuu i le sailiiliga o le poto aoaoina ma le poto salalau. E moni o lea e o le fanau a le atunuu foi e saili mai le isi vaega ma faalatele le latou tomai i isi atunuu, ae pei o le Iunivesite Aoa o Samoa.

O le isi vaega e momoli atu ai le agaga faafetai, o lea ua avea nei le OUM ma le isi aoga taua o le Iunivesite Aoga Faafomai. O le tele o Iunivesite e leai ni latou aoga fomai, e moni e tau o le Iunivesite ae o le taimi nei ua atoa tino o Vaatausili i le Iunivesite Aoa o Samoa, ua le gata ua i ai uma le tele o le poto salalau lea e aoaoina, ae o lea ua toe faaopopo atu ai ma lenei vaega sili ona taua e tali mai i manaoga e tusa ai foi o le auaunaga faa-Soifua Maloloina. E le faigofie la mo le Iunivesite, aua o nei mea uma e faalagolago uma i luga o le tamaoaiga, a o lenei lava ua agai lava i ai ina ia mautinoa lelei ua tulai mai le tali atu i manaoga o le atunuu. E le gata la ni le poto salalau ae faapea foi i le putiputiina ma faaleleia le auaunaga e tusa ai foi ma le Soifua Maloloina. O lea faatoa maea atu foi ona tatala le itu i lou itu tauagavale, o lea faatoa uma ona tatala le aoga a le Marine. Faafetai foi i le Malo o Saina i lea fesoasoani. O vaega uma nei e tau mai ai, o lenei lava e tupu le tama, e tele laei lea ua vaavaai atu i ai, o lea ua fesuisuia mai laei o le tama, ae o laei uma nei ina ia mautinoa lelei ua saogalemu le ola faifaiae o le atiaeina o le atunuu. Aua e moni lava o mea uma lava, ae o i lava i aoga o le fatu autu lea, o le fatu autu lea i so o se atunuu i so o se tamaoaiga, ae le gata i lea o le atiaeina o le fatu aiga tausii, aua o le tele o poto salalau nei e toe foi itua e

tauta aiga, nuu ma Ekalesia ae faasilisili ai le atiaeina o le tatou atunuu e ala i tofiga a le Malo.

I le tulaga lea i le vaai i ai i fautuaga lea e i ai, aemaise lava lea e mamafa le isi vaega tele o le fautuaga i le lē lava o le avanoa mo le library po o le faletusi, a o lea foi e maua faamatalaga o lea o le a tapena le isi laasaga tele o le tuputupuaga o le Iunivesite po o le vaega lea e taua o le culture center ina ia silasila i ai le Komiti, e tatau... a faapea o la outou fautuaga lea e i ai, e tatau ona ave le faamuamua ia faalelei le faletusi, aua o le upu moni lava, e feomai solo alo ma fanau. A outou susu foi i ai, o le fatu atoa lea o so o se aoga lava ma so o se Iunivesite, ia lelei ona lava tapena se nofoaga e mafai ona ofaga uma i ai alo ma fanau, ae le gata i lea o i latou uma lava, aua foi o i lea e tausī ai le poto salalau lea. O lea foi e aumai fautuaga, e lua fautuaga lea e aumai sosoo e agai lava i le lē lava o masini faapitoa ia po o computers, e sao lelei, e matua lē lava lava. E tatau ona fai ia lelei aua o le tulaga la e i ai, e fai o le tausaga faavae ae o le tele o isi polokalame o le tipiloma faapea foi ma le tikeri, la foi ua agai le Iunivesite i isi faailoga i luga atu o le Master ma le PhD, o lea ua amata le fomai o le tofamanino. O le autu atoa o le faletusi, e le mafai la ona tapena isi fuafuaga ia ae tatau ona fai ia lelei, ina ia mautinoa lelei ua maeaea ona tali atu i le tomai lea, aemaise o lea ua ola le tama. Ae faanoanoa pe afai ua ola le tama ona uma lea ua sau fealualuai solo ae leai se mea e alu i ai, a o ona aiga ia e tua i ai, o aiga tausī ia, ia lelei le computer lab ona mautinoa lea e ia, aua a lelei uma totoga nei, e mafai foi ona tosina mai ai ma e ua i ai le poto faapitoa latou te aoaoina, ona tali mai ai lea i manaoga mo a tatou fanau ma tali atu foi. Aua o le tulaga lea e i ai le OUM, e tele na faaoga le tomai lea o le internet po o le upega tafailagi, e tatau foi la...O le taimi nei o la e malupuipua ma lelei le faatinoina o aoga fomai, ae manaia tele ae faapea se fautuaga e agai i ai la outou Komiti, ina ia mautinoa lelei ua tofusua alo ma fanau, o tamalii foi ma failauga o lo o autovaa i le Iunivesite

O le vaega mulimuli lea sa ou tilotilo atu lava e le o aafia i lalo o la outou fautuaga, o le taugata o le pili o le Iunivesite. Faafetai i le Malo ona o lea e i ai le fesoasoani, lea o lo o i ai le sikolasipi, ae tatau ona fautua malosī i nisi auala e mafai ai ona toomaga le toatele oi matou. Aua o le upu moni lava, masalo o tatou uma o sui usufono ua sulufai mai ai tatou nuu, ae leai ni faletupe ia i tatou. E tatou te o lava la e taumafai e sue le fesoasoani aua le lumanai lea. E leai se isi lumanai itua atu o aoga, o le lumanai lea o tatou aiga, ae le gata i lea o nuu ma alaafaga. Ina ia silasila totoa i ai ia mautinoa lelei ua tulai mai se faiga faavae, e le gata o fesoasoani e avatu e le Malo e ala i sikolasipi, ae ia i ai se isi auala e mafai ai ona maua se isi fesoasoani e aoga ai le tama ma le teine aemaise i latou e le gafatia, aua o le upu moni lava, e leai se mea o i ai i le toatele o la e mafai ona maua pe tua i le vao ola, ae o le tele e le mafai, aua a tasi le tama ma le teine e au mai tua, o se fiafiaga sili lea i le tele o aiga. O le upu moni lau tala lea e fai atu, afai foi la e mafai e le tama ma le teine lea, ma fai le tamaoiga ona faamanuia ma uma le aoga e matala uma le faamanuiaga mo le toatele o le aiga atoa lea e i ai. O se galuega foi ua ou tilotilo pea i ai, aemaise foi o lau vaavaai i lou itumalo e taumafai pea matou te galulue ma le Komiti o kolisi la e i ai, aemaise foi o

tulaga lua ina ia mautinoa lelei ua maua le faamanuiaga lea mo tagata uma. E le mafai ona tatou faia ni tulafono e siitia ai le tamaoaiga ae afai e le siitia le ola aoaoina e le taunuu le manulauti a le tatou Malo ma i tatou uma.

O lau fesoasoani atu lea i le Komiti, ae faafetai tele mo galuega faatino, faafetai foi i lau Afioga i le Fofoga Fetaloi. Ia faamanuia mai le Atua i le tatou Fono, faafetai.

**FOFOGA FETALAI:** Malo faafetai, o le a avatu le avanoa mulimuli i le sui usufono mo Falelatai ma Samatau ona tali mai ai lea o le Taitaifono, tulai mai le sui usufono mo Falelatai ma Samatau.

**Afioga TAEFU LEMI (Falelatai ma Samatau):** E momoli le faafetai i lau Afioga i le Fofoga Fetalai i lenei taeao, le taeao manino ma le taeao totoa, le taeao foi ua tatou molimauina ai le agalelei ma le alofa o le Atua. Na pau lea o le agaga e momoli atu le faafetai tele i lau Afioga i le Fofoga Fetalai, malo faatoatoa. Faafetai foi i le Taitai o le Itu Agai ma le Sui Palemia aemaise foi o sui usufono matutua o le Maota i lenei taeao i taualumaga o le faasologa o le tatou galuega malo lava.

Lau Afioga i le Fofoga Fetalai, e tele atinae lelei a le tatou Malo ua faatino mai lava i le amataga, faafetai foi i o tatou tuua ua fai i lagi le folauga, i le maemae foi ma le maelega e taumafai si o tatou atunuu. O le tasi lea atinae e sili ona lelei lau Afioga i le Fofoga Fetalai, e momoli ai lau faafetai tele i le Malo e tusa ai o lenei faamoemoe. E i ai le manatu ua toatele nisi o si o tatou atunuu ua oo le taumafaiga i mea nei o Iunivesite, talu ai ona ua fai lava si a tatou Iunivesite e pei ona silafia, e le faigofie, e le o tatou uma foi e avanoa mo lea vaega o le aoaoga o le soifuaga, ae faafetai ua fai le Iunivesite o si o tatou atunuu e faaoga e o tatou tagata, alo ma fanau a si o tatou atunuu, e momoli atu ai le faafetai i lau Afioga i le Fofoga Fetalai e tusa ai o lenei Lipoti.

E faamauiina foi le faafetai i le Afioga i le Taitaifono ma le Komiti, ia ua 30 tausaga o le Iunivesite. Lau Afioga i le Fofoga Fetalai ua 30 tausaga talu ona faavae, e le o se taimi laitiiti, pau le mea lea ua tatou maua nei, o lea lava e tauatai, o lea e taumafai, e auau lava maa. O le mea lea e momoli ai le agaga faafetai tele i Iunivesite aemaise o le Pulega e tusa ai o le taumafai pea, taumafai pea e tulimatai le tatou faamoemoe ina ia manuia alo ma fanau o le atunuu. Sa taumafai lava e saili, aua o le tausaga 2006 sa faaipoipo ai le Iunivesite ma le Aoga o le Matata Esee, sa tau tulimataia le Lipoti pe i ai se vaega e ono agai i le vaega lea o le IOT po o le vaega faa-Matata Esee. E i ai nisi e faitau e eseese le natura o aoaoga ia, e pei o aoaoga maualuluga o tikeli ma tulaga faapena, aemaise foi o lea vaega faa-Matata Esee, e fai lava si malos tele o le silafia moomia e faaoga ai lima po o aao o meafaigaluega ma tulaga faapena i le vaega o Matata Esee. E manaomia foi totoga po o vaega foi lea e faataitai ai aoaoga po o tulaga e aotauina ai alo ma fanau. E pei o le itu lea e sili ai ona taugata le vaega lea faa-Matata Esee, ae atonu o lo o laugatasia pea fautuaga a le Komiti ua taofai ai tulaga moomia e pei o le faletusi aemaise foi o le pota faasaenisi ma

tulaga i le initaneti ma auupega tafailagi. E faapena foi ona ou faatauaina e lou sui usufono ia vaega ia, o le faletusi, o le poto suesue o le initaneti. Ua maua lau Afioga i le Fofoga Fetalai faapea foi le Maota, lea tatou te taumafai i le tau o le initaneti ina ia tau maua se faamama avega a alo ma fanau, e taua lava le faletusi ae tai tutusa lava ma le initaneti. E pei o le faitau a le toatele o le au tusitusi, o le faletusi is only as good as the collection its contains, e manaia le faletusi, ae o le lelei o lena faletusi e faalagolago i tusi la e i totonu, aepeitai o le initaneti, upega tafailagi e matua tele resources la e i ai e ono toomaga ma faaaoga e alo ma fanau i lo latou foi taumafai.

Lau Afioga i le Fofoga Fetalai ua ou taua le vaega lea o le taumafai a le Iunivesite, e taumafai e sefe ana seleni ma faatupu foi savings e fesoasoani i le utiuti o le faaso. O le Iunivesite o la e i ai le latou aso lanu uliuli po o le Black Friday e tape ai le paoa ae taumafai e faaoga le malamalama ua foaiina mai e le Atua e ala i le la. E ao lava ona momoli le faafetai i le Iunivesite i ia vaega ona e taumafai e sefe le paoa ma taumafai e faaoga le malamalama ua maua i lena aso, o le auga lava ina ia maua se sefe ma tau faasoaso a foi le seleni utiuti ua maua. A o le agaga lena lau Afioga i le Fofoga Fetalai.

O le tatou Iunivesite o lea ua tatou toomaga i ai, e maua mai i ia tama ma teine e tautuaina le tatou atunuu e ala i le tomai ma le poto salalau. E tatau foi ona silasila le Iunivesite i vaega e ave i ai le faamuamua, polokalame e ave i ai lana faamuamua, o lea ua tatou maua. O lea ua saunoa foi nisi ua i ai tatou aoga faafomai, aoga mo faiaoga ma tulaga faapena.

O le uiga o le faamatalaga lau Afioga i le Fofoga Fetalai ia ave le faamuamua i vaega e tatau ai, ia silasila totoa pea i le atinae o le atunuu ma vaega e sili ona moomia ai le fesoasoani e i ai le tatou Human Resources Development Plan mo le tatou Malo e taulamua ai le PSC, ae ua aliali mai i mea o lo o tutupu mai nei e foliga mai e le o talanoa le PSC ma le Iunivesite i le tulaga tau faiaoga lau Afioga i le Fofoga Fetalai. O lea ua agai le PSC e faatino foi aiaiga e tatau ona litaea le faiaoga i le taimi e tatau ona litaea ai, ae agai foi le Iunivesite e fai ana faaiuga, o tamaiti uma faafaiaoga ua iu mai i le diploma e omai loa e fai le degree, ae peitai o lena faaiuga ua o faatasi uma faaiuga a le Iunivesite ma le faaiuga a le PSC e faamalolo i latou ua ausia tausaga. O le mea ua tupu lau Afioga, ua leai ni faiaoga fou e faaopoopo i tatou faiaoga ae ua toese se vaega tele lava o i latou ua ova tausaga mai tausaga faatapulaaina. O le agaga lea lau Afioga i le Fofoga Fetalai ona e foliga e le o fesootai vaega ia e lua. Sa tatau ona talanoa ina ia tau tuumamaina ai le avega lea ua oo nei i ai a tatou aoga. O le mea la lea ua tulai mai ua tau utiuti a tatou faiaoga ma ua leai ni faiaoga i tua i nai aoga tulagalua. E pei o le agaga sa manaomia ia galulue faatasi le Iunivesite ma le PSC e tau faasoaso ma tau tuu malu le galuega ina ia lava pea faiaoga ma ia faapena ona faatino foi aiaiga a le PSC latou i se tulaga faifai lemu. O vaega ia e ao ona ave i ai le faamuamua e pei ona ou talanoa atu lau Afioga i le Fofoga Fetalai.

O le Iunivesite a le Pasefika i Saute, e moni o lea e tu i Samoa nei le Aoga Faafaatoaga ae tele ai tamaiti o Fiti e omai i le polokalame lea nai lo tamaiti Samoa. O Vanuatu o lo o i ai le aoga o le law po o le School of Law, ae tele atu

tamaiti Samoa e o e fai le law nai lo tamaiti Vanuatu. Perhaps, o le vaega foi lenei o priorities e tatau ona silasila i ai ina ia faatulaga tonu lava ina ia ave le faamuamua i le vaega o lo o i ai le faamuamua. E pei o le isi itu lena na maua mulimuli ane e tatau lava ona tilotilo pea i ai le Iunivesite i lana ia atinae, e faapena foi le tatou aoga lau Afioga i le Fofoga Fetalai, ina ia ave le faamuamua i le tulaga e ao ona faamuamua, ona faapena ai foi lea ona agai i luma ma o faatasi fuafuaga faataatitia a le Malo e ala i le PSC faapena foi le taumafai mai a le Iunivesite latou e aoaoina alo ma fanau ina ia faatumu vaega e sili ona moomia e tusa ai o taiala faataatitia a le Malo e ala i le PSC.

E pei o le fesoasoani lea lau Afioga i le Fofoga Fetalai, faafetai.

**FOFOGA FETALAI:** Malo faafetai i le sui usufono mamalu. Tulai mai lau Afioga i le Taitaifono e tali fuaitau i saunoaga a sui usufono.

**Tofa LENATAI VICTOR FAAFOI TAMAPUA:** Malo faafetai e tusa ai ma fesili aemaise foi o fautuaga ma manatu ua faaalua o nisi o sui usufono e tusa ai ma le Lipoti a le Iunivesite Aoao.

E faafetai tele mo fautuaga ua tuuina mai. E pei lava ona taua, o lenei Lipoti o le tausaga na faaiuina i le 2011. E oo mai i le taimi lenei e i ai nai galuega ua mafai ona faatino. Ua taulimaina foi e le Komiti le Lipoti e faaiuina i le tausaga 2012 ma o le a tulimatai ai foi e le Komiti nisi o fautuaga ma nisi o vaega ua faaalua e sui usufono, ae na o nai vaega ia e pei ona fesiligia i le tulaga lea i le afi. Atonu o lea ua i ai le afi a le NUS e pei ona i ai le latou sailiga tupe lea sa faatino i le tausaga i luma atu.

O le tulaga lea i le Counsellor e taua tele ma o lea sa fautuaina ai la e le Komiti. O le faamatalaga sa faaoo mai i le Komiti e faapea e i ai le Counsellor e toatasi, a o le a taumafai e sue se isi la te toalua. O le Counselor lea o lo o i ai i le taimi lenei, o lo o fai foi le galuega o le faiaoga i totonu o le Iunivesite.

O le vaega lea mo le FOE, e taua tele foi lea vaega ona o lea sa taua e se tasi o sui usufono. Sa faatalanoaina foi la e le Komiti aemaise foi sui o le Iunivesite ona o le taumafaiga lea a le Ofisa o Aoga e tilotilo foi latou i faiaoga o lo o moomia, po o faiaoga science po o faiaoga o isi mataupu, ona taumafai lea e ave i ai le latou faamuamua ae ia maua e le tamaitiiti lea le criteria e pei ona taua o lo o faataatia i le Iunivesite.

O le vaega lea i le OUM, atonu o le isi Lipoti pe a faaoo mai ai se isi faamatalaga e tusa ai ma le merge lea, aua o le merge lea lata mai nei, ae faafetai mo le fautuaga. Ma nisi lava fautuaga sa faaoo mai e le sui usufono mo Falelatai ma Samatau, ua faamalo faafetai. O le a faapena ona tulimatai e le Komiti i le taimi e iloiloaina ai le Lipoti lea ua taulimaina i le taimi nei. Ma le faaaloalo lava.

**Tofa Lealailepule Rimoni Aiafi:** Lau Afioga i le Fofoga Fetalai.....

**FOFOGA FETALAI:** Se i tulai mai le sui usufono mo Faleata Sisifo.

**Tofa LELAILEPULE RIMONI AIAFI:** Faaafetai lava i le Taitaifono mo le taliina o fesili. O le mea lea na ou tulitulia o le mea lea ua agai i ai le Iunivesite i le faiga o faailoga degree i faiaoga.

O le fesili la lea na ou fesili ai, afai ua le toe faatinoina le diploma, o le a la le faiga lea o le a fai ai nei? O le isi mea afai o lea o le a tatou o e tulituli le degree lea e tolu tausaga pe fa tausaga o le a aoga ai le tagata. O lona uiga i totonu o le fa tausaga o le a toalaiteiti pe iu lava ina leai ni faiaoga e toe iu mai. E faapefea la ona foia le tulaga lea e tulai mai nei i le lava o faiaoga? O le a se fuafuaga o fai i ai aua o lea ua te i ua taofi faapea le vaega lea? A faapefea foi la ona o i ai pe a faapea o tamaiti ia e o atu nei i totonu o le Iunivesite e maualalo tele le tulaga lea e o ai i totonu? Pe ua i ai ni fesuiaga lelei foi lea mo le agai i luma?

O le isi mea o lea ua saunoa lau Afioga i suiga ua faatino. Lau Afioga i le Taitaifono, toe tagai i moli ia tatou te talanoa ai, e le o saogalemu le Iunivesite i le leai o ni moli i totonu o le aoga. O moli i le auala e manaomia tele mo le savavali ai o tamaiti ma matua. Ma le faaloalo lava.

**FOFOGA FETALAI:** E i ai se isi tali faapoopo lau Afioga i le Taitaifono?

**Tofa LENATAI VICTOR FAAFOI TAMAPUA:** Faafetai i lau Afioga i le Fofoga Fetalai. O le vaega lea i moli, e sao lelei lava le fautuaga. O lea la ua talia e le Komiti ma o le a faapena ona tulimatai e le Komiti le tulaga lea ona o le pogisa tele aemaise foi o lea o le a uma le tatou daylight saving, o le a vave foi ona pogisa aua leaga o luma o lo matou fale e savavali mai ai le toatele o tamaiti i le afiafi, ae manaia tele le fautuaga.

O le tulaga lea mo le FOE, faafetai foi i le tulaga lea. O le a faapena ona tilotilo i ai le Komiti i lea vaega. E talitono o lo o faafofoga mai foi sui o le matou Komiti, o le a faapena ona matou faasoaina ma talanoaina i le taimi e iloiloaina ai le Lipoti lea ua tuuina mai i le taimi nei. Ma lou faaloalo lava.

*Na faamaonia le Lipoti.*

**P.P.2013/2014 NU.65, LIPOTI A LE KOMITI O AOGA, SAIENISI, FESOOTAIGA & FAAMATALAGA TEKONOLOSI I LE P.P.2011/2012 NU.58, FUAFUAGA AUTASI A LE FALEMELI MO LE VAITAIMI 2012-2014 & P.P.2011/2012 NU.59, FAAMATALAGA O SINI AUTU A LE FALEMELI MO LE VAITAIMI 2012-2014 - ILOILOGA**

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

*Faaluaina e le sui usufono mo Sagaga le Falefa, le sui usufono mo Aiga i le Tai ma le sui usufono mo Palauli.*

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai.

**“FAUTUAGA:**

I le maea ai o ana Iloiloga, e fautuaina e le Komiti le Malo ina ia:-

1. **Unaia pea Polokalame Fuafuaina a le Faalapotopotoga mo faamoemoea ina ia mafai ona faaleleia le tulaga o ana tupe maua, aemaise o lana auaunaga mo le atunuu lautele.**
2. **Fautuaina le Faalapotopotoga ina ia ave pea le faamuamua i le toe tapu'eina o vaega o lana auaunaga e fesootai ma ana matafaioi autu faaletulafono, ina ia faigofie ona taulai i ai le taumafaiga o isi atinae ua fuafuaina mo le toe siitia o lana auaunaga.**
3. **Silasila le Faalapotopotoga i ni auala e faafetaia'ia ai faafitauli o lo o feagai ai i le tulaga o le maketi o fesootaiga ona o le televave o le tekonoosi fou ua ofi mai i Samoa, e pei ona i ai le faaogaina o telefoni feaveai, imeli, initaneti ma isi.**

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao,

**Ina ia faamaonia le P.P.2011/2012 Nu.58, Fuafuaga Autasi a le Fale Meli o Samoa mo le Vaitaimi, 2012 – 2014 ma le P.P.2011/2012 Nu.59, Faamatalaga o Sini Autasi a le Fale Meli o Samoa mo le Vaitaimi, 2012 – 2014.”**

**P.P.2013/2014 NU.100, LIPOTI A LE KOMITI O MATAUPU TAU AOGA, SAIENISI, FESOOTAIGA & FAAMATALAGA TEKONOLOSI I P.P.2012/2013 NU.57, FUAFUAGA AUTASI FALEMELI O SAMOA 2013 – 2015 & P.P.2012/2013 NU.58, FAAMATALAGA O SINI AUTASI – FALE MELI O SAMOA 2013 – 2015  
- ILOILOGA**

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai.

**“FAUTUAGA:**



I le faia i luga o ana Sailiiliga, e fautuaina ai e le Komiti le Malo:-

1. **Ia toe silasila le Kamupani i nisi auala e faatosina ai i le atunuu lautele lana auaunaga, e foia ai le faafitauli sa feagai ai o le tuuitiitia o tagata e faaaogaina le latou auaunaga.**
2. **Ia ave le faamuamua a le Kamupani i lana Poloketi mo Aiaiga o Meli ma saili ai se fofu o le faafitauli e pei ona matauina i meli lafo sese.**

#### **IUGAFONO:**

I le maea ai o le iloiloga a le Komiti, na faaiugafonoina ai e fautuaina le Fono Aoa, Ina ia faamaonia:

1. **P.P.2012/2013 Nu.57, Fuafuaga Autasi Falemeli o Samoa 2013 – 2015;**
2. **P.P.2012/2013 Nu.58, Faamatalaga o Sini Autasi Falemeli o Samoa 2013 – 2015.”**

**FOFOGA FETALAI:** O le a tatala atu le avanoa, tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai i lau Afioga i le Fofoga Fetalai mo le avanoa, e faafetai foi i le Taitaifono o le Komiti i le Lipoti ua tuuina mai.

Ou te fia tautala lau Afioga i le Fofoga Fetalai i le Corporate Plan po o Faamatalaga o Sini Autu 2013 – 2015. O lea ua matauina e pei foi ona taua i le Lipoti le faaitiitia o galuega faatino a lea Matagaluega a le Malo. O lau fesili la lau Afioga i le Taitaifono, o le Lipoti lea ua tuuina mai e toa 22 tagata faigaluega, a tuufaatasi ma tagata faigaluega le tumau po o part time ua toa 26. O le fesili la, po o a tonu la galuega o lo o faatino e lea toatele pe a fua i le tulaga o i ai le auaunaga? E le gata i lea o le fale o lo o faaaogaina nei, po o i ai lava i lalo o le Falemeli le fale lea? O tupe ia e maua mai lisi po o agai pea i le Falemeli ma tuuina mai i le Malo aua a tatou vaai ma tagatagai i ai, e moomia le toe fai o ni galuega e faaleleia ai lea fale ona o lo o tu i le ogatotonu o le taulaga.

O le isi vaega lau Afioga i le Fofoga Fetalai o pusa meli aua ou te le o iloa po o le a le toatele o nisi o lo o faaaogaina lea auaunaga ma le tau o lo o i ai. E i ai lava le aoga o le vaega lea, a o le mea lena o lea e fesili atu ai i lau Afioga i le Taitaifono i le tagai a la outou Komiti i ai aua a fua i le aufaigaluega lea e tuuina mai i inei ma le faaitiitiga o galuega lea ua i ai nei, o le mea lea e fesili atu ai po o le a se tagai a la outou Komiti i le vaega, aemaise o le fale o lo o faatino ai nei galuega.

Ma le faaaloalo lava, faafetai.

**FOFOGA FETALAI:** Malo faafetai fesoasoani mai le sui usufono mamalu. Tulai mai lau Afioga i le Taitaifono.

**Tofa LENATAI VICTOR FAAFOI TAMAPUA:** Malo faafetai e tusa ai ma le fesili. E taua tele vaega ia ua faaalua mai e le sui usufono.

E tolu lava vaega o lo o vaevae ai le Matagaluega lea; o Auaunaga o Meli, o Maketi ma Fefaatauaiga ma le Vaega o Tupe lea e vaevae ai le vaega lea o lo o galulue i le Falemeli.

O le fesili lea i le fale, sa faapena foi ona fesiligia ma e le o i ai i le latou Matagaluega le fale i le taimi lenei, a o lea ua manaia ua e faaalua mai. E pei ona silafia o fesili ia e te auina mai e mo le Fuafuaga Autasi 2013 – 2015, a o lea tatou te i le 2014. Atonu o le 2015 o le a maoti atu ai foi nisi vaega e pei ona e fesiligia. Ma le faaaloalo lava.

**Tofa Aveau Tuala Lepale Niko Palamo:** Lau Afioga i le Fofoga Fetalai na ona fia fesoasoani atu.

**FOFOGA FETALAI:** Se i tulai mai se tasi o sui o le Komiti o Aoga, Saienisi, Fesoootaiga ma Faamatalaga Tekonolosi.

**Tofa AVEAU TUALA LEPALE NIKO PALAMO (Faleata Sasae):** A tagai le mamalu o le Palemene i Tala o Tupe i tausaga ia ua tea, o le tasi lenei Matagaluega e le misi lava se latou sea i totonu i dividends foi ia e aumai i totonu i Tala o Tupe a le Malo ona o le lelei o le faiga o ana galuega. E pei la ona taua e le sui usufono le toaitiiti o le aufaigaluega, ae e tele foi galuega o lo o alo atu i ai le vaega lea latou te faatinoina, ma e tatau ona ave le faafetai i le Pule foi o lea Faalapotopotoga, ona pei foi ona saunoa le Afioga i le Minisita o Tupe i le vaitau foi ua tea tolaulau mai ia SOE ma latou tupe maua, tasi lenei Matagaluega ese le sao mai o latou seleni i totonu o le Malo. Ma le faaaloalo lava.

**FOFOGA FETALAI:** Malie le sui usufono mo Vaisigano Nu. 1, sei avatu muamua le avanoa i le Afioga i le Minisita, sei tulai mai le Afioga i le Minisita.

**Tofa Hon FAAMOETAULOA LEALAIULOTO ULAITINO FAALE TUMAALII (Minisita mo Punaoa Faalenatura ma le Siosiomaga):** Faafetai i lau Afioga i le Fofoga Fetalai mo le avanoa. Leai ona o lea ua fesiligia le fale lea o le falemeli, ma o le fale o lo o i lalo o le MNRE o lo o taumafai la e faaleleia tulaga o le fale lea. Ma le faaaloalo lava.

**FOFOGA FETALAI:** Ia o lea la ua maua le faamaninoga, ua tulai mai le Minisita o lo o i lalo o le MNRE le maota lea e faatulaga ai galuega a le tatou falemeli.

Tulai mai lau Afioga i le sui usufono mo Vaisigano Nu. 1.

**Afioga TUFUGA GAFOALEATA FAITUA (Vaisigano Nu. 1):** Lau Afioga o le tulaga lea na ou tau tu atu o lea ua saunoa i ai le Minisita. Ia o isi la auaunaga ia pei ona fesiligia e le sui usufono mamalu mo Faleata Sisifo, mea foi ia o laisene o taavale ma isi foi pili o moli ma isi auaunaga o vai, ia o lea ua pei ua tatala i ai le latou auaunaga fua i le fesili a le sui usufono mo Faleata Sisifo, po o a aoga o ia tagata faigaluega, a o pusameli foi o lo o faaaoga foi...e moni lava ua tau le lafoa ni tusi, a o la lava e faaaoga i meli foi ia puzzles.

Ma le faaaloalo lava faafetai.

**FOFOGA FETALAI:** Malo faafetai fesoasoani mai ua atili malamalama ai le mataupu, po o a galuega, a o le mea lea e maitauina ua momoli le faafetai a le Komiti, tasi la lenei Matagaluega o lea e agai o lo o maua le latou sao i dividends a le tatou Malo e fesoasoani ai i a tatou Tala o le Tupe. E momoli le agaga faafetai i le Pulega o Mea tau Meli i totonu o le tatou atunuu.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

**P.P. 2013/2014 NU. 66, LIPOTI A LE KOMITI O AOGA, SAIENISI, FESOOTAIGA & FAAMATALAGA TEKONOLOSI I LE P.P. 2012/2013 NU. 6, LIPOTI FAALETAUSAGA A MATAGALUEGA O AOGA, TAALOGA MA AGANUU MO LE TAUSAGA 2008/2009, P.P. 2012/2013 NU. 7, LIPOTI FAALETAUSAGA A LE MATAGALUEGA O AOGA, TAALOGA MA AGANUU MO LE TAUSAGA 2009/2010 & P.P. 2012/2013 NU. 8, LIPOTI FAALETAUSAGA A LE MATAGALUEGA O AOGA, TAALOGA MA AGANUU MO LE TAUSAGA 2010/2011 – ILOILOGA**

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Alataua Sisifo, sui usufono mo Sagaga le Falefa, sui usufono mo Falelatai ma Samatau, se tasi o sui usufono mo le Au Palota Taitoatasi, Afioga Maualaivao Pat Ah Him, ma se tasi o sui usufono mo Falealili, Tofa Tusa Misi Tupuola.*

**Tofa LENATAI VICTOR FAAFOI TAMAPUA:** Lau Afioga i le Fofoga Fetalai, o Fautuaga nei.

**“FAUTUAGA:**

I le maea ai o ana Iloiloga, e fautuaina ai e le Komiti le Malo ina ia:-

1. Faamallosia aiaiga o le Tulafono o lo o faamallosia ai le auai atu o tamaiti i le aoga i itula aoga, ona o lo o molimauina nisi o tamaiti e le o usitaia aiaiga o le Tulafono. E tatau foi ona i ai ni aiaiga mo tamaiti o lo o faaaoga i faatauga oloa i nofoaga faitele i taimi e tuua ai le aoga.
2. Fautuaina le Matagaluega ina ia taumafai pea e saili po o fea tonu o lo o faapogai mai ai le tulaga faaletonu o Iuga o Suega a tamaiti. Tatau foi ona uunaia pea Asiasiga e tuliloa ai le faatinoga o le galuega faa-Faiaoga i aoga uma a le atunuu, aemaise lava i Aoga Tulagalua.
3. Silasila totoa le Matagaluega i le taua o lona sao i le faafoega o Aoga i nuu i tua, ina ia maua le femalamalamaa'i o Komiti o Aoga ma Faiaoga ina ia mausali ai le galulue faatasi mo le faaleleia o le auaunaga aua le lumanai manuia o alo ma fanau ma le tulaga saogalemu o faleaoga mo fanau aoga.
4. Silasila i le faafitauli o le toagaogao o Faiaoga, ina ia mafai ona o faatasi le faaleleia o le Polokalame mo Aoaoga (Curriculum) ma le i ai o Faiaoga agavaa mo le faatinoina le galuega.

**IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoao, **Ina ia faamaonia le P.P. 2012/2013 Nu. 6, Lipoti Faaletausaga a le Matagaluega o Aoga, Taaloga ma Aganuu, Iulai 2008 – Iuni 2009, P.P. 2012/2013 Nu. 7, Lipoti Faaletausaga a le Matagaluega o Aoga, Taaloga ma Aganuu, Iulai 2009 – Iuni 2010 ma le P.P. 2012/2013 Nu. 8, Lipoti Faaletausaga a le Matagaluega o Aoga, Taaloga ma Aganuu, Iulai 2010 – Iuni 2011.”**

**P.P. 2013/2014 NU. 122, LIPOTI A LE KOMITI O MATAUPU TAU  
AOGA, SAIENISI, FESOOTAIGA & FAAMATALAGA TEKONOLOSI I  
LE P.P. 2012/2013 NU. 26, LIPOTI FAALETAUSAGA A LE  
MATAGALUEGA O AOGA, TAALOGA MA AGANUU ASO 1 IULAI  
2011-30 IUNI 2012  
– ILOILOGA**

**Tofa LENATAI VICTOR FAAFOI TAMAPUA:** O Fautuaga nei lau Afioga i le Fofoga Fetalai.

**“FAUTUAGA:**

I le maea ai o ana Iloiloga ma Asiasiga, e fautuaina e le Komiti le Malo ina ia:-

1. Toe silasila totoa i le faafitauli o le toagaogao o Faiaoga, ina ia mafai ona o faatasi le faaleleia o le Polokalame mo Aoaoga (Curriculum) ma le iai o Faiaoga agavaa mo le faatinoina o le galuega.
2. Fautuaina le Matagaluega ina ia toe faaopoopoina nisi tausaga mo le faagaioiina o le Polokalame o le School Net ina ia tulimatai ai se faaiuga ma se taumafaiga o lenei Poloketi.
3. Fautuaina le Matagaluega ina ia faapolokalameina isi uma mataupu aoaoina i totonu o le Polokalame o le School Net.
4. Silasila totoa le Matagaluega i se auala e mafai ai ona pai le Polokalame o le totoigiina o pili aoga o tamaiti i vaega e le o oo i ai le fesoasoani mo aoga tulagalua.
5. Faamautu ma uunaia e le Matagaluega o Aoga, Taaloga ma Aganuu faiga faapaaga ma isi Matagaluega o le Malo faapea Ofisa Tumaoti e fitoitonu i auaunaga faatekonolosi ina ia faaleleia atili ai le poloketi o le School Net.

#### **IUGAFONO:**

I le maea ai o iloiloga a le Komiti na faaiugafonoina ai e fautuaina le Fono Aoa,

**Ina ia faamaonia le P.P. 2013/2014 Nu. 26, Lipoti Faaletausaga a le Matagaluega o Aoga, Taaloga ma Aganuu 1 Iulai 2011 – 30 Iuni 2012.”**

**FOFOGA FETALAI:** Malo saunoa i lau Afioga i le Taitaifono. O le a avatu muamua le avanoa i le sui usufono mo Aleipata Itupa i Luga, ona avatu ai lea o le avanoa i se tasi so sui usufono mo Vaimauga Sisifo, Tofa Lefau Harry Schuster.

Tulai mai le sui usufono mo Aleipata Itupa i Luga.

**Tofa FAGAAIVALU KENRICK SAMU (Aleipata Itupa i Luga):** Faafetai atu i lau Afioga i le Fofoga Fetalai mo le avanoa foi sei taumafai atu ai se sao puupuu o lenei itumalo e tusa ai foi ma le Lipoti lenei a le Matagaluega o Aoga.

O le faafesili lava e tauala atu i lau Afioga i le Taitaifono ma le Komiti, pe le agavaa ona...se fautuaga i le Matagaluega i le faiga paaga lea a tatou ma le Malo Saina i le faatinoina lea o faleaoga. E faafetai foi i le agalelei foi o le Malo o Saina e tusa ai ma le tatou faiga paaga lea e ala i le fausiaina o faleaoga i totonu o le tatou atunuu. A o le fautuaga pe le...aia ou te talitonu, o le tele lava o sui a usufono i le Maota lenei, o lo o taoto a latou talosaga i le Matagaluega aemaise o le Malo o Saina. Pe le mafai ona silasila lelei ia le Matagaluega, sei silasila lelei i itumalo ma nuu o lo o faapena ona toatele ai le role o tamaiti aoga e ave i ai le

faamuamua i le fausiaina o faleaoga nei. A fua i nisi foi o faamoemoe na...i le tele o le faleaoga, a o le role o tamaiti aoga, e le atoa se toa 100. E pei o le ala lea e avatu ai se fautuaga ina ia fuafua lelei ia aoga i totonu o le tatou atunuu e ave i ai le faamuamua, ona o la e toatele ia alo ma fanau o lo o faapena ona aoaoina ai. Ma lou faaloalo lava, faafetai.

**FOFOGA FETALAI:** Malo. Sei avatu muamua le avanoa i le sui usufono mo Faleata Sisifo lea na tulai muamua mai, ona avatu ai lea o le avanoa le sui usufono mo Palauli.

**Tofa LEALAI PULE RIMONI AIAFI:** Faafetai lau Afioga mo le avanoa, faafetai foi i le Taitaifono o le Komiti, faafetai mo le fautuaga muamua lea na tuuina mai i tamaiti ia e le o i aoga. Pei ona ou taua foi i le vaiaso na tea nei, o se faafitauli ogaoga lea ua tulai mai i totonu o Samoa i aso uma aso uma lava. Ua fai nei tagata ma faasoosa i le taulaga ma e le o se ata lelei mo le atunuu. E le masani ai foi Samoa i aso ia, e moni lava sa tatou vaai i ai ae seasea, a o le tulaga lea ua tulai mai, ua faatupulaia le faafitauli lenei, ou te le o malamalama tonu la, po o ai tonu le Matagaluega e nafa ma le mea lenei, o lenei ou te talitonu o leoleo, o latou e vaavaaia le tulafono lea. O tua i nuu ma afioaga, o mea na e fai e komiti o aoga, matai o alii ma faipule. Ae o le mea matautia o lea ua pasia e le Malo le Tulafono, toe faaoga fua tamaiti, e tele le faamama avega lea ua ave i le atunuu, ae ou te le malamalama la i le tulaga lea e tulai mai aemaise i totonu o le taulaga, po o ai tonu e pau i ai lenei faafitauli. Aua afai e le tulituliloaina e se Matagaluega po o le Matagaluega o leoleo ia lenei faafitauli, o le a faatupulaia i aso uma aso uma lava. E le gata i lea o le vaega a le Leipa, pe faapefea ona faataga lenei mea e fai. A ou vaai foi i tamaiti nei i le tele o tamaiti nei i le taulaga, o tamaiti lava ia e tasi. O lona uiga ua maitau uma lava e leoleo ia fanau nei po o fea tonu e omai ai, e le o tamaiti foi aua e le o so latou lea e fai aua o latou matua e uunaia.

Faafetai o lea ua aumai se fautuaga, a o vaega e tataua ona tatou o e faatino, aua po o le a lo tatou taumafai e sii le tulaga o Samoa, e toe ave lava i lalo i ituaiga faafitauli nei e tulai mai ma faatupuina pea. E tataua ona tatou tagai e fofo le faafitauli, o lea ua i ai le Tulafono, ae le o lelei ona faatinoina.

O le tulaga lea i faiaoga i Lipoti uma ia e lua, o lea e matua faamanino mai e le Komiti le atugaluga lava lea e i ai le atunuu ma tatou uma, i le lē lava o faiaoga, e le gata ina le lava faiaoga a o le aoaoina o faiaoga i mataupu e agavaa e tusa ai ma le Curriculum po o mea o lo o faatino ai aoga. E lei leva atu nei ona sau faasalalauga a le Matagaluega o Aoga i Aoga Mauaoluluga foi lea e aoaoina ai le Science ma laulau mai ai faleaoga pe fia, e fitu ea iinei i Upolu ia ma le lua i Salafai. O le fesili la, aisea la le mea e tau ai pea nei aoga o kolisi, pe afai e le mafai ona faamalieina uma aiaiga faale-Aoaoga, aemaise lava i le mataupu lenei o le Saienisi? Aua o lona uiga, e le gata ina leai ni faiaoga, leai ni lap mea e faatino ai aoga a tamaiti, e faapefea la ona faa-Kolisi? O le fesili lea. E faapefea ona faa-Kolisi nei aoga pe a faapea e le o faamalieina, aemaise o le toatuga lea e

tupu mai pea ia i tatou ma tatou tagai i ai i le moomia, e le gata o mea e faatino ai aoga a o le agavaa o faiaoga. O lea foi e manino mai i le Lipoti aua e le o ni mea fou, o le 2010 ma tua atu, ua leva ona galulue le Matagaluega i auala e faaleleia ai le auaunaga faafaiaoga, a o lea e maitauina e sui pea, sui pea. O lea foi ua oo mai lenei suiga fou i le faiga o mea ia o degree ae tuu diploma, ia o lona uiga, e le o maua le agaga foi lele o le faamautu o se mea se tasi ona faatino lea, a o lea pei e tilotilo e fesuisui ai le faiga o tonu ma faiga faavae, ae ua leva ona tapena mai nei mea, po o le mea a tapena, tapena lea mea faatino atu ua le lelei, tuu, toe fai se isi mea fou. O lona uiga....

E le o maua le agaga foi lea o le faamautu o se mea se tasi ona faatino lea. O lea e tilotilo e fesuisui ai le faiga o tonu ma faiga faavae ae ua leva ona tapena mai nei mea. Pe o le mea a tapena tapena mai lea mea faatino atu ua le lelei tuu, toe fai se isi mea fou. O lona uiga, na o le tele o le tupe alu ae le o tino mai. Aua e le fou mai lava i le amataga o le Palemene lenei o Samoa, e faamuamua lava le Matagaluega o Aoga. E faamuamua i tausaga uma i tupe faaalua ma le vaai i ai aua le lumanai o Samoa. Ae tele le faafitauli lea e tulai mai tusa o le Lipoti. E le faapea e le o faatinoina le galuega lelei o lo o taumafai i ai, ae pei e foliga mai o lo o fai ma tuu, fai ma suisui.

O le isi vaega, sei fesili le Matagaluega po o le a se tulaga o i ai le taimi lenei i le suiga o taimi aoga o tamaiti, aua afai o lou afafine lea e aoga nei i le Kolisi, tuua mai i le ta o le 4, toe sau toe alu i lana aoga lea tutorial lea mai le 5 i le 7, e usu mai le tamaitiiti i le aoga i le ta o le 7, faatoa toe oo atu i le 7 i le po i le tulaga fou lea ua i ai nei. O le a se tagai i ai i le alu mamao o lea mea, a o faaoga lelei la itula faapoopo nei, aua sa tatau ona faaoga itula o le aoauli e fai ai aoga nei faapoopo. Ma e le tatau foi la ona toe moomia ni extra tutorials nei pe afai o lea ua faauumi taimi o aoga ina ia lava le taimi e aoga ai tamaiti, aemaise o le feoi mai i le omai ma le o atu.

Lau Afioga i le Taitaifono, ou te alofa i lou taumafai mai e tali fesili, o le a le toe tele foi ni fesili, ae o nai manatu na lau Afioga e fesoasoani ai i lenei taimi.

**FOFOGA FETALAI;** Malo, faafetai fesoasoani mai. O le a tuu atu le avanoa i le sui usufono mo Palauli ona tuu atu ai lea i le sui usufono mo Alataua Sisifo.

**Afioga AFOAFOUVALE JOHN MOORS (Palauli):** Faafetai i lau Afioga i le Fofoga Fetalai mo le avanoa. Ou te fia faaalua foi le agaga faafetai i le Afioga i le Taitaifono o le Komiti ae le gata i lea o le Sui Taitai ma le latou Komiti e tusa ai ma le galuega maeaea o lea ua fofola nei i lumamea ma o lea ua tatou talanoaina. Faafetai atu i manatu sa faapea ona faaalua. Sa leai foi se agaga e tulai e fai se manatu, ae peitai ane ua i ai se finagalo o lea ou te toe asa ma e pei ona taua e le sui usufono mo Aleipata Itupa i Luga. Ae o le tulaga tonu lava lea e i ai le faanaunautiga i le tulaga e i ai le fesoasoaniga o faleaoga i totonu o le tatou atunuu, lea ua maitauina ai fesoasoani mai fafo, e le gata ia Iapani ae faapea foi le atunuu tele lea o Saina.

Ia, o le lagona lava foi lena pei ona faatagisia e lenei itumalo. I le amataga lava o le Paeaiga ua tulai mai nei, sa ta tu atu lava ma tuu atu le manatu vaivai aua le tuliloaina o se faleaoga o lenei itumalo. O lea ua savalia nei le fa tausaga, ua latalata atu i le fa tausaga talu ona le toe i ai se faleaoga o lenei itumalo. Ae silasila foi lau Afioga i le Fofoga Fetalai, o le tausaga na mavae atu nei, e 514 tamaiti aoga na faamauina, ae peitai ane, e leai se faleaoga. Ae a silasila foi i ai, o le vai o lenei itumalo, o lo o faaogaina lea e taumamafa ai le itu Faasaleleaga. O le fesili la; e tele le sao o le itumalo o lo o fesoasoani ai i isi vaega o le atunuu, ae peitai ane, e faanoanoa lava le agaga ona e pei e le o faamamafaina e le Malo le fausia lea o se faleaoga aua alo ma fanau foi o le atunuu o lo o faapena ona alaala ma papaaao i lo matou itumalo.

**FOFOGA FETALAI:** Ou te faamalulu atu i le saunoaga a le sui usufono mamalu, ona o lea ua tatou taunuu i le tatou taimi malolo, o le a faaauauina le saunoaga a le sui usufono pe a tatou taliu mai i le tatou taimi masani.

Ou te faasilasila atu o le a faataatia ese Taulumaga a le Fono Aoa mo lana malologa masani o le taeao.

*Na faataatia ese Taulumaga a le Fono Aoa mo lana malologa masani i le itula e 10:46 i le taeao ma toe faaauau i le itula e 11:24 i le taeao.*

**FOFOGA FETALAI:** E momoli atu le agaga faafetai ma le faamalo i lenei vaega o le aso. E manatu o lea ua maea le tauteaga ma le taligasua o le taeao, ma e i ai foi le talitonuga o lea ua toe faafoisia le tamaoiga o le malosia o le tino, o le agaga ma le mafaufau e ala i le tatou usugafono.

E momoli atu le faafetai tele i lau Afioga i le Sui Palemia ma le taumafai foi o le nofo a Minisita e tau palepaleina le tatou Fono i lenei taeao. E faafetai foi foi i le fofoga o alii i lea Itu o le Maota, e ui lava ina vaavaai atu e le o alaala mai sui matutua o la outou Itu, ae o le a le afaina lea, o le a tuu ia le tama a le olomatua e fai le mea e loto i ai, ae o le a faagasolo le tatou Fono o lea e atoa le numera e faatino ai le tatou polokalame o le aso. Ae momoli atu le faafetai tele i le onosai mai o le mamalu o le Maota e tusa ai ma fuafuaga ua uma ona faataatia ae o le a tatou alo mo le tatou...

Sei tulai mai lau Afioga i le sui usufono mo Faleata Sisifo.

**Tofa Lealailepule Rimoni Aiafi:** Faafetai lava i lau Afioga i le Fofoga Fetalai, faafetai foi mo le faamalositino ma le tausiga i lau Afioga i le Failautusi ma le paia o le Maota. E leai na o se vaega lea e fia faamalamalama lau Afioga, e leai o lea ua toe faatasi mai le Afioga i le Sui Taitai, a o le Taitai, ua toe gasegase foi ua poia i le mai mata, ae ua uma ona faamalulu mai e toe taunuu mai e lei uma le tatou Fono. Afai e uma e le i toe sau, ou te fautuaina lau Afioga i le Minisita mo Faatoaga ma Faigafaiva, toe afio mai i lou ava lea (*faasino i le nofoa o le Taitai o*



*le Itu Agai*). Sau e toe taitai le tatou Vaega. Lau Afioga i le Taitai o le Itu Agai a o e faafofoga mai, ia, fai se isi fuafuaga ae toe vave mai, lou nofoa i e sau ua sui le tagata e nofo ai, ae na o le Minisita o Faatoaga ma Faigafaiva lava le tagata lea ou te manao e afio mai i i. E ui i lea, o lea ua saunoa mai le matou Taitai o le a alu fiafia, ua uma ia pisa mo le nuu, ua le toe i ai se mafaufauga i lea vaega, ua malamalama foi, atonu o se taimi toe taunuu mai, a o lea ua e silasila mai lau Afioga, o lea ua afio mai le Taitai moi o lenei Vaega, le Afioga i le sui usufono mo Falealupo.

**FOFOGA FETALAI:** Ia sei tulai mai le Afioga i le Minisita mo Faatoaga ma Faigafaiva, ona o lea ua tapa le suafa o le Aiga Satuala. Sei tulai mai le Tama Matua, le Minisita mo Faatoaga ma Faigafaiva.

**Afioga Hon Le Mamea Ropati (Minisita mo Faatoaga, Faleoloa o Faatoaga ma Faigafaiva):** Lau Afioga i le Fofoga Fetalai, faamalo faafetai. I lau faalogologo foi i felafolafoaiga anataeao, ua leva ona ou fia tu atu analeila e fautua i si ou uso, aua leaga e sao lava le saunoaga a le sui usufono mo Faleata Sisifo, ua leva ona ou fia saofai i le nofoa le la. Ua ou fia fautuaina foi lele, aua le ita ma aua le fia finau i le Fofoga Fetalai, aua e manumalo lava le Fofoga Fetalai. O nai au fautuaga na sa fia tuuina atu i ai, ae tei ua toso atu ai ma au i totonu i le finauga sa fai. Ae o le mea sili faafetai o lea ua saunoa mai le sui usufono mo Faleata Sisifo, e talia foi so o se taimi lava.

**FOFOGA FETALAI:** Malo. Sa manatu lava lau Afioga i le fofoga o alii, a leai le tou Taitai, see mai le Sui Taitai, a o lea e manatu atu o lea ua e lafoa i o. O le Minisita mo Faatoaga ma Faigafaiva e le toe fia foi i se mea na sau muamua ai. E ui i lea, ua tea lea fuilauvi, o a foi fuafuaga ona o lea ua e taua mai ua gasegase, e leai se tagata e tei lava ua mai mata faafuasei i se fuilauvi na fai. E ui i lea, e faapena le taotoga o le tatou va feagai ai, o a foi upu ma tala ma fesuataiga i lenei taeao, ia, o suaga o le vaatele e aumai avatu, na pau lava le mea, ia aua nei paia se mata ma ave le se ma mea mamafa, aua foi le ave le naunautai e ave ai ma mea sese. E ui i lea, o le a alo le tatou Fono mo le faaauauina.

E faia le tatou malologa o saunoa ma fetalai le paia i le nofo a Pule ia Palauli, tulai maia le sui usufono mo Palauli e faaauau ma faaii mai le saunoaga e ala i le tatou Lipoti.

**Afioga AFOAFOUVALE JOHN MOORS:** Faafetai atu i lau Afioga i le Fofoga Fetalai, faafetai i le tatou Tama faalelagi o lea ua tatou toe potopoto e faaauau le tatou Fono i lenei lava aso, ma le faamoemoe e mafai ona faatasi mai pea Lona Agaga e mafai ai ona tatou faia ni faaiuga tonu ma le amiotonu.

Lau Afioga i le Fofoga Fetalai, o le tulaga lea e avatu ai se tuualalo i le Afioga i le Taitaifono ma le Komiti mamalu i se latou fautuaga po o se timaiga foi i le Ofisa foi po o le Matagaluga e pei ona taatia ai nei i lumamea le Lipoti. Ona o le tulaga lava ia e i ai le atugaluga o si o matou itumalo ma le popolega, ona e le o

taatia i se tulaga e aliai mai ai se amiotonu e pei ona ou taua. E fai lava si tele o le fuainumera o nai alo ia o lo o aafia i totonu o lo matou itumalo. Ae le na o le matou itumalo lau Afioga, o lo o i ai i totonu o le fuainumera lea nisi foi o alo mai itumalo tuaoi o lo ofaapena ona aoaoina i le aoga o lo o faatu i totonu o lo matou itumalo, a o lea lava ua faapena ona faaaogaina maota foi o le matou nuu lea i Vaitoomuli e faapena ona tufa atu i ai nei tamaiti aoga e faaaoga ai. O le isi popolega lea ua i ai, o le soifua maloloina. Mo le silafia e lau Afioga, o lona uiga ua faaoga faatasi uma lava e nai tamaiti ma le aiga faleletaua e pei ona i ai, aua ua leai se fale e toomaga i ai, ua leai se faleaoga tatau ma le talafeagai e faatino ai le latou aoaoga.

O se manatu lea ua tuuina atu ai le tuualalo, ona e foliga mai e tele le pasene o tamaiti aoga, ae ua faaletaua i le silasila a le Matagaluega po o le Malo, ua tatau ona fausia se faleaoga. E moni e i ai eseese o poloketi e faapea ona fetufaa i aoga, ae maitaulia o fuafuaga a le Matagaluega o Aoga, e ave le fesoasoani a Saina i aoga tulagalua. Peitai la le faleaoga lea ou te tautalagia, o le aoga laititi po o le Primary School. A o le mafuaaga e ala ai ona ave i le tulagalua, ona o la e aoga mai ai nisi itumalo i le tulagalua. O le tulaga lava foi lena o lea o lo o tupu nei i le aoga laititi lena i Palauli, e ui e le o se aoga tulaga lua ae leaga o la e aoga mai i ai tamaiti o itumalo tuaoi. O lona uiga e tali tutusa lava ma le faatinoga o le tulaga lua.

O le tulaga lea lau Afioga i le Fofoga Fetalai. Ua maea ona ou asa Ofisa e tusa ai ma le faatulagaga o ala e tatau ona uia, aumai foi fautuaga ma taumafai lava e faapena ona faatino. Ua uma foi ona ou uia le Ofisa o le Minisita o Tupe, o le fautuaga foi lena. Nei meaane ua maitau mai e le matou itumalo o lo o nofonono le latou sui usufono, ae leai. O lea lava e tuitui pea tuitui pea. O lea foi e i ai se talosaga ua taoto i le Malo o Iapani, peitai ane o lo o faapena lava ona talia se faaiuga. Ae o le tulaga lea e lagona ai le agaga faanoanoa, ona o lea ua savalia nei le tolu tausaga lata i le fa talu ona avatu le matou tuualalo, peitai ane, e le o foliga mai lava o agai i luma se faaiuga.

Ia, lau Afioga i le Fofoga Fetalai, masalo o le a faapea ona fesoasoani mai le Alii aua ou tiute e tusa ai ma le tatou Fono faa-Palemene, ia foai pea le malosi e faapea ona faaauau ai ou tiute fai. Ia faapea ona faamanuia mai le tatou Tama o i le Lagi i sui usufono uma o lena lava aso.

**FOFOGA FETALAI:** Malo faafetai. Ia, malie le sui usufono mo Faleata Sisifo sei tuu atu le avanoa i le Afioga i le Sui Palemia.

Tulai mai lau Afioga i le Sui Palemia.

**Tofa Hon Fonotoe Nuafesili Pierre Laufo:** Lau Afioga i le Fofoga Fetalai, ua matagofie le tele o saunoaga a sui usufono e tusa ai ma le mataupu lava lena i le Lipoti. Ae tau lava ina faamanatu atu pea, o lo o i ai lava faiga faavae a le tatou Matagaluega, e faapea foi le tatou Malo i le fuafuaina o atinae faapenei mo faleaoga, e faapea foi faiaoga. Ma o le tele foi o na faiga faavae ua maea ona silasila i ai le Malo ma fai i ai faaiuga. Na pau la le mea o lo o faagasoloso pea i

le taimi nei, ma o le fautuaga, ia lavapapale mai pea. O a tatou atinae po o poloketi o faleaoga o lo o faapea lava ona faatulaga ma faavasega e le Malo e fuafua lava i tulaga pei foi ona outou sausaunoa i ai. E tele nisi galuega ma nisi poloketi o lo o galulue foi i ai le tatou Iunivesite Aoao, e pei foi ona taua e se tasi o sui usufono le vaega lea o le Maligi le Ocean Campus mo le koleniina ma le aoaoina o tatou seila. O lea ua maea ona faailoga nofoaga, le fanua lea o le a amata ona fausia ai le nofoaga i Mulinuu nei. O lea foi ua i ai le fuafuaga o le a faapena ona faavae se tatou sports institute, po o le koleniina o tatou tama ma teine taaalo ina ia lava le tomai ma lo latou malosi i tulaga i taaloga eseese o lo o faapena ona tauva ai, e le gata i Samoa nei ae faapea foi i le faava o Malo. O lena foi ua faaopoopo i ai ma le aoga faafomai ma le anoano o isi a tatou poloketi o lo o faagasolo pea i le taimi nei. A o le fautuaga ia lavapapale mai pea le tulaga o lo o moomia e tatou itumalo taitasi i tatou aoga tulaga lua faapena foi tatou aoga i kolisi, o lo o faapena ona faasolosolo atu pea a tatou polokalame.

**FOFOGA FETALAI:** Sei tuu atu le avanoa mulimuli i le sui usufono mo Alataua Sisifo.

**Afioga LAFATELE PATRICK LEIATAUALESA (Alataua Sisifo):** Lau Afioga i le Fofoga Fetalai, ou te tulai atu ma le agaga faaaloalo e le tele foi se manatu e faaalua i le Lipoti a le Komiti e pei ona taoto i le tatou Maota i lenei taeao. O lea ua saunoa manino le Afioga i le Sui Palemia e tusa ai ma fuafuaga faataotooto a le tatou Malo. E sao le saunoaga, o lea foi e mau le toovae i itumalo ma maua le onosai. Ae ua ou tulai atu ma le agaga faaaloalo i lenei foi taeao fou, ou te fia fesili i le Afioga i le Taitaifono pei ona maua i le matou faalogo i le taeao lenei saunoaga a nisi o sui usufono, po o fea o o taoto i ai le faasoa paleni o le faasoasoina o faleaoga nei aua o lea matou te malamalama masalo a faapea e 49 sui usufono o le Maota lenei, o le 49 foi lenei o talosaga i faleaoga. A o le matou fesili, po o fea o taoto i ai le faasoa paleni.

Lau Afioga i le Fofoga Fetalai ma le mamalu o le Maota, e i ai nisi itumalo a fua i le itumalo lenei, ia, e le atoa se 100+ o tamaiti aoga a isi itumalo, ae o la e ua fau le latou faleaoga. A o le itumalo lenei, e lua lava galuega tetele la e taoto, o le Primary School i si ou nuu lea o Falelima ma le Kolisi la le ua toe ola le vao, ua uma ona fai fesootaiga ma le Matagaluega o Aoga, masalo po o le lua i le tolu tausaga talu ai tea le taimi na folafola ai, a o la e ua toe ola ai ma le vao.

O lau fesili la; po o fea o taoto i ai le faasoa paleni leaga e le o lelei le matou tilotilo atu i le laiti o le faitauaofai o isi afioaga i latou tamaiti aoga ma i matou nei, e fai si tetele o fuainumera la e saofafai mai nuu i tua ma lenei itumalo, a o la e ave le faamuamua i nei faleaoga ae laiti a latou tamaiti. O le matou fesili lena ma le agaga faaaloalo lau Afioga i le Fofoga Fetalai, o lea foi ua maitau atu ua fai le faleaoga o le itumalo o Siumu, ae toatele mamao ai tamaiti o le itumalo lenei. Ma le faaaloalo lava.

**FOFOGA FETALAI:** O le ala lea o le taumafai atu lau Afioga i le sui usufono mamalu, a outou silasila mai o lea na tulai atu le Sui Palemia, e leai lava se isi o tatou e le o aafia i le mataupu lenei. A o le agaga lea na avatu, ia tatou onosai, e lei fausia Roma i se aso se tasi. O lea lava ua taua le agiga o outou finagalo i le mea o lo o ave i ai le faamuamua, o le itu sili lena ona ou popoe i ai, leaga o lea e le o afio mai le Afioga i le Minisita mo Aoga, Taaloga ma Aganuu, o lea foi ua tulai atu le Afioga i le Minisita o Tupe, o i latou uma o lo o aafia i totonu o le faagaioiga o nei mea uma, e tele lava le tulaga i le le o tali mai ona o le le faatasi mai i a tatou Fono. A o lea la ua saunoa atu le Afioga i le Sui Palemia, taatia maia laia i faiga faavae ma mea uma lava.

Le sui usufono mo Siumu, o le a se mea ua...

**Tofa Hon Tuuu Anasii Leota (Siumu):** Lau Afioga ona o lea ua taua lou itumalo, a o au foi o le Sui Minisita o Aoga, Taaloga ma Aganuu. O lea ua fesiliga le faasoa, ae ou te fia faasilasila atu i le Afioga i le sui usufono mamalu, e fua le faasoa i lou matua. O le 1996 na ou ulufale mai ai i le Palemene lenei, o i ina na faataoto ai lava au talosaga nei i faleaoga, o auala ma mea uma faapena.

O le tulaga i le faleaoga lea lau Afioga, e ova atu ma le 500 le aofai o tamaiti aoga i Siumu. O lea la ou te tau atu i le sui usufono mamalu, leai o lo o agavaa lava le matou itumalo, leaga a uma le Paeaiga lenei, ua 20 tausaga o ou tautua pea i le Palemene. Ua ou matua la, ae masalo le sui usufono lea, toetiiti lava oo atu i ai le faasologa aua ua faasolo ina matua, a o le faalavelave, o le sui usufono lea e tutoatasi. Ana sau ma te tutu faatasi e fau se ma vaega, ia ua fau lou faleaoga. Ma lou faaaloalo.

**Afioga LAFATELE PATRICK LEIATAUALES:** Lau Afioga i le Fofoga Fetalai, e leai se agaga e tuuaia le sui usufono mo Siumu, a o se faatusatusaga. O lea foi na saunoa lau Afioga i le saunoaga a le Sui Palemia, a lea sa e maitau mai, e pei ona faitau atu i le taimi ua sola ma fatia ua alu, o lea lava e mau le toovae. A o le agaga ma le faamoemoe, e fia fesili i le Taitaifono, po o fea o taoto i ai le faasoa paleni. Ma le agaga faaaloalo.

**FOFOGA FETALAI:** Sei toe tuu atu la le avanoa i le Afioga i le Sui Palemia.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai, e maitauina ua saunoa soo le sui usufono lea o se vaega, o lea foi ua toe saunoa i lenei aso e fai se la vaega ma le sui usufono lea mo Alataua Sisifo. O lea la e fesili atu i lau Afioga i le Fofoga Fetalai, ua solia le Tulafono foi lele o Faiga Palota e le sui usufono lea?

**FOFOGA FETALAI:** Ia, na ona faatulai mai o se vaega le mautu. Ia, malie ia le sui usufono mo Alataua Sisifo, o lea ua faamanino atu, e manatu foi o lea e malamalama le faamalalamamaga a le Afioga i le Minisita mo Aoga, Taaloga ma Aganuu. E talitonu ia mau pea le toovae i le tatou Maota. Ia, sei tulai mai lau Afioga i le Tamaitai Minisita.

**Afioga Hon Fiamē Naomi Mataafa (Minisita mo Faamasinoga ma Pulega Tau Faamasinoga):** Faafetai lava i lau Afioga i le Fofoga Fetalai. I le mataupu lava lea e tatou te talanoa i ai i faleaoga, e fia fesoasoani atu foi i le tatou faatalatalanoaga o le mataupu. O faiga faavae lava ia a le Malo, o faleaoga e fai e nuu. O le taotoga lena o le faavae o lo o i ai. A o le mea lea ua oo i ai le tatou talanoaga, o fesoasoani, aemaise fesoasoani mai fafo, e lagolago ai foi i le faamoemoe o nuu ma afioaga. Ma ou te manatu e ese le taua o mataupu ua lagalaga mai, aua i le tasi itu o lo o faataatia ai le faiga faavae i le Matagaluega lava ia o Aoga i le faapea o le matafaioi lava lea a nuu o le fausia o latou faleaoga. Ae peitai, o lea foi tatou te malamalama e le gata o le Malo foi ia e talia ma le fiafia fesoasoani mai fafo, a o lea foi tatou te malamalama e manaomia foi e nuu ma afioaga le fesoasoani, e taugata le fausia o tatou faleaoga. A o le taua lau Afioga i le faalogologo atu foi i lenei taeao i le saunoa mai o sui usufono mamalu, e i ai lava le moni i vaega uma ia ua faaalua. O lea foi ua saunoa le sui usufono mo Siumu e fua i le matua. Atonu foi o le mea foi lea o le tuitui pea i mataupu faapenei, ae ou te manatu o lea e le o afio mai le Afioga i le Minisita ona o lo o malaga, a o lea foi ua saunoa le Sui Palemia, atonu ona o faiga faavae e ao ona liuliu i ai se vaai a le tatou Malo, o le faasoala lea i tulaga o fesoasoani mai fafo e le gata o le faamalieina o talosaga o lo o taatia mai, a ia faapea foi ona laugatasia ma avanoa tutusa nuu ma afioaga o e o lo o talosaga mai, aua o lea foi e vaai atu e eseese foi fesoasoani e maua mai. E ese fesoasoani a Saina, ese fesoasoani a Iapani, ma isi foi a tatou paaga o e o lo o lagalaga mai. Atonu o lau foi faalogologo atu i lenei taeao, o le taua, o le vaai lea i fesoasoani mai fafo ma se faataatiaga e le Malo o ni faiga faavae e tali atu ai i manao o lo o faatulai mai. O se fesoasoani lea i lau Afioga.

**FOFOGA FETALAI:** Malo. Faafetai fesoasoani mai i lau Afioga i le Minisita mo Faamasinoga ma Pulega Tau Faamasinoga. Malie lau Afioga i le Sui Fofoga Fetalai sei tuu atu muamua le avanoa i le sui usufono mo Aana Alofi Nu.3, ona avatu ai lea o le avanoa mulimuli mo le saunoaga.

Tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai mo le avanoa. E fia faamauina foi le agaga faafetai i le Taitaifono ma le Komiti mo le tapenaina o le Lipoti. Faafetai foi i le Matagaluega sa latou faatinoina le Lipoti i le faatinoina o galuega. E talitonu lava le agaga e tele lava vaega taua ua faatinoina, e pei foi ona saunoa nisi o sui usufono i le utiuti o le seleni ma le faasoala, ae ua maitauina le tele ma le aoga ma le alualu i luma o lea foi taumafaiga a le Matagaluega a le Malo.

Lau Afioga i le Fofoga Fetalai e lua lava nai vaega e fia oo i ai se manatu. Ou te talitonu ua laaloa ma ua lava saunoaga foi ma fetalaiiga a le Maota nei i le vaega lea o aoga. Ae ou te fia tautala i isi vaega e lua ia o le Matagaluega, le vaega lea o Aganuu.

Lau Afioga i le Fofoga Fetalai, e fia faafesiligia le Taitaifono aemaise foi o le Komiti ona e maitau atu e le o i ai ni a tatou fautuaga e agai i le vaega o le Sports ma le Culture. E faitau atu foi i le Lipoti, e i ai se vaega o lo o sau i totonu i i e faatatau i le Lipoti lea Nu.66 e faapea e i ai ni lavelave i le Matagaluega i le vaega o Aganuu ae fia maua i ai sina malamalamaaga po o a lavelave ia, ae po o a foi galuega faatino a le Matagaluega i le vaega o Aganuu e alualu a ii luma pe maua ai foi se lelei.

Lau Afioga e faapea foi le vaega o Taaloga, o lea e i ai nai polokalame ia e faailoa mai o lo o faatino e pei o le sports development ae maitau atu e laiti lava aoga o lo o faatino ai. O lo o sau ai foi e faapea o lo o faamoemoe e faalauteleina. O le naunautaiga lau Afioga, po o le a se vaeg ai susesuga a le Komiti foi po o afea e mafai ona faasopolia ai le tatou atunuu i lea polokalame ona e talitonu foi le agaga, o le taua ia o lenei foi vaega o taaloga. E tele foi alo ma fanau o le tatou atunuu ua maua konekarate ma lelei i taaloga, ua maua ai foi le lumanai manuia, afai ua le manuia i aoaoga, ae ua tele foi le avanoa e mafai ona faaleleia ai foi o latou aiga e ala i taaloga.

Ma le vaega mulimuli lau Afioga i le Fofoga Fetalai i le itu lava lea o taaloga, e i ai se talitonuga i le taua o tatou sports facilities, o lea ua saunoa le Afioga i le Sui Palemia o le a taumafai ona faatino se high performance facility mo taaloga uma i totonu o Samoa. Ae i ai le talitonuga lau Afioga, e valuvalusia aa o le fau ina ia tagatagai ia mafai ona faaleleia itumalo i tua, ia i ai ni tatou facilities, o lea ua faatinoina malae ina ia i ai nai vaega foi nei ia lava tapena mai ai alo ma fanau ia le gata a o laiti, a ia oo mai i totonu o le tatou facility tele lea o le a tapena, a ua lava tapena mai tua. O le taimi nei na pau lava na o malae lea e i ai nisi afioaga ma nisi itumalo o lo o i ai malae, ae faigata ona faaleleia taaloga, aemaise foi lea atinae o taaloga pe afai e le o i ai ni facilities lelei e mafai ona fesoasoani i le atinae o lea foi lumanai o le atunuu. Faafetai.

**FOFOGA FETALAI:** O le avanoa mulimuli, tulai mai lau Afioga i le Sui Fofoga Fetalai ona tali ai lea o le Taitaifono.

**Tofa AGAFILI PATISELA ETEUATI TOLOVAA (Palauli Sisifo):** Faafetai tele mo le avanoa i lau Afioga i le Fofoga Fetalai. Ua malo foi le onosai i le faafoeina o le tatou Fono i lenei foi taeao. E faatalofa atu foi i le tatou Fonotaga mamalu i le paia o le Kapeneta faapea foi sui usufono mamalu o le Palemene. E fia faaleoina foi le agaga faafetai i le Taitaifono faapea foi le Komiti sa nafa ma lenei Lipoti.

Ou te fia amata mai lava i le amataga i le mataupu lea o le Gagana Samoa po o le Samoan lea mo le tausaga faavae o le Iunivesite. O meaaoga muamua po o assignment muamua a tamaiti, o lea o le a atoa le 10 tausaga talu ona iu mai lou atalii matua, a o le assignment muamua lava e fai mai faalupega o lo outou nuu, o malaefono, mea uma faapena, ona sau ai lea i le vaega lona lua, faamatala auiliili mai ni mafuaaga se fa o le faalupega. O le vaega lona tolu, faamatala mai lou sootaga i se vaega o faalupega. Pei lava ona faafofoga le Maota, pei ua latalata i

le sefulu tausaga talu ona iu mai lou atalii matua, o lea la ua toe alu atu lou afafine laitiiti i le tausaga lenei, a o lea foi ua toe aumai lava, o le mea lava lea e tasi. Ou te ofo lava pe a faapea e lei ao uma e le Iunivesite ia nei faamatalaga, aua ou te iloa e leai lava se alaafaga e leai se tamaitiiti i le tausaga faavae i gauta i le Iunivesite, e lei suia lava, o le mea lava lea e tasi. Fai mai, faamatala mai ia faalupega o lo outou nuu, lavea ai ma malaefono, o maota ma mea uma faapena, sao aoluma, sao tamaitai, faamatala mai mafuaaga o ni mea se fa i totonu o le faalupega, faamatala mai lou sootaga i totonu o le faalupega. O mea na ou te fautua atu ai i lau Afioga i le Taitaifono, pe a ae fesootai lau Komiti ma le vaega lea a le Iunivesite, po o talafeagai lava i lenei vaitaimi ona fai ia na ituaiga assignment? Aua o le assignment lava na na faavae mai ai le Iunivesite na e oo ai foi oe, o le mea lava lenei na tuu atu foi ia te oe, a o lenei e oo mai lava i lenei vaitaimi o lea o le a 30 tausaga, ia o le assignment lava lenei e tasi e le o suia lava.

Lau Afioga i le Fofoga Fetalai, o itula fou ia o aoga. Faafetai o lea e alaala mai le sui Minisita faapea foi le sui o le Matagaluega, a o lau lava fautuaga, o le faaiuga o le tausaga nei e atoa ai le tausaga o faatino, pe le mafai ona iloilo i le faaiuga o le tausaga nei i sa outou fautuaga i le Matagaluega, po o a ni lelei ma ni vaivaiga foi o itula fou lea ma ni aafiaga, e le gata o tamaiti aoga, faiaoga ae faapea foi aiga. Aua o lau molimau i lau Afioga i le Fofoga Fetalai, o le aoga a Palauli Sisifo e mai Taga e tau i Foailalo, o aso uma lava lea ou te malaga ai i Savaii i le vaa o le 4:00 i le afiafi, matou te fetai ma tamaiti Taga ua ta le 6:00 i le afiafi, ae o le a oo mai i Taga e lua itula o savavali mai tamaiti, o lea la o le a sui nei le taimi o le a toe foi i tua, o lona uiga, e taunuu mai tamaiti i le nuu lea o Taga, ua pogisa. Ae o lau lava fautuaga leaga o lea e le o afio mai le Afioga i le Minisita, ae faataatia atu i o outou tafatafa o lea e faafofoga mai le sui o le Matagaluega, pe mafai ona iloilo i le faaiuga o le tausaga nei, ia ona fai sa outou fautuaga talafeagai mo se faaiuga a le Kapeneta pe faaauau pe toe i ai se isi fetuunaiga.

O lona tolu lau Afioga i le Fofoga Fetalai, o lea ua faafofoga uma lava le tatou Palemene nei o lea foi ua silasila i le Lipoti a le Taitaifono ma le Komiti, e le lava faiaoga. A o lea ua agia i faasalalauga i le Televisi ma faasalalauga i le leitio, le saunoaga a le Taitaifono o le Komisi o Tagata Faigaluega a le Malo, le faatusatusaga e tasi le faiaoga ae 20 tamaiti ma le faaupuga, o la e matuai lava totoa faiaoga, lava totoa faiaoga, a o le finagalo lea o lea e lagalaga e sui usufono uma lava, le lava faiaoga, a o lea ua saunoa mai le Taitaifono o le Komisi o le Aufaigaluega a le Malo, e tasi le faiaoga e 20 tamaiti, lava faiaoga. Lau Afioga i le Taitaifono, o fea e sao, o fea tonu lava e sao, e sao le PSC pe sao la outou Lipoti, pe sao le Matagaluega? Aua o lea foi ua tali mai le Sosaiete a Faiaoga, e le lava. O fea la le mea sao, ia taatia i finagalo o le atunuu ma le Palemene nei le tali sao, po o lava po o le lava? Ai po o le mea lea e ala ai ona faaluafesasi le taumafaiga e faatele faiaoga ona e le o mautinoa po o lava, aua o lea ua tali mai le isi Matagaluega a le Malo e lava, o lea e fai mai le SFS ma le Matagaluega ma la outou Lipoti, e le o lava.

O le aoga i Palauli Sisifo lea ua tofia e avea ma se tasi o aoga i le motu i Salafai e aoao ai le mataupu faa-Saienisi, sa ou fesili pe faapefea ona faatino lea galuega e lua i ai aoga i Salafai, ae faapea e feoai faiaoga? O le faiaoga la o le faiaoga Saienisi i Savaii Sisifo, a oo i le taimi e fai ai lana mataupu faa-Saienisi ona susu mai laia i Palauli Sisifo e fai ai lana mataupu science. Ou te le iloa po o le a le lelei o lea mea, pe moni foi lea faamatalaga na aumai ia te au, a o le faamatalaga lena o lea na ou maua faapea e feoai faiaoga science o la e faiaoga i isi aoga e omai i Palauli Sisifo e faatino ai le aoaoina o latou mataupu.

Lau Afioga i le Fofoga Fetalai faapea le mamalu o le Palemene, na saunoa manino lava le Minisita mo Aoga, Taaloga ma Aganuu i se tasi o fonotaga na tuanai atu, e lima faiaoga e aofia ai ni pule aoga ua faamalolo ona ua faaoga sese tupe o mea ia o pili o tamaiti lea e faameaalofa atu i ai. O lea la ua oo atu le faasoa i aoga maualuluga e gata mai i le vasega 11. O lau talosaga, sei silasila totoa ane i lea tulaga po o lelei ona puipuia le faaogaina o tupe, aua ana faapea ua faamalolo ai nisi o faiaoga i le polokalame muamua, e mafai foi ona tupu i aoga maualuluga?

Lau Afioga i le Fofoga Fetalai ia ma le mataupu mulimuli. O asiasiga a le Komiti, Letogo, Moataa, Falefitu, Vaimoso. Asiasiga i le aso 20 ia Mati, o le Matata Eseeese i Fagalao, Falevao, Falefa, Anoamaa, Kolisi o le Ekalesia Aso Fitu. O lau faafesili lava lau Afioga i le Fofoga Fetalai, o la outou Komiti e faapitoa lava a latou asiasiga i Upolu nei, e le aafia ai matou i Savaii? Ia manuia lava le Fonotaga i lenei itula o le aso.

**FOFOGA FETALAI:** Malo. Faafetai i lau Afioga i le Sui Fofoga Fetalai e ala i le folasaga ua tuuina atu i le Maota, e talitonu foi sa i ai foi le lagona e le faalavelavea le tulaga o le tuleiga ma le saunoaga, e faapena foi le mataupu lea sa laga e nisi o sui usufono mamalu ma a latou saunoaga, ia tatou malilie leaga o lea ua uma ona faataatia ia faiga faavae ma alafua ua faataatia ai le Matagaluega i ana taimi e tuua ai aoga, ma e manatu e le fefoifoiai le galuega a le Malo o lea ua faatino. O lo o tapu foi i aga ma tu o a tatou Tulafono Tumau, e le mafai ona tatou toe asaasa se mataupu ua uma ona fai i ai se faaiuga a le Matagaluega ma le tatou Fono. Ae taua la outou fautuaga e toe matimati tulaga o faaiuga ia pe a uma se taimi e mafai ai ona tatou toe tilotilo, ia o atugaluga o lo o tulai mai. Ae aua e te popole o lea lava e faagasolo ia asiasiga a le SPAGHL, afai e le o gafatia ia asiasiga a le Komiti o Aoga, ona o le Taitaifono foi o lo o i lalo o le Komiti Faapitoa o le Puipuia o le Saogalemu ia ma le Soifua Maloloina, o lo o tau aofai uma atu tulaga ia, ae ona masalo o le tulaga o lo o ave i ai le faamuamua, ae manatu ifo lau Afioga i le Taitaifono mo ni asiasiga mo Salafai pe a avanoa.

Tulai mai le sui usufono mo Faleata Sisifo.

**Tofa LEALAIPEPULU RIMONI AIAFI:** Lau Afioga i le Fofoga Fetalai e puupuu lava se manatu i le tatou Lipoti.

O le mea muamua lau Afioga o tausaga o tamaiti aoga, ua tele foi ia saunoaga i nisi o vaega. O le tausaga o tamaiti aoga, o le tausaga nei e toalua tamaiti masalo



pe toatolu tamaiti ua le mafai ona ulufale i le Iunivesite i Ausetalia, ona ua avatu o la e under age e 17 tausaga, e moni lava la ua atamamai tamaiti ma vave, ae pei e le o talafeagai le tausaga. O le isi mafuaaga pei lava toe o tatou le atunuu o lea e fai lava le mea lea o le vasega 11 yr 11, aua sa fai foi tuu i le isi vaitaimi. O Niu Sila ma Ausetalia o la e fai lava le yr 9, 10, 12 faapena faasolosolo lelei faapena, a o tatou o lea la e misi, a uma ona yr 10 e mafai ona o sasao i luga o le yr 12 ae o isi i le yr 11. Po o tagai le Matagaluega po o talafeagai pea lea vaega?

O le isi vaega lau Afioga, sei tilotilo le Matagaluega ia latou lava. O le tulaga lea e i ai, e moni o lea...ona o lea na toe faaopoopo le youth ma le sports, ua pei o le a felefele ai matafaioi a le Matagaluega, o le Matagaluega lava ia o le Matagaluega o Aoga ia faatino, patino lava le latou core function i mea tau aoaoga. Pe le mafai ona toe tagai i le toe fetuunaiga o nei Matagaluega ona ua le gata ina tele tele ai le Matagaluega, ae ua toe faaopoopo ia vaega sa i lalo i isi Matagaluega a le Malo.

O le isi vaega lau Afioga e faauma atu ai, a tagai o le Matagaluega a o lea e i lalo tonu lava i i i le Matagaluega ma lana regulatory function isi mea uma faapena. Ou te lagona lau Afioga ua tatau foi ona tagai le Matagaluega, taatia pea fai lava na o faiaoga ma le mea tau aoga, aveese le Curriculum ma latou, aveese le mea tau regulating, o la ua i ai le Matagaluega foi lele e fou o le SQA, ae taumafai tagai totoa lava e i latou mea tau faiaoga mo le agai i luma, ou te talitonu o se mea lea e tatau ona tagai i ai le Matagaluega i lenei taimi. Ma le faaaloalo lava i lau Afioga, faafetai.

**FOFOGA FETALAI:** Malo. Le sui usufono mo Palauli, e i ai se isi mataupu?

**Afioga AFOAFOUVALE JOHN MOORS:** Lau Afioga i le Fofoga Fetalai, na o sina mea lava lea e tuliloa ai le faamatalaga a le Tamaitai Minisita e tusa ai ma fesoasoani.....

**FOFOGA FETALAI:** Ia sei tulai mai le sui usufono mamalu.

**Afioga AFOAFOUVALE JOHN MOORS:** Ou te faamoni i le saunoaga a le Tamaitai Minisita, ae peitai ane, o le tulaga o le matou faleaoga, ou te manatu e le tutusa lea ma isi faleaoga, o le matou faleaoga sa faatamaia e le afi, ae o lo o i ai ia ni suesuega o lo o faapea ona talia, o lo o i ai se faamatalaga faapea ai o se e faigaluega i le aoga. Silasila foi lau Afioga i le Fofoga Fetalai, afai na faaleagaina e se tagata faigaluega a le Malo, o lona uiga e tatau ona toe faafoi e le Malo le mea ua faaleagaina, aua o le matou faleaoga sa fai lava e lo matou nuu e auala lea i le fesoasoani a Iapani faatasi ai ma tusaga sa faapena ona faatagisia. Ae ona la ua faatamaia le faleaoga i se mu, sei tulou, afai lava o le mea lea sa talia ai se suesuega a le Tinei Mu, afai lava o le tagata e faigaluega a le Malo na faatupulia lenei faalavelave, lona uiga o le Malo e ona le tagata faigaluega, o le Malo foi e faapena ona toe faafoia le faleaoga ua faapea ona faatamaia. Pei o le eseese ga lena o le faaletonu o le matou faleaoga lau Afioga, ma lou faaaloalo lava.

**FOFOGA FETALAI:** Ia lafo maia le finagalo o le sui usufono mamalu. E manatu foi o lea sa afea lou faleaoga i le asiasiga a le SPAGHL lea ou te taua, ma ua uma foi ona tuuina atu le lagolago e ala i le talosaga foi na tuuina mai i lea aso sa feiloai ai ma le aoga ma pule aoga. Ia o le a lafo pea o lea ua tali manino le Afioga i le Sui Palemia, ia ae aua le tuu ai le tatou tuitui. O lea lava ou te vaai atu i le tausaaafia o le High Komesina fou lea o Iapani, ioe, e manaia foi lou toe tuitui i ai ona e le o se mea na taupoina pe taupuleina o le mu o le faalavelave faafuasei na tupu.

Tulai maia lau Afioga i le Taitaifono.

**Tofa LENATAI VICTOR FAAFOI TAMAPUA:** Malo faafetai, faafetai mo manatu ma lagona ma fesili e tusa ai foi ma le tatou Lipoti, ia sei ou taumafai atu e avatu se faamatalaga ia e faapena ona faamanino nisi o vaega ua fesiligia.

Ia o le tulaga lava lea e sao lelei lava i le tele o le Matagaluega, pei o le 2003, o lea sa fai ai le gaoioiga lea a le tatou Malo ia tuufaatasi pe faaititia le Matagaluega ma le aufaigaluega, o lea sa tuufaatasia loa le Matagaluega o Aoga, Taaloga ma Aganuu, ma tuufaatasia ai foi le Tulafono e mafai ai ona latou galulue faatasi. E pei ona fesiligia e se isi, ia o le Lipoti lenei, ia o lea ua ta aofai uma i ai ia fautuaga e faasaga i le Matagaluega atoa.

O le fesili lea mo se asiasiga a le Komiti i Savaii, ia o lo o fuafua i le taimi nei, o lo o i ai nai polokalame o lo o fia oo atu ai ia le Komiti e asiasia pei o le polokalame lea na taua foi i se tasi o Lipoti, o le polokalame lea o le School Net, ae o le a taumafai ai e oo atu ai ia le asiasiga a le Komiti pe a tusa ai ma se tala o le tupe o lo o i ai e mafai ai ona oo atu ai le asiasiga.

O le vaega lea i le tulaga o faiaoga, o le le lava o faiaoga. O le Lipoti lea a le Komiti, o le tausaga lea na faaiuina i le 2011, e tumau lava le lagona o le Komiti ia i le latou Lipoti lea ua avatu, pei ona e fesiligia po o fea e taatia ai le sao, ae talitonu, o lo o fai pea fetuunaiga a le Matagaluega ma le Iunivesite i tulaga i tau o faiaoga, ia mafai ona matuu mai pe afai e talia, ona o lo o i ai foi lenei taimi o lo o i ai foi nisi pei ona saunoa nisi o sui usufono i le vaega lea o le degree, a ia mafai ona matuu mai e ua maua o latou diploma e omai e fai le galuega faafaiaoga i le taimi nei. E talitonu, o lo o fai pea fesootaiga i lea vaega i lenei taimi.

Ia, o le lelei ma le faalelelei o itula faaopoopo i aoga, o le a le umi ai se faamatalaga, o lea na saunoa i ai le Afioga i le Sui Fofoga Fetalai. Ae pei o se faamatalaga na oo mai i le matou Komiti, o lo o faaoga lelei lava itula faaopoopo ia i le taimi nei. E i ai nisi o latou polokalame o lo o faaoga i ai le taimi lenei, e pei o nisi o a latou polokalame pei o awareness programmes foi nei o Matagaluega a le Malo aemaise foi Faalapotopotoga mo le silafia e tamaiti aoga, ma nisi foi curriculum activities.

O le tulaga lea sa faaalua foi e nisi o sui usufono i le suesue lea o faalupega o tatou nuu, e faamalulu atu, o le Iunivesite lea sa e talanoa mai ai, o le Lipoti lea o

lo o talanoaina i le taimi lenei, o le Lipoti a le Matagaluega o Aoga, Taaloga ma Aganuu. O se taimi ona tatou toe oo lea i le Lipoti a le Iunivesite Aoao.

O le faasoa paleni lea o le fausia o tatou faleaoga. E le umi foi se faamatalaga o lea ua saunoa le Afioga i le Sui Palemia aemaise foi le Tamaitai Minisita, ona o le fesili sa tuusao mai i le Taitaifono. O le tali a le Taitaifono, ana faapea o lo o i ai le malosiaga i le matou Komiti, ua leva ona uma faleaoga o Vaimauga Sisifo i Aoga Tulaga Lua. Ia, o le tali lea e tuuina atu i le faafesili lea.

O le vaega lea o le Tulafono, i le faamalosiaga lea o le auai atu o tamaiti i itula aoga, o lea ua i ai le Komiti o lo o galulue faapaaga ai foi le Matagaluega o Aoga, aemaise ai foi le Matagaluega o Leoleo ma le Ofisa o Pulenuu. E tatalo atu ai foi i sui usufono uma a i ai foi se avanoa, o le tatou galuega lava e fai faatasi. Ia, lau Afioga, pei o le faamatalaga lea ma le faaaloalo lava.

**FOFOGA FETALAI:** Malo faafetai i lau Afioga i le Taitaifono. Sei tuu atu le avanoa i le sui usufono mo Faleata Sasae.

**Tofa AVEAU TUALA LEPALE NIKO PALAMO:** Lau Afioga i le Fofoga Fetalai, sei ou fesoasoani atu i nai vaega ia. Faafetai lava i le Taitaifono mo le avanoa foi e faamalamalama atu ai nisi o fesili. E tatau pea ona faamalamalama le vaega lea i le lava o faiaoga, ona o lea e saunoa mai le Susuga i le Sui Fofoga Fetalai i le ratio lea o le 1-20. O le ratio lea, tusa ua taaofai uma mai le aofai o faiaoga uma i Samoa, taaofai mai ma le aofai o tamaiti aoga uma lava i Samoa, ona fai ai lea o le ratio lea, lea e sau ai e 1-30 tamaiti aoga i lalo o le Primary School ae 1-20. A e tago la e faavasega i totonu o aoga ma nuu, e le lava. O se faataitaiga; o aoga ia na o le 6 faiaoga ae 8 levels, Year 1-Year 8 i lalo i le Primary, a o lea e 6 faiaoga. O lona uiga, e le lava. E i ai isi levels ia, e tailua levels i le aoga e tasi. E le taitai ona lava ai faiaoga. E sese la le faaupuga lea a le PSC, leaga o lea ua nonofo latou ma fai le ratio le number o faiaoga i le total number o tamaiti aoga i totonu o Samoa ona fai lea o le ratio lea, ae sese. E tusa o lea ua nonofo ma tuufaatasi latou nei i le Palemene aumai faatasi le aofai o tagata Samoa ona fai lea pe fia le aofai o tagata e te faipule ai. Ae sese la e le faapena le faiga e fuafua i le tele o le vaega. E ui ina o le fesili lea na aumai i le NUS i le mea lea o le Gagana Samoa, maitaulia foi o mea o curriculum, e le faapea e tausaga lava ma sui le curriculum. A faapea o le curriculum o le science o le plant, e 10 lava tausaga o le plant lava, ae ua ala ona aafia le sui usufono ona o ona alo e toalua lea e o e ave le mataupu lea e tasi, ae le faapea e alu atu nei ona toe sui lea i le tausaga lea. E leai e le faapena mea o curriculum i totonu o aoga, ou te iloa foi o la e malamalama ai le Susuga i le sui usufono e pei ona fesili.

Ou te iloa o isi fesili lea ua saunoa le Afioga i le Taitaifono. Ma le faaaloalo lava.

**FOFOGA FETALAI:** Ia, sei tulai mai le Sui Fofoga Fetalai.

**Tofa Agafili Patisela Eteuati Tolovaa:** Lau Afioga i le Fofoga Fetalai, na o se mea lava e fia faasao i le saunoaga a le sui usufono mo Faleata Sasae. O le foundation, e compulsory le Samoa pe e te manao i ai pe leai, e te alu lava e ave. Ana faapea e le compulsory, e le avea e lau fanau aua o la e lelei le la faa-Samoa. A o le mea lena e i ai, pe e te manao i ai pe e te le manao i ai, e oo lava i tamaiti e le o ni tamaiti Samoa o la e aoga i le tausaga faavae i le Iunivesite, latou te avea uma lava le mataupu lea o le Samoan. Ma le faaaloalo.

**FOFOGA FETALAI:** Ia, sei tulai mai le sui usufono mo Vaisigano Nu.1.

**Afioga Tufuga Gafaleata Faitua:** Lau Afioga i le Fofoga Fetalai, o le mea lava lea e fia faasao. O le saunoaga a le Sui Fofoga Fetalai o le mataupu lea o le Gagana Samoa ma o le fesili foi lea po o fea lou faasinomaga. Ou te talitonu o le matua taua lava o le fesili muamua lava lea i so o se Gagana Samoa ma le tuputupu ae o le tamaitiiti, po o fea lou faasinomaga, i faalupega foi o lou nuu, saotamaitai ma mea uma faapena, e alu atu lava i lalo i le taimi lea sei oo ina oti, e iloa le mea e sau ai i le aiga o lona tama ma le aiga o lona tina. O nisi lavelave o le Gagana Samoa, ae pei o le fesili muamua lava lea e muamua faafeagai ma o tatou alo i le Iunivesite. Faafetai.

**FOFOGA FETALAI:** Malo. E manatu o le a le faia se faafinauga i lea mataupu, o lo o gafataulimaina ma i ai pea le aiatatau i le Iunivesite latou te faasoasoina ai tulaga o curriculum mai lea taimi i lea taimi. Ma e manatu foi o lea ua logona le fautuaga i le Maota e ala i le tulaga lea. E manatu nei meaane ua faataumatatao se finagalo o la outou Komiti ma faamaumauga a le PSC, ae out e manatu o le itu lea e tataua ona puipui i ai le Fofoga Fetalai i le tulaga lea, e le o mafai tonu ona tulai mai le faamaninoina o le finagalo na faaalua e le Ofisa Sili o Pulega o le PSC. Ou te manatu ai ina ia aua nei i ai se tulaga feteenai, ona e taua foi le galuega faamalamalama, ua outou silafia le mataupu lea e agai i le taimi lena i le faamalamalamaina o le tulaga i le mataupu tau faiaoga. Ae talitonu o le aitu lava le moomu.

O le tulaga o le faamoemoe o a timaiga ma mea o lo o fai atu ai le tatou Palemene nei, tatou te piiama leaga o le mea e tasi, o le Palemene ma le tulaga i le PSC o le mea e tasi. Ina nei meaane ua saunoa mai la outou Komiti e sese le PSC, ona ese lea o le tulaga e mau eseese ai i ia tulaga. Ae po o a fetuunaiga, a tuu i le tulaga aoaotetele o la e foi e faamaonia mai le faamaninoga a le PSC, o la e foi e sao latou i lo latou talitonuga. Ae a tuu mai foi la ia tatou leaga o tatou lea e o e asiasi, ia o le mea lava e tasi, ae taua fautuaga e agai ai i totonu ina ia taoto i lagatonu le faamoemoe, e tasi lava le manulauti, ia faaleleia le tulaga o le atoa o faiaoga ma ia sologa lelei tualumaga o a latou galuega faatino mo le Matagaluega.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao se Pepa e tali atu ai i Fautuaga na tuuina atu i le Malo mai Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2013/2014 NU.83, LIPOTI A LE KOMITI O FAAFOEGA TAU  
PULEGA A LE MALO I LE P.P.2013/2014 NU.3, LIPOTI  
FAALETAUSAGA A LE KAMUPANI O PULEGA O FAAPUTUGATUPE  
TEUFAAFAIGALUEGA O MAVAEGA TAUSI A SAMOA MO LE  
TAUSAGA FAAIUINA ASO 30 IUNI 2012  
– ILOILOGA**

**Tofa Hon TUUU ANASII LEOTA (Taitaifono, Komiti o Faafoga Tau Pulega a le Malo):** Faafetai i lau Afioga i le Fofoga Fetalai mo le faatautaia o le tatou Fonotaga, malo le onosai.

Lau Afioga i le Fofoga Fetalai, out e faatu le lafo, *Ina ia faautagia e lenei Fono Aoao Lipoti a le Komiti o lo o tuuina atu ai ana SAILIILIGA, FAUTUAGA ma IUGAFONO.*

*Faaluaina e le sui usufono mo Alataua Sisifo, Sagaga le Falefa ma se tasi o sui usufono mo Aana Alofi Nu.1, Afioga Hon Leaupepe Toleafoa Apulu Faafisi.*

**Tofa Hon TUUU ANASII LEOTA:** Lau Afioga i le Fofoga Fetalai:

**“FAUTUAGA:**

I le maea ai o iloiloga a le Komiti, na faaiugafonoina ai e fautuaina le Malo:-

- 1. Ia saili se nofoaga lelei ma talafeagai e siitia i ai le Kamupani o Faaputugatupe Teufaafaigaluega o Mavaega Tausi a Samoa, aua le faatinoina ai o lana auaunaga. Ua fautuaina e le Komiti lenei vaega e ao ona ave i ai le faamuamua ona ua maitauina le aoga tele o lenei atinae a le Malo mo le teuina o iunite o faaputugatupe a le mamalu o le atunuu.**
- 2. Ia faaauau pea polokalame faalauiloa a le Faaputugatupe mo le faalauiloaina o lana auaunaga ina ia tosina mai ai le mamalu lautele o le atunuu faatasi ai ma polokalame faalauiloa mo atunuu i fafo e aofia ai Niu Sila, Ausetalia ma Amerika.**
- 3. Ia taulai ma le faautauta le silasila a le Pulega ma le Komiti Faafoe i atinae talafeagai ma le manuia e faipaaga atu i ai aua le faafaigaluega ai o tupe a le Kamupani.**

**IUGAFONO:**

I le maea ai o saililiga a le Komiti na faaiugafonoina ai e fautuaina le Fono Aoao:-

**Ina ia faamaonia le P.P.2013/2014 Nu.3, Lipoti Faaletausaga a le Kamupani o Pulega o Faaputugatupe Teufaafaigaluega o Mavaega Tausi a Samoa, mo le tausaga faaletupe faaiuina i le aso 30 Iuni 2012.”**

**P.P.2013/2014 NU.84, LIPOTI A LE KOMITI O FAAFOEGA TAU PULEGA A LE MALO I LE P.P.2012/2013 NU.44, FAAMATALAGA O SINI AUTASI A LE KAMUPANI O PULEGA FAAPUTUGATUPE TEUFAAFAIGALUEGA O MAVAEGA TAUSI A SAMOA 2013-2015 – ILOILOGA**

**“FAUTUAGA:**

I le maea ai o iloiloga a le Komiti na faaiugafonoina ai e fautuaina le Malo e faapea:-

- 1. Ia taumafai le Pulega o le Faaputugatupe Teufaafaigaluega o Mavaega Tausi a Samoa ina ia mulimulitaia fuafuaga ma polokalame faataatitia ua maea ona faalauiloa i le mamalu o le atunuu ia mautinoa ai le ausia o ia Sini Autu e pei ona faatulai mai i le Fuafuaga Autasi a le Faaputugatupe o Mavaega Tausi a Samoa.**
- 2. Ia ausia sini autu ua maea ona faataatitia o fuafuaga mo le maketiina atu ma le faalauiloaina o Fuafuaga Autasi a le Faaputugatupe ina ia mafai ai ona ausia fua o galuega (performance measure) i taimi faatulagaina mai le tausaga na amatalia ai, seia aulia le taimi ua fuafuaina e tatau ona taunuu ma ausia uma ai nei sini autu i le tausaga e 2015.**

**IUGAFONO:**

I le maea ai saililiga a le Komiti na faaiugafonoina ai e fautuaina le Fono Aoao:-

**Ina ia faamaonia le P.P.2012/2013 Nu.44, Faamatalaga o Sini Autu a le Pulega o Faaputugatupe Teufaafaigaluega o Mavaega Tausi a Samoa mo tausaga 2013 i le 2015.”**

Ma lou faaaloalo lava.

**FOFOGA FETALAI:** Malo faafetai saunoa i lau Afioga i le Taitaifono. Ia, ua tatala le avanoa mo a tatou felafolafoaiga.

Tulai mai se tasi o sui usufono mo Vaimauga Sisifo, Tofa Lefau Harry Schuster.

**Tofa LEFAU HARRY SCHUSTER (Vaimauga Sisifo):** Faafetai tele i lau Afioga i le Fofoga Fetalai mo le avanoa. E faatalofa atu i lau Afioga faapea foi sui usufono mamalu uma o le Maota, i lau Afioga i le Failautusi ma le Ofisa, ae tainane le paia i Alii ma Tamaitai Ofisa Sili o Pulega ma Pule Sili o Matagaluega ma Faalapotopotoga a le Malo. E faatalofa atu foi i le tapuaiga a Samoa ma lo matou itumalo o le Vaimauga Sisifo.

E muamua e tauala atu i lau Afioga i le Fofoga Fetalai, e momoli atu le faafetai tele i lau Afioga i le Taitaifono ma le Komiti mo galuega maeaea i le tapenaina o le Lipoti lea mo le UTOS. E momoli atu foi e tauala atu i lau Afioga i le Fofoga Fetalai le faafetai tele i le Afioga i le Minisita ma le Tamaitai Pule ma le afaigaluega. O le tasi lenei atinae aoga, taua ma vave ona ola i atinae a le Malo. E lagolagoina le atinae ma le faafoeina o galuega ma le autu ua faatuina ai le atinae, ae i ai lava nai popolega lau Afioga i le Fofoga Fetalai e fia fai atu ai sina faamatalaga.

O lau matau atu ona e fou le atinae lea, ae ou te matau atu e le gata o le Tulafono lea e faatino ai galuega a le Faalapotopotoga, ae faapea foi isi Tulafono na tatou pasia. E foliga mai o se taimi i le lumanai e faaono agai le Faalapotopotoga lea i se Faalapotopotoga tutotonu e mafai ona faatauina ai ni sea a i tatou po o tagata lautele i atinae a le Malo ma nisi atinae lea e tau faapapalagi o stock exchange. Ona o lea faatoa amata le atinae, e i ai nai ou popolega lea e i ai. A faatusa le faatinoina o le atinae lea e i ai nei o le UTOS ma le stock exchange aua o le stock exchange i fafo o le matafaioi a le Malo o le faatinoina lea o Tulafono ma auala e puipui ai tagata lautele i a latou tupe ia e i totonu o le stock exchange, ae leai la se aafiaga o le Malo faapea o se tino o le Malo po o ni tagata e faatuina e le Malo lea e faia le atinae, ae e pei ona ou fai atu ona o lea e pei o se mea faatoa amata o lea e foliga mai ai o lea e faatino e se Faalapotopotoga a le Malo le tulaga lea.

O le popolega ia te au i le tulaga lea pe a faapea e alu ai pea i le taimi lenei agai i le lumanai, o lea la o le a tauva le vaega lea a le Malo ma isi atinae ia e pei o faletupe ma isi vaega ia e nono mai ai tupe. O le popolega ia te au e faigata tele i isi tagata ia i faletupe ma i latou o lo o tauva i tupe mai isi Faalapotopotoga ma tatou ona tauva ma le Malo, a o le Malo lea na te faia Tulafono e faatino ai le galuega lea, o le Malo foi la lea o le a laufali toe taalo. Ou te iloa a ou tilotilo atu i isi Tulafono ia na fai, a faapea e see atu i se vaitaimi ma faatu lava lana Faalapotopotoga tumaoti e leai se aia a le Malo i le faatinoga o o latou tiute, ona leai loa lea o se popolega lea e ia te au i le taimi nei, ae ou te fia vaai la lau Afioga i le Taitaifono i se vaitaimi pe mafai ona faataatia mai e le Malo le transition period lea e i ai ona tatou oo lea i le tulaga lena ona e faigata tele i le taimi nei ona faapea o la e tutusa le tauvaga a le UTOS ma isi faletupe e pei o le ANZ, Westpac, Samoa Commercial Bank, Samoa National Bank ma isi foi

kamupani o la e nono mai ai tupe. E faigata tele ona tauva ma le Malo i le tulaga lea.

O lona lua lau Afioga i le Taitaifono, o popolega ia te au i le tulaga lea e i ai nei ona o tupe ia e avatu e le UTOS i tagata lautele ma Faalapotopotoga a le Malo e invest ai, o lo o faaaogaina ai atinae a le Malo. O lou popolega la i le itu lea ona e i ai le vaega o le Faavae lea e i ai, so o se tupe lava mo le faatinoina o galuega a le Malo e aumai i totonu o le Palemene e pasia e le Palemene ma fai i ai o tatou sao i tupe e manaomia e faatino ai galuega a le Malo pe ua tele naunau pe laitiiti, ae i ai le manatu e taua ona ua lotea e le Palemene. Ou te popole la aua a faapea o le a alu faapea le tupe i le UTOS, e tele le vaegatupe. E avatu ai le faamalo i le Tamaitai Pule ma le aufaigaluega ona na amata le UTOS pe na o le \$1miliona i le taimi na amata ai, a o le taimi lenei pe a sao lau tala lea, e pei lava ua oo i le \$100,000,000 le tupe ua oo i ai le UTOS. O le popolega la ia te au, o le a faaoga la le auala lea e alo mai ai i manaoga lea o le Faavae ia sau i le Palemene tupe e faaoga e fai ai galuega a le Malo, a o le a faau la i tua i le UTOS. A alu la i tua i le UTOS ua leai se sao o le Palemene i le faaaogaina o tupe ia, a o le a pulea e tagata o le Board a le UTOS. E moni la e toe sau le Lipoti i totonu ia tatou, ae na o le lipoti mai ae leai se tatou aia e fai atu ai i ai ni manatu i le faaaogaina o tupe ia.

Lau Afioga i le Fofoga Fetalai, na o sina manatu vaivai lea e fia faaali atu mo le Lipoti e pei ona tuuina mai e le Afioga i le Taitaifono ma le Komiti. Faafetai tele mo le avanoa, ia manuia tele le Fono.

**FOFOGA FETALAI:** Malo saunoa. O le a tuu atu le avanoa i se tasi o sui usufono mo Salega, Afioga Afualo Wood Uti Salele.

**Afioga AFUALO WOOD UTI SALELE:** Faafetai i lenei avanoa taua lau Afioga i le Fofoga Fetalai, ae faafetai foi mo le Lipoti. O le a agai sao sau faamatalaga i le Lipoti ona o lenei lava atinae e le o se atinae ua loa ona tulai mai. E tele foi sona sao i le atinae o le atunuu aemaise foi le faafaigaluegaina lea o le tamaoiga e le gata o Matagaluega a le Malo po o tino tumaoti foi o le Malo, aemaise foi o le mamalu o le atunuu. O le tulaga la o lea e tulai mai ai, o le taimi lava ia na amata mai ai le atinae, o le tele ia o fesoasoani sa tau tapenapena ina ia mautinoa ua tu le tama. Aua o le upu moni lava si tamai taimi lava lea na tapena ai.

Ou te masalo o le tele lava o pepe e i ai laasaga e faasolosolo ai, ae pau lea o le tama o lea na faafailele, vaeane lava lou gutu ma le afi, na ona fanau lava tu loa ae e le i totolo ona o le mafuaaga lena. O le uiga la o lau faamatalaga, o lea e i ai isi fuafuaga ia ua uma ona taoto o lea foi ua uma ona pasia i lalo o faiga ia ua i ai a nei e foliga mai ua leai ai se avanoa lea mo se malae laugatasi e taaalo faataasi uma ai po o le level playing field aemaise lava la pe a vaavaai i tua i a tatou paaga ia i le aufaipisinisi ia e i ai nei o le private sector, ona o lea e pei ua faapito le alofa o lo tatou Malo, o lea ua to ai le matupalapala ua aveese ai le lafoga lea o le capital gains tax mai tupe ia e faafailele i ina.



E le faapea la e leaga ma ou te lagolago foi i ai ona o lea faatoa tau tapena, ae ia silasila totoa lau Afioga i le Taitaifono aemaise o le Minisita ma le Tamaitai Pule ina ia i ai se vaitau aua e le tatau ona faaauau ai pea lenei fuafuaga, aua o se fuafuaga o lea sa tapena ina ia mautinoa e tulai mai ai se tulaga e tatau ona i ai, ae tatau pea ona i ai se avanoa e ave ina ia mautinoa e laugatasia le malae lea e taaalo faatasi ai ma a tatou paaga lea tatou te galulue faatasi i le aufaipisinisi ma Faalapotopotoga tumaoti.

O le fesili faamolemole lau Afioga i le Taitaifono, o le a se tele o le aufai saofaga po o i latou foi o lea ua mafai ona aumai o latou tamaoaiga e faafaigaluega iinei i lenei vaitau? Aua o le upu moni lava e oo lava i Ekalesia ua aumai a latou tupe. E tele lava tupe ona o lea foi ou te faalogologo o le tele ia o le tupe tului lea e toe maua mai aua foi o lea ua aveese le lafoga lea o meatotino po o le capital gains tax. O lea la ua tele lava le fesoasoani lea ua toe foi mai i totonu e le gata o Ekalesia ma Faalapotopotoga ma pisinisi foi, ae ia mautinoa foi e fia malamalama po o le a le tele o le aufai saofaga lea ua faafailele o latou tamaoaiga i ina.

O lau fesili lea ma le agaga faafetai. Faafetai i lau Afioga i le Fofoga Fetalai mo le avanoa.

**FOFOGA FETALAI:** Tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Faafetai lava i lau Afioga i le Fofoga Fetalai mo le avanoa. E faafetai foi i le Taitaifono o le Komiti, lau Afioga i le Taitai o le Vaega Faaupufai fou ma le Komiti i lenei Lipoti ua tuuina mai.

Ou te talitonu o le tasi lenei atinae a le Malo e aupito sili ona taua ma e momoli atu ai lau faafetai. O le uiga o lau faamatalaga, o tatou lava ia i lo tatou atunuu o Samoa e oo lava foi i lou tagata, e augata tele e teu le tupe. Na o le faaaoga, faaaoga, faaaoga aua e le iloa po o a tupe e teu ona e tele mea e fai. O le teugatupe lea po o le fund lea ma mavaega nei o lea ua mafai ai e o tatou tagata ma so o se tagata lautele ona teu tupe. E i ai le mea e tau o le teu au tupe mo oe ma lou lumanai a taeao ma lau fanau. Ona pau foi lea o le vaega e taumafai e spread le wealth, e tufatufa le tamaoaiga ina ia faatutusa i le tele o tagata. Aua o le faafitauli lea e tulai mai e laugatasia ai atunuu uma o le lalolagi e lavea ai ma tatou, o le tamaoaiga e tele lava ina uu e tagata pe 5% pe laitiiti ifo, a o le lautele o tagata e suffer e leai ni avanoa faapea. O le avanoa la lea o lea ua fai e le Malo mo i tatou uma o tagata e vaivai le tamaoaiga e teu ai faavaitaimi tupe ma faaaoga le vaega lea e o e faatau sea i le tele o kamupani tetele nei e le gata o Samoa a o atunuu i fafo. Ia manatua foi le mea sa i ai, a faasalalau kamupani a le Malo e ave i tua e faataufofo e laitiiti lava ni tagata e mafai ona o e faatau, e le toatele nisi. A o le avanoa la lenei e mafai ona faaaoga ai le trust, le mavaega lenei e o e faatau mea tetele nei e pei o le mea lea na o ai faatau le SamoaTel. O lona uiga e tusa lava pe na o le \$100 lau tupe lea e i totonu i o, a o la ua i ai le sao o oe le tagata vaivai i totonu o le SamoaTel. O le agaga taua lea o lea ou te fiafia

ai au ia, ma ua tatau foi ona faatau motu e le UTOS le Blue Sky i lenei taimi pe a fua i le malosi o le UTOS le la ua i ai i le taimi lenei ina ia tagai i le agai i luma.

Atonu o le mea lea o lea ua ala ai ona i ai le pule faamalumalu a le Malo i le taimi nei ona o lea faatoa tau amata, peitai i lau vaai i le mea lea ua i ai nei le UTOS i le malosi ma le lelei ona faafoe e i latou o lo o faafoeina i lenei taimi, e momoli atu ai lau faamalo ma le faafetai. O Lipoti ia na aumai e le Komiti ma ou te talitonu foi e le o maua e le Komiti ae e tau fesoasoani i ai, na aumai le latou sini autu ma le latou faamoemoega, e oo atu i le 2015 ua oo i le afe ni tagata fai iunite. O le taimi lenei i le Lipoti ua tuuina mai, e 1,800+ toetiiti lava 1,900 tagata o le Unit Trust la ua i ai i le mea lea.

E le gata i lea e tasi le fono sa ou auai ona e i ai foi sina au tupe laitiiti la e i ai. Na ou alu atu faatau na o le \$1.00 ma sene i le iunite, a o le taimi lenei o lea ua \$1.46, ua toetiiti lava \$2.00. A o lau matau i le tele o tagata e i ai i ina, ua ou fiafia lava ou te vaai i ai i le toatele o le atunuu le public servants lea e o atu i fono nei ua fiafia ona ua teu a latou tupe ma ou te faafetai i ai. E le gata i lea o le investment portfolio lea na aumai i le latou sini autu ua \$39milion e le atoa se \$40milion, a o le taimi lenei ua ova i le \$70milion le investment portfolio lea ua i ai i o i le Unit Trust. O lona uiga o se vaaiga lelei tele ma o se mea ua matua lelei tele. O lea e i ai atugaluga o nisi o sui usufono ma e sao foi latou i le faatauva lea ma commercial banks ma le private sector. A o lau tala lau Afioga i le Fofoga Fetalai ma le mamalu o le Palemene, ana le tulai mai le UTOS e le sau i lalo interest rates a commercial banks ma o le mea moni lea. Talu ona ou ola i inei i Samoa ma ou loan i inei, e leai se interest rate tului e i lalo o le 10%. O lea faatoa amata ona tatou vaai ua sau i lalo i le 8% talu ona tulai mai ona o lea ua amata ona vaai i ai, e tele le tulaga lea ua i ai nei le tulai mai o lenei vaega fou.

O le Development Bank o atinae, e tasi lea mea o lea ua taumafai nei i ai, a o a latou interest rate foi e fai sina mauualuluga, ae faafetai o lea ua amata ona tulai mai lenei vaega e tagai i ai le Malo. Aua e le faapea o le a pulea ai pea e le Malo ae na ona faamalumalu ai lava o le Malo i le taimi nei. E i ai le taimi e tulai mai ai aua e tele le mea lea ua oo i ai le latou return e ova i le 20%. O le luitau la lena pe faapefea ona faaauau ai pea ma tumau ai pea i le ituaiga mauualuga lea e i ai nei.

O le isi luitau o le vaega lea e tetele tupe po o a ituaiga aiaiga e tamau ai. O lona uiga e mafai ona e alu atu nei i le taeao tuu ai i totonu sau fia miliona, ae uma le tausaga toe aumai uma i tua. O vaega ia e tatau ona tagai i ai ona e tatau ona fuafua vaega ia ona e faaono afaina ai lea polokalame a le Malo. Aua o le taimi lenei e le mafai ona avanoa mo i tatou nei e fai aitalafu lautele. O lo o ua i ai avanoa o Matagaluga a le Malo po o SOEs, a o lau tatalo ia talosia ia vave se taimi e maua ai se avanoa o tatou e fesoasoani ai i le atunuu lautele aemaise lava i le aumai i lalo o tului o le mea o lo o tatou lauga ai pea i aso uma ma aso uma lava, ina ia fesoasoani i le atinae o le atunuu. Afai o le tali lea ina ia taumafai ona tuu mai i lalo aua o lea tatou te talanoa i le regulate ina o faletupe ona o le mea lea e i ai, ua leva ona tuusaunua faletupe i a latou tului, o le open market. O le a le mea lea e i ai, ua fia sefulu tausaga e leai ma se sau i lalo o se tului aua foi o la

e talatalanoa faatasi ma tuu ai lava i luga a latou interest rates? Ua leva ona tatau ona regulate. A le mafai la ona regulate, o le tasi la lea vaega e regulate atu ai. Ia fai loa e le Malo le auala e aumai ai i lalo a latou interest rates.

E avatu le faamalo i lau Afioga i le Taitaifono o le Komiti aemaise i latou o lo o gafa ma le puleaina o nei tupe ma o le fautuaga i lo tatou atunuu, faaoga e aoga mo oe mo lou lumanai. Ma le faaaloalo lava faafetai.

**Tofa Hon Fonotoe Nuafesili Pierre Lauofo:** Lau Afioga i le Fofoga Fetalai.....

**FOFOGA FETALAI:** Ia o le a tuu atu le avanoa i le Afioga i le Sui Palemia.

**Tofa Hon Fonotoe Nuafesili Pierre Lauofo:** E tulai atu e momoli atu le faafetai i le sui usufono lea faatoa maea nei ona saunoa, ua maua mai lava e le sui usufono lea ia se tasi o manulauti a le Malo, o le faatupulaia lea o faiga faatauva i va o pisinisi, o lea ua maua tonu mai lava, competition, silasila la i ai, o lea e lauga soo le Itu Agai, e aumai ia tului, e faapefea la ona aumai i lalo tului? Ia lea, a la lea ua maua tonu mai lava. O lea la e sosolo lava i le tulaga lelei ia taumafaiga ma galuega a le Malo. O lea la ua.....tasi lenei Faalapotopotoga UTOS ua tulai mai ua fai ma faamama avega ma laveai i le tele o isi foi pisinisi ma tagata o le atunuu. Ae manatua foi, a aumai i lalo tulaga o tului, o ai e manuia ai? O tagata lautele. O le agaga lena o le Malo, o tagata lautele. O le tulaga lava ia i le nono mai o tupe i le UTOS e Faalapotopotoga a le Malo, e manatua foi, o Faalapotopotoga a le Malo o la foi e i ai a latou Tulafono, Tulafono e faavae ai, ia o isi foi o Faalapotopotoga o lo o lesitala i lalo o le Tulafono o Kamupani 2001. O lona uiga, o la e i ai malosiaga faale-Tulafono e nono ai ia tupe mai le UTOS mai atinae a le Malo, o lona uiga la i lou taofi, e le o noatia le faavae ia le o o Matagaluega ma Faalapotopotoga nei a le Malo e nono mai i le UTOS ia aua atinae a le Malo. O le tali atu lea lau Afioga i le Fofoga Fetalai.

**FOFOGA FETALAI:** Malo, o le a avatu muamua le avanoa i le sui usufono mo Faleata Sasae ia ona tuu atu lea o le avanoa i le sui usufono mo Samoa Aoao. Tulai mai le sui usufono mo Faleata Sasae.

**Tofa AVEAU TUALA LEPALE NIKO PALAMO:** Faafetai i lau Afioga i le Fofoga Fetalai, masalo e le umi se manatu. E pau lava lau fesili i le Komiti i lalo o latou asiasiga, o lo o taua mai ai le Kamupani lea a le EZY Money Transfer ea faamolemole, lea e i ai i faapea o lo o faipaaga ma le UTOS i Niu Sila. Na ona ou fia malamalama lava po o a ni aiaiga e mafai ai ona avea ni kamupani faapea e fai ma paaga a le UTOS? Ia o le isi foi au fesili, po o i ai se faamoemoe a le UTOS e sue ai se kamupani i isi atunuu pei o Ausetalia, Tutuila e faipaaga pe afai o lea ua mafai ona faipaaga faapea ma kamupani nei? Ae o lau fesili lea ou te fesili atu ai, pe i ai ni tuutuuga e mafai ai ona apply nisi o...po o le mea e faatauofa ia faiga o lea vaega o le auaunaga? Faafetai lava.

**FOFOGA FETALAI:** Malo. Ia o le avanoa mulimuli, tulai mai.....ia o lo o i ai nai isi sui usufono, tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon PAPALIITELE NIKO LEE HANG (Palota Taitoatasi):** Faafetai lava i lau Afioga i le Fofoga Fetalai mo le avanoa. E muamua foi ona faamauina se manatu i le taua ma le aoga foi o lenei Faalapotopotoga fou a le Malo. Ae ona e i ai lou malamalamaaga i tulaga lea o tupe ia e nono atu e pei lava na o Faalapotopotoga a le Malo, ae o lau fesili lava i le Taitaifono, pe na fesiligia le Pulega pe eligible ia le aufaisaofaga a le au Unit Trust Holders e nono mai ni tupe i le Unit Trust, faamolemole? Ma le faaaloalo lava.

**FOFOGA FETALAI:** Malo, tulai mo le avanoa mulimuli le sui usufono mo Falelatai ma Samatau, ia ona tali ai lea o le Taitaifono.

**Afioga TAEFU LEMI (Falelatai ma Samatau):** Malo faafetai i lau Afioga i le Fofoga Fetalai, e fia fai foi se manatu laitiiti e uiga i le Lipoti. E momoli le faafetai i le Taitaifono ma le Komiti e tusa ai o le Lipoti maeaea, e momoli foi le faafetai i le Faalapotopotoga ia le UTOS i le Taitaifono, le Ofisa Sili aemaise o le Pulega e tusa ai o le lelei faafoeina o le tatou Faalapotopotoga. E lua lava vaega lau Afioga Fofoga Fetalai, e lua lava itu lelei o le UTOS ta te fia taua. Muamua ua uma ona saunoa i ai nisi o sui usufono, o le tului, ua pau i lalo tului, ou te iloa foi e le o le maualalo lea e oo i ai tului a le UTOS, ae ona e i ai isi o Faalapotopotoga tetele a le Malo o lo o maua mai ai tupe a le UTOS, ia e sau foi lava ma le latou tuutuuga i le latou tupe tului e manaomia, ae ana tuu mai lava i le faitalia a le UTOS, ia e i ai lava le talitonuga e meimei mai lava i lalo tatou tului nei ia ma taumafai foi e tosotoso i lalo tului a faletupe tetele.

O le lona lua o vaega e sili ona manaia, ia o le faasalalau mai o fonu a le UTOS ae topetope loa le faatauga o le taga talo a si toeaina tua i le maketi, ae sau i le fonu. Aisea? Leaga o la e i ai ana iunite i le UTOS, sa faatau ana iunite e \$50 le tau o le iunite e tasi, ae avea ai oe ma sui o le aufai iunite. Ia o se mea ua tau latalata la i mea ia e taua o shares lau Afioga i le Fofoga Fetalai, ia ua avea ai tagatanuu o Samoa tatou nei mai tua e taumafai a tatou faatoaga ma lafumanu ma tulaga faapena, e avea ai tatou ma sui o le Faalapotopotoga nei e ala i a tatou iunite.

**FOFOGA FETALAI:** Malie lava le sui usufono mamalu, sei avatu...O le a le mea lea?

**Tofa Lealailepule Rimoni Aiafi:** Lau Afioga e le fia faalavelave i le saunoaga a le Afioga i le sui usufono mamalu, ne i te i ua sasi lana....a o la e faafofoga mai, o lea faapea e \$50 i le iunite e tasi, e \$50 le minimum lau tupe maualalo e mafai ona tuu i totonu, ae \$1 ma ona tupu i le iunite. Faamolemole lava.

**FOFOGA FETALAI:** Ia tulai mai le sui usufono mamalu.

**Afioga TAEFU LEMI:** Malo faafetai i le saunoaga a le sui usufono mamalu, a o le tulaga lena o lea e i ai. Pau lava lena o le maualalo e mafai ona e aapa i ai e \$50, ia ona e laalaa loa lea i le UTOS e faatau ai au iunite. Ae o le tulaga lelei lena lau Afioga i le Fofoga Fetalai, ae ua taua e nisi o sui usufono, e fia momoli foi lau faafetai i le tulaga o lo o faavae ai le vaega lea lau Afioga i le Fofoga Fetalai, ua i ai lava le Board of Director le Taitaifono, le Ofisa Sili ma le Faalapotopotoga, e tapenaina lea vaega o le auunaga ia ma aloalo ese ai mai isi tulaga foi nei e ono faitauina ai ia pei e faanefu ai foi le silasila agai i le lelei faatinoina o le Faalapotopotoga. O le mea lea e momoli ai lau faafetai tele i le Taitaifono, le Komiti Faafae aemaise le Ofisa Sili ma le afaigaluega. Manuia le Fono.

**FOFOGA FETALAI:** Malo, malo faafetai. Le sui usufono mo Sagaga le Falefa e te fia saunoa?

**Tofa TUISA TASI PATEA (Sagaga le Falefa):** E faafetai atu i lau Afioga i le Fofoga Fetalai mo le avanoa....

**FOFOGA FETALAI:** Tulai maia leaga o lea e le o afio le Afioga i le Minisita o Tupe e te fesoasoani mai i le mataupu.

**Tofa TUISA TASI PATEA (Sagaga le Falefa):** Ia o le ala foi lea o le fia tulai ona o nisi foi o faafesili ua fesiligia ai le tatou UTOS. Ia pei lava ona silafia, pei foi ona faaalai e nisi o finagalo ua folasia i lumamea, ia o le tasi lenei vaega o itutino o lo tatou Malo e lei umi lava ona faagaioi, ia e moni ai, e lei totolo, na ona fanau mai lava savali loa, pe tamoe foi. Talu ai la i le 2011, ia pei lava ona tagatagai i ai i Lipoti, na o le 150 i latou na amataina, ia ma le portfolio sa i ai, ia o le Trust Portfolio lena sa i ai se \$1.3miliona ma le investment portfolio lena e \$500,000, i le taimi nei pe a fuafua i se taimi puupuu ona pei ona atagia mai i fesili pei ona fesiligia e sui usufono mamalu o le Maota, ia o le aofai o iunite lea ua i ai nei mai lava i le 150 i le 2011, o le taimi nei, ua \$1,188 mai i le taimi nei i le tatou trust portfolio lea ua i ai nei, ia ua \$29miliona toeitiiti lava oo i le \$30miliona, ma le tatou investment portfolio, ia ua \$71.8miliona, o lona uiga a tuufaatasi, ia ua ova ma le \$100miliona i le taimi nei. Ia o sina faamalamalama i lenei foi atinae. E pei foi lava o atinae a le Malo, e taumafai lava aua se manuia lautele o le tatou atunuu. E avatu ai foi le faamalo i le tamaitai pule sili o lo o faatautaia lenei vaega o le atinae o le tatou atunuu le UTOS, aemaise foi o le afaigaluega ona o le latou matafaioi, o lea ua atagia le matagofie ma le...e pei foi ona saunoa nisi o sui usufono, ia o le avanoa lenei a \$50 lau tupe e mafai lava e alu e avea oe ma unit holder. E mai foi i lea vaitaimi ia ua lua a tatou...ua maea dividends e lua, pei ona maitau i le Lipoti, e ese foi le matagofie o le tulaga

ua oo i ai le tatou vaega lea o le tatou atinae o le Malo i le tatou UTOS. Ia o se taumafai atu lea e fesoasoani atu i le Afioga i le Taitaifono.

**FOFOGA FETALAI:** Malo faafetai le fesoasoani mai i lau Afioga i le Minisita Lagolago o Tupe o le tatou Matagaluega.

Tulai mai lau Afioga i le Taitaifono e faaiu mai le saunoaga ma mea na afeafea e sui usufono.

**Tofa Hon TUUU ANASII LEOTA:** Lau Afioga i le Fofoga Fetalai, o faiga faavae a le Malo o le faaputugatupe teu faafaigaluega o Mavaega Tausi a Samoa, o se atinae a le Malo e nafa ma le tuuina atu o auala o tupe teu faafaigaluega mo so o se tagata Samoa, o lo o alaala ma papaao i nuu ma afioaga i tua, o se tautai ia po o se faifaatoaga lau Afioga o le...e manino lava le mafuaaga o lenei Faalapotopotoga na faatulai e le Malo ona o le naunautaiga, ina ia fesoasoani i o tatou tagata, ina ia mafai ona maua se avanoa e maua ai a latou seleni ona aumai lea e teu, teu faafaigaluega. Ae manatua foi lau Afioga o tatou i le soifuaga faa-Samoa, e tele ma anoanoai a tatou faalavelave, ia ae o le agaga lava ia ina ia maua se avanoa e aumai ai a tatou seleni ma faaputupu aua le lumanai.

Ia o le tulaga o lo o i ai le Faalapotopotoga lenei, e mafai ona teu nei lau tupe, tupu le faalavelave taeao e mafai foi ona toe tala i tua e aunoa ma ni aiaiga foi la lea e taofiofia ai, a teu nei foi, sei tala i le Faiga Palota, ia o tuutuuga lava ia.

Masalo o lea ua tali manino le Minisita Lagolago o Tupe ua tali ai nisi o faafesili aemaise foi le Afioga i le sui usufono mo Faleata Sisifo, leaga o le sui usufono lea o le fautua sili i le Minisita o Tupe, o lea ua manino atoatoa le Maota lenei i lana faaaliga manino.

O le fesili lea na aumai i le EZY Money, o se trial lea na fai e le Komiti Faatino ma le Ofisa ina ia fai pe mafai ona faatino ai aemaise o le tatou mamalu o le atunuu o lo o alaala ma papaao i Niu Sila, taumafai e lafo mai a latou seleni ia e faaputu ai i inei, o lea la ua maea ua faamuta ona e fai foi sina faigata foi o Financial Regulation a Niu Sila latou, o pa puipuia foi le faafaigofie ona aumai o seleni i fafo i auala faapenei, ma o lea la ua faamuta, ae o lo o i ai lava le taumafai o le Matagaluega i Niu Sila, Ausetalia ma Amerika, ina ia aumai a latou seleni e faaputu i inei a i ai le taimi e malaga mai, ia e le o tausailia ia pemita e aumai ai a latou tupe i Samoa nei.

Ia o lea ua manino le tulaga i le aofaiga o e o lo o fai Sea ia po o le au umia iunite i le faaiuga ia Iuni i le 2012 e 516 i latou na i ai, o lea ua manino ia ua latalata i le 2000 ia ma vaegatupe uma ua faamanino mai, o le a le toe oo i ai se faamatalaga.

O le faafesili pe mafai ona nono mai ai ni...ia o lea foi ua faamanino atu, e le o talafeagai ma e le mafai ia tulaga, ona o tuutuuga lava a le Ofisa ina ia malupuipuia ia seleni ma tupe a le mamalu foi o le atunuu o lo o faapena ona teuina ai. Ae manatua foi o lo o matua lelei ia le tului, masalo o i o lo o maua ai le tului aupito sili ona lelei i totonu o Samoa, ia o lea foi e fautuaina le mamalu o

le Maota, ave ai a tatou seleni e tapenapena ai mo le Faiga Palota i le lumanai. Ma lou faaaloalo, manuia le Fono.

**FOFOGA FETALAI:** Ia sei toe tulai mai le sui usufono mamalu mo Faleata Sisifo.

**Tofa Lealailepule Rimoni Aiafi:** Lau Afioga i le Fofoga Fetalai, o se vaega lava lea e le o...lau Afioga i le Taitaifono o lo o faapea mai o au le fautua sili a le Minisita o Tupe, leai, o la e i ai i latou o lo o totogi e le Malo e fautuaina le Afioga i le Minisita o Tupe, o au, o au o le uo a le Minisita o Tupe, pei foi o au, o le uo a le sui usufono mo Siumu. Ae faafetai o lea ua saunoa le sui usufono mo Siumu i le Lipoti, o lea ua vaai i ai, se e matautia le faiga o galuega a si toeaina, tuu na mea e tau fai, ae alofa ia Faumuina. Ma le faaaloalo lava.

**FOFOGA FETALAI:** Tulai mai lau Afioga i se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

**Susuga Hon Papaliitele Niko Lee Hang:** Faafetai mo le avanoa, ona o lea ua maea le saunoaga matagofie a le Afioga i le Taitaifono ae sa ou fesiligia le tulaga o le vaega foi lea o le Unit Trust holders, ona o lea e saunoa mai le Taitaifono i le aoatetele o le atunuu e le mafai ona nono ai ni tupe. A o lau fesili pe agavaa la le vaega lea e fai sea i totonu o le Unit Trust, le au Unit Trust holders i lenei vaitau aua ou te le o malamalama i ai. Na pau lava lou malamalamaaga e faaoga e le tatou Faalapotopotoga, e mafai ona fesoasoani i ai le Unit Trust e nono atu ai ni tupe e faaoga ma toe totogi i le Unit Trust. A o lau fesili; pe agavaa la le aufai-sea i le faamanuiaga lea, ona o le tului maualalo lea ua folafolaina i le aoga o le Unit Trust, ae a mafai la ona nono atu i le aufai Unit Trust holders, ona faaoga foi lea e latou lea faamanuiaga. Ma lou faaaloalo lava.

**FOFOGA FETALAI:** Ia, tulai maia lau Afioga i le Taitaifono e tali faaii i nisi o fesili.

**Tofa Hon TUUU ANASII LEOTA:** Faafetai. O le faafesili a le Afioga i le sui usufono mamalu, o lea sa taumafai atu, po o oe o se fai-sea po o se isi mai tua, e le faatagaina lava lea vaega, e le mafai ona faia se nogatupe. A faapea o lea e i ai sau sea i totonu ae ou alu atu la e taumafai sau nonogatupe, e leai e le mafai ona tuuina mai ia te au, e faapena foi la i le tagata i tua. Na pau lava le taumafaiga a le Ofisa, o le sailia lea o ni atinae lelei e manuia ai seleni a le atunuu lea e teu ai i i, ina ia maua ai se return po o tupe tului mai tupe sa avatu e teufaafaigaluega ai. Ma lou faaaloalo.

**FOFOGA FETALAI:** Malo. Ou te manatu ua manino ma malamalama le taumafai mai a le Afioga i le Taitaifono mo le tali malamalama a lenei foi Faalapotopotoga taua a le tatou Malo. Ma e le faaitiitia ai le agaga faafetai e

momoli atu i le faafoega a le tatou Pulega, e le natia le tele ma le anoanoai foi o le tulai mai a lenei Faalapotopotoga taua e lei leva ona faatuina ma atiaeina, a ua tatou vaavaai i le tulaga lelei. O moomooga alofa e molimoli atu pea, e lei fausia Roma i se aso se tasi, e matimati ma faatulaga ai polokalame ina ia taulu taulu taulu mo le lumanai, ina ia avea o se tasi o Faalapotopotoga e tulai mai e fesoasoani mo le atunuu.

*Na faamaonia le Lipoti.*

**FOFOGA FETALAI:** E tusa ai ma le Tulafono Tumau 54, e ao i le Malo ona tuuina mai i le Fono Aoao Pepa e tali atu ai i Fautuaga na tuuina atu i le Malo mai Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

Ia, ou te manatu o lea ua tatou taunuu i le tatou taimi malolo faatulagaina o lenei aso. E momoli atu ai le agaga faafetai tele i le paia ma le mamalu maualuga o le tatou Maota ona o le tauavagameaina o le tatou galuega mai lava i le uluai aso o lenei vaiaso seia oo mai i lenei aso ua faaiuina ai le tatou galuega. E talitonu le faamoemoe o lea ua taatia i malae fuafuaga o le tatou Aso Fono lenei, ma e le mafai foi ona toe alo le sa o le tatou Palemene, o lea ua uma ona faataatia le alafua aemaise polokalame ua uma ona faataatitia e ala i le naunau atu o le Nofoa ina ia tuituliloaina a tatou galuega tuua aemaise o le faatulagaina o le tatou polokalame e pei ona faatulagaina. O a tatou fuafuaga ia na faataatia, peitai, o tatou manatu e le o le finagalo lea o le Alii. Ua tatou maitau foi ma le totoa i le tulaga o le tulai mai ona o nisi o fuafuaga le maalofia ua satia ai le tatou sa e ala i nisi o mai ma tuatuaanoa, aemaise foi o le faamai ua tatou lavevea ai i lenei vaitau, e le gata ua aafia le tatou Maota nei, ae faapena foi le paia o le aufaigaluega o lo o tautuaina, le Ofisa o le Fono.

E le gata i lea, ua faapena ona i ai le tulaga o le tatou le faatasi ai ma le Palemia, ona o le sailiga malosi ma fuafuaga o le faatafagasegase. E le gata foi i lea, ua tatou vaavaai i le sa o le Kapeneta, ua le mafai ona faatasi mai nisi ona o le tele o tuatuaanoa i galuega tuua aemaise o galuega le maalofia e mafai ona faatinoina. A o le agaga lava ma le faamoemoe, ia tuituliaupu le tatou galuega mo le faaauauina seiloga e uma tualumaga o le tatou polokalame ua uma ona faataatia. Ua ou manatu ai, e tatau ona tatou sailiili malosi, e tatau foi ona tatou manatu i se tulaga e taoto ai le tatou Fonotaga i se tulaga logolelei ma talafeagai mo i tatou uma. E le aoga foi ona tatou naunau i le ia ae satia ai lo outou upega. A maua lo outou soifua ma maua lo outou soifua laulelei, e faapena foi ona mafai ona faatino a tatou galuega. E talii ae popoe ona o le tele o nisi mataupu tatou te le i tagofia, o ni mataupu ogaoga e tulai mai ai, e tatau ona atoa uma tootoo o le tatou Kapeneta ma le tatou Malo, ona mafai lea ona tatou talanoaina nei Tulafono. O lea foi e agiga i malae i le taeao nei le naunau mai foi o le Itu Agai ma le latou foi faamanatu ma le manulauti, a o lea foi ou te manatu au ia i le tulaga e taotoga lelei ai, ina ia tatou maua le femalamalamaai i le faataatiaga o tatou Tulafono e



limatataiina ai. O le mea taua, ia sologa lelei taualumaga, aua aua nei auvili a ia autafeloa galuega a le Palemene.

Ou te manatu ai ua uma ona faataatia tulaga o Fonotaga a le Palemene e pei ona i ai faaiuga a le Komiti o Galuega, o le tatou masina fou, e le o i ai se tatou Aso Fono e pei ona faatulagaina, a o lo o i le Fofoga Fetalai le pule faataga e tauala atu i le Afioga i le Palemia le fautuaga, e tatau lava ona faaauau tulaga uma o tatou Lipoti ua faataatitia mo le lumanai, ae tatou te lei oo atu ia Me. O Me o le masina ua uma ona faatulaga ai le tulaga o le tatou Tala o le Tupe ma agai atu i le tele o le isi tatou pisi. O lona uiga, e tatau ona faatulaga pea a tatou Lipoti seia maea lelei, aua o le vaiaso fou le masina fou, ae ua ou manatu i le tulaga ua tulai mai i le fetaii o i tatou ma faafitauli e le gata i le faamai fofoga o lo o lavea ai le atunuu, ae atoa ai ma le faatafagasegase o le Palemia, atoa ma le tele o tuatuaanoa ua feluti i le paia ma le mamalu o le Kapeneta, ua ou manatu ai o le a vavae foe mo lenei taimi. Ae ua ou talosagaina le Malo ina ia toe tauaofia le tatou Fono i le lumanai i le masina fou. O lea sa le faatulagaina ai se Fono a le Palemene, a o lea o le a toe faaauau ai i le tulaga lea, ona o le manatu ia faaauau pea a tatou galuega mo le lumanai ina ia faamaea uma a tatou galuega tuua ona tatou amata lea i le amataga fou mo le masina o Iuni.

O lea foi ua outou faafofoga mai ua ave lau faatonuga malosi ma le talosaga i Taitaifono ma Sui Taitaifono, o a tatou Tulafono uma ua pasia i le Fonotaga lenei, e 12. O Tulafono Tau Faaofi ua faasee atu i Komiti, e 10. O Tulafono ua toe foi mai i tua e tasi. O Lipoti a Komiti Filifilia ua maea ona iloiloia i le tatou Fono lenei, e 31. O lona uiga, toe 39 Lipoti ia e tatau ona tatou toe Fono ai i le masina fou. A o le agaga ma le faamoemoe, o lea ua avatu le talosaga i Taitaifono ia outou alofagia e tolu masina ua toe foi uma mai tatou Tulafono faitau faalua ma nisi o Lipoti ina ia aua nei tatou toe foi i le tulaga lea ua tatou taumafai nei e tulituliaupu.

E pei foi ona ou tulai atu e faamalamalama le finagalo o le Taitai o le Itu Agai pei ona tulai mai i le aso, o lea ua ou tatalo i le Palemia ma le Kapeneta, tuu mai le avanoa i a tatou Fono ia faaumiumi ina ia mafai ona tautalagia ai le tele o Lipoti ma faatino ai a outou fesili ia na tatou vevesi ai nei i le taeao. Ia tatou maua le agaga o le lauama tootoo. E pei lava ona ou faatalauula atu, e le uma le faiaso a le Alii. A o le agaga ma le faamoemoe, e le o se mea e noatia ai le taumafai mai o la outou pitolaau, e leai. O le manatu o le Fofoga Fetalai, ia tatou maua le agaga o le fetalitonuai ma le femalamalamaai i le taumafai e faasoasoina galuega e ala i Tulafono ua uma ona faataatitia. E i ai foi tulaga o le vaatele o a ni fatia ua sola ma aso ua alu ma upu felafaoi i le taimi ua sola ma le malama ua tea, ia tatou maua le agaga o le femalamalamaai. Ou te faamalulu atu foi, afai foi ua outou faafofoga mai ua siisii lou leo, ia outou finagalo malilie, o upu ma tala e faatoafilemu ai le tatou Maota. A o le upu ia faapapalagi, only sticks and stones will break your bones. A o le agaga ma le faamoemoe, o le taumafai atu pea ina ia faatoatoa ma faanofofilemu le tatou Maota, a ia tatou maua le auauna e tasi, tatou tulituliaupu le tatou galuega. A o le faamoemoega i le aso ma le faalalolalo mai foi e ui ina tatou le faatasi ma le Taitai o le Itu Agai,

leai, e ava tele atu foi. E faapena le tatou galuega, e le sili ifo Tulafono i le tatou va nonofo ma le tatou va tapuia. E ui o lea, ua faaiuina ma le manuia le tatou Fonotaga ma le faamoemoe, tuu atu i aao o le tatou Malo ina ia mafai ona tatou soalaupule nisi mataupu tuua ma tatou faatasi ma nisi o le Kapeneta, aemaise o le toe taliu mai o le Palemia o lo o tatou tapuaia le faatafagasegase, ona toe faaauuina ai lea o le tatou galuega.

E tuu atu i lau Afioga i le Sui Palemia mo le faatuina mai o le lafo e tolopoina ai le tatou galuega.

## **LAFO MO LE TOLOPOINA MA LE SAUNOAGA FAAIU A LE SUI PALEMIA**

**Tofa Hon FONOTOE NUAFESILI PIERRE LAUOFO:** Lau Afioga i le Fofoga Fetalai, a o lei tuuina atu le lafo, e muamua ona ou faafetai atu i le ee tapuai mai o Samoa i ona tulaga faalupelupeina, i le afio o Lana Afioga Mamalu O Le Ao o le Malo ma Lana Masiofo, afio foi le Afioga i le Sui o le Fono a Sui Tofia ma Lana Masiofo.

E manatua foi i lenei itula o le aso le sailiga matagi ma le sailiga fofa a le Afioga i le Palemia, o lea ua maua le tala fiafia o lo o manuia. Ma ou te masalo o se aso e le o toe mamao ona tatou feiloai lea i le alofa ma le agalelei o le tatou Tapaau Sili i le Lagi.

A o alofaiva lou Palemene i lenei vaiaso ma le la vaiaso ua tuanai atu, ou te manatu sa tapuai Tumua, Pule ma Aiga, Aiga i le Tai ma le Too o le Fua, ua faamalo tapuai.

E le faagaloina foi le tapuaiga a le Faleagafulu ma le Motusa faapea le Faigamalo a Tutuila ma Manua, i le afifio o le Kovana Sili ma le Lutena Kovana faapea sui mamalu o Maota e lua.

E faafetaia foi le galuega faifaiepa a le Afaigaluega tofofi a le Atua i so o se tafa o le atunuu ma atunuu mamao. O le tatalo lea i le ao ma le po ina ia manuia pea Samoa i le agalelei o le Atua ma ana atinae faaauau.

Lau Afioga i le Fofoga Fetalai, o lea ua ae i fanua le tuiga a le tautai i lana faatamasoaliiiga. O le agaga atoa o le Malo i lenei vaiaso ma le vaiaso ua tuanai atu, ina ia tuuititia galuega tuua a le tatou Maota, e ala lea i le tagofia ma le talanoaina o Tulafono ma Lipoti a Komiti Filifilia ua faataatitia i luga o le Laulau a Fono. E pei ona e saunoa, ua maea pasia ma talanoaina e lenei Tauaofiaga Tulafono tetele e 12 ma Lipoti e 31. Atonu o se matatia foi lenei a lenei Paeaiga. Ou te talitonu ua malamalama lelei Lipoti ma Tulafono, e matua leai se agaga i le Malo e faaufiufi se mataupu po o ni mea faaletonu. E maualuga i le manatu o le Malo le faamalamalamaina o mataupu uma ina ia aua nei masalomia le Malo e faapea ua faaufiufi ni amio faaalatua. O le manulauti a le Malo ia tali atu i ni faasea, faaletonu ma ni tuuaiga i ni amio faaalatua i se tulaga sili ona manino ma malamalama, aua o le malosiaga e faafoe ai le Malo, e maua mai i tagatanuu e ala i le faiga palota lautele a le atunuu.

O le faavae lea o faigamalo faatemokarasi e pei ona filifilia ma taliaina e outou tuua ma o matou matua ua tofafa mai tiasa ma fai i lagi le folauga. O le fatu atoa o le faatemokarasi, o le mafai ona tali atu i tuuaiga i se tulaga ua sili ona manino ma malamalama, an accountable and responsible Government, is the heart of democracy. Ua mavae atu augatupulaga, o ni o outou tuua ma matou matua na latou asaina le filifili o le vaosa ma le gasu o le tai taeao ina ia maua se saolotoga o Samoa. E lei faigofie ona maua, na maua i le toto masaa, ola faaaunuua ma lalafi solo i le vaomatua. Sa sopo tama o le atunuu i Upolu ma Savaii ma tofafa ai i le Ala o le Mativa i le tau faamalamalamaina o le Faavae tusitusia o le Malo fou i le atunuu. O le saolotoga lena o lea ua tatou oaoa ai i Faleseu ma aeae ai nei. O galuega lelei na a o tatou tuua na faatino, o lea ua oo mai i o tatou taimi, ma o le upu moni, e iu ma uma foi o tatou taimi, ae faaauau le taitaiga o le Malo e tupulaga faimai, o ni alo e faasino ia outou ma ni a matou foi fanau. O suiga la o le soifuaga e oo mai i lea taimi ma lea taimi, ma suiga o le taitaiga o le Malo mai lea augatupulaga i lea augatupulaga, e oo mai lava e pei o le agi a le fisaga e le mafai ona tatou taofia. E fesili le lumanai i o tatou taimi, pe na lelei ona faatino a tatou galuega. E sui le taimi, e sui foi augatupulaga ae le muta le faiga o le Malo, ma e le muta foi atiinae lelei e fai e le Malo mo le manuia o tagata lautele. E faaauau pea. Ae aua nei galo ia i tatou le upu a le aumatutua, “O lou tofi mai le Atua nei vale tuulima.” E mafua i sea ona vale tuulima? E mafua i le faatamala, e mafua i le ola faasausili, e mafua i le ola soonafai ma le le faautauta. Vaai lou pale nei lelea.

Lau Afioga i le Fofoga Fetalai, ia agalelei le Atua i le Taitai o le Itu Agai, le Sui Taitai ma sui usufono mamalu uma o lena Itu o le Maota. Liua le vai o le tamaitai i lenei Itu o le Malu, ia alofagia e le Atua Minisita o le Kapeneta ma Minisita Lagolago, ia maua le soifua laulelei o le aufaigaluega uma a le Fono Aoa ma Ofisa Sili o Pulega uma ma Pule Sili o Matagaluega ma Faalapotopotoga a le Malo, aua lo latou valaauina e tusa ai ma tiute ma galuega o lo o feagai ai.

Lau Afioga i le Fofoga Fetalai, faamalo le faapalepale, faafetai mo le faafoeina o le Fonousu a le atunuu. O le fetalaiga a Ulumu ma Lefaoseu, “Ua se togi le seu lagatila malo faapulou i le tualima, ua malo fai o le faiva”. O le matou tatalo, ia utupupuina e le Atua le tomai, le tofa faatamalii ma le faautaga faafaleupolu e faafoeina ai ma faatonutonu folau ai le Fonousu a le atunuu. Ia folau i lagima Samoa.

Lau Afioga i le Fofoga Fetalai, ua ou manatu, o lo o i ai nai mataupu e lei maea ona talanoaina ma tagofia e le tatou Fonotaga lenei, ma e tatau ona faaauau ma faagasolo. E pei foi ona e saunoa o lo o i ai foi nai fesili a le Afioga i le Taitai o le Itu Agai sa taumafai mai ai i lenei aso po o le taeao ua tea. Peitai, ona o le faagasologa o le tatou galuega, ua manatu alofa ai foi i le tulai mai o le Taitai o le Itu Agai, ua faapena ona toatamai lona finagalo ma valaau i lana Vaega e latou te tuua le Maota nei, peitai, e maitau atu e leai se sui usufono na tulai. Ia atonu o se faanoanoaga lea i le Taitai o le Itu Agai, e manatu alofa ai, e tatau ona maua sona avanoa, e tatau lava ona maua sona avanoa aua fesili a o Lipoti foi pei ona saunoa i ai i le Aso Gafua o lenei vaiaso.

O le mea lea ou te faatuina ai le lafo lau Afioga i le Fofoga Fetalai, ona e maitauina o lo o i ai nai Lipoti a Komiti e maitauina e lei oo i ai le faasologa o le tatou Galuega e moomia le iloiloina, o lea ou te faatuina ai le lafo, *Ina ia tolopoina nei Taulumaga a le Fono Aoa, seia aulia le Aso Gafua, 14 Aperila 2014.*

Soifua.

*Faaluaina e le Minisita mo Faamasinoga ma Pulega Tau Faamasinoga, Sui Fofoga Fetalai, se tasi o sui usufono mo le Au Palota Taitoatasi, Afioga Maualaivao Pat Ah Him ma le sui usufono mo Aleipata Itupa i Lalo.*

*Na faamaonia le lafo.*

**FOFOGA FETALAI:** Ae lei tolopoina ma faaiuina le tatou Fonotaga, ou te...

**Afioga Hon Aeau Peniamina Leavaiseeta:** Lau Afioga i le Fofoga Fetalai, ou te fia tulai atu lava faamolemole, mo faamaumauga leaga e taua foi lenei vaitau. Lau Afioga i le Fofoga Fetalai, na o se fuaitau lava e fia faasao, leaga e tauga, ioe. O lea ua saunoa mai sa finagalo le Taitai e tulai, ae leai se tasi e tulai. E leai, o le mea moni lava, na vavao matou e le Taitai, afifio pea ma alaala, e faigata le avafatafata i le tatou vatapuia ma le Fofoga Fetalai ae sei tulai lava leaga... E pei o le mea lenei e tataua ona faasao, ae le o le fai mai lava ona nonofo lea. Aua nei toe faia.

**FOFOGA FETALAI:** O le alu ese a le Taitai e le iloa, a o lea o le a iloa talu outou. E le afaina e faapena lava le fetuunaiga. A afio lava Misa ua atoa Aana, a afio lava lau Afioga i le Sui Taitai o le Itu Agai ua atoa le Taitai. E le afaina le Taitai o le Itu Agai, e uso lava le teva ma le eva, masalo o alu si toeaina e asi ana moavao toe sau ai i le tatou Fono o lumanai. A o lei faaiuina le tatou Fono, ou te valaau atu i lau Afioga i le Minisita Lagolago o le Matagaluega o Faamasinoga ma Pulega Tau Faamasinoga e tulai maia e fai se tatou tatalo e faaiu ai le tatou Fono.

*Na tolopo Taulumaga a le Fono Aoa i le itula e 1:14 i le aoauli seia aulia le Aso Gafua, 14 Aperila 2014.*